

萬 有 文 庫

第 二 集 七 百 種

王 雲 五 主 編

湖 海 詩 傳

(二)

王 昶 輯

商 務 印 書 館 發 行



湖海詩傳

(二)

王昶輯

國學基本叢書

湖海詩傳卷七

宋邦綏

字逸才。號曉巖。長洲人。乾隆二年進士。官至戶部侍郎。有紅杏齋集。

霜鐘

長夜天將曉。鐘鳴蕭寺寒。響沉和月落。聲遠帶霜殘。老屋燈初暗。閒窗夢已闌。誰將斷續意。靜證道心安。

思歸

離情日見鳥分飛。惆悵傳經心事違。江雨山風勞跋涉。可知官好不如歸。

觀保

字伯容。號補亭。索綽絡氏。滿洲正白旗人。乾隆二年進士。官至左都御史。

九日同友人登雲光洞賦成十韻

崖口地名初迴獵。相於興不違。況穿紅葉谷。共叩白雲扉。竅坎仙關豁。青焚佛光微。倒垂花片片。突起霧霏霏。開關神工大。超遙羽駕歸。三門藏奧蹟。一徑引清暉。乳滴殘碑在。苔荒古篆稀。景光延過客。空翠濕征衣。暫息塵埃躅。潛窺造化機。山風任吹帽。欲別尚依依。

德保

字仲容。號定圃。索綽絡氏。滿洲正白旗人。乾隆二年進士。官至禮部尚書。有樂賢堂詩鈔。

秋日

荒村無事掩柴門。世味嘗同嚼菜根。靖節未歸彭澤里。相如獨守茂陵園。風來別院生虛籟。苔長空階沒舊痕。此景此情誰會得。半床殘帙一清尊。

春歸

百計留春春亦歸。東君欲別更依依。空庭夜雨醒殘夢。芳草天涯怨落暉。繞樹乍聽鶯百轉。銜泥驚見燕雙飛。欲尋紅紫無蹤跡。花點池塘絮點衣。

錢琦

字相人。號瑛沙。仁和人。乾隆二年進士。官至福建布政使。有澄碧齋集。

渡海歸重經澎湖

柱石砥中流。狂瀾面面收。有山皆種麥。無島不藏洲。重到兩年客。孤乘一葉舟。何時成利濟。消息問潮頭。

送魏夏初歸慈谿

連宵情話思依依。夢冷西風憶故扉。未信才多偏折命。詢知遊好不如歸。板橋霜重人初起。江岸潮平雪

正飛贏得手中金線在。遲君重整嫁時衣。

王會汾

字蓀服。號晉川。無錫人。乾隆二年進士。官至吏部侍郎。左遷大理寺卿。有梁溪詩鈔。

江陰迴舟憶芳三金佩亦文諸子

靡靡逐清景。迢迢傍芳澳。水岸一花明。殘陽數峯綠。沙鳥下仍飛。漁唱斷還續。美人方阻修。相思憶如玉。

朱光草蟲同年何克思索題

油窗日暖殘霞烘。飛絲落絮春濛濛。起摩倦眼潑茶乳。神輿尻馬遊無窮。鯤鵬么麼一氣中。人間日日天池風。且隨羣動自翺躍。安用結束誇兒童。君不見古來文物埽絕蹤。長安畫史多傭工。更無弓刀鬪褒鄂。祇吮鉛粉摹安豐。貂蟬插髻有何好。意思蕭索如枯蓬。不如朱光草蟲畫。手腕所到天機融。荒寒意態入毫楮。碧花翠蔓懸秋紅。恍然坐我故山裏。草根露濕吟秋蛩。開圖索句無忽忽。盡天發覆難爲功。人生磊落自可耳。不差爾雅箋魚蟲。

札克丹鄂佛洛營觀蒙古騎生馬歌

札克丹營氣蕭爽。沙坡澶漫連平壤。諸蕃遊騎爭驅入。霧鬣風鬃恣來往。呼韓晚上羊羶羹。幔城合奏琵琶箏。曲終更呈舞馬戲。奚官碧眼虬髯獯。鞭鞘一拂馬齊縱。附尾綠鬃不施鞿。千夫疾躍萬夫唱。雪花旋

捲塵飛霧。注坡驀礪。走僦僦。舞袂交竿。捷有神。忽然墜地勢驚絕。懼如健鶻翻輕身。舉後蹶前雙掣拽。凌虛制變爭毫髮。馬間出入馬不知。逸態雄姿轉相發。至尊一顧神泚融。人馬咸資控馭工。少府金錢服官綺。拜恩蹈舞擎歸籠。卡輪競出尋荒壘。蒙古諸蕃帳房例在旌門外。筆策風高山月起。御營鎗火燦華星。萬帳烟光夜凝紫。

喬光烈

字潤齋。上海人。乾隆二年進士。官至湖南巡撫。有最樂堂文集。

秦中王素村招飲舟中至虎邱後山遇雨卽次素村韻

爲喜詩人折簡招。山塘十里碧迢迢。小橋曲岸連芳草。綠酒紅筭引畫橈。山雨忽飛林影暗。波光斜漲寺門遙。梵王樓閣溟濛裏。好景憑誰寫素綃。

夏日與華州王刺史登雁塔

金刹峒嶢上碧空。清涼高處拂天風。危欄下俯真無地。畫拱層飛欲起虹。掃盡炎氛歸象外。迴看佳氣滿關中。使君應似高常侍。正喜題詩舊日同。

阿桂

一等誠謀英勇公賜寶石頂四團龍補服薨贈太傅諡文成

潘謁山房詩話公像著紫光功存册府助名德望所不待言二十餘年為太平宰相而意猶不自憚蓋本文勤公之教嘗令其事鄂文端公爾泰朱文端公軾楊文定公名時徐文恪公元夢蔡文勤公世遠承其指授又與王籥林蔣湘鳳諸君游意在儒林文苑不以縉略為長也統兵所至決策如神自在西陲即親行陣屢著膚功及木果木兵潰後五日而復美諾二年而掃金川甘肅化林坪鹽茶聽回人連年蠢動負固皆一兩月平之故番王悍將率拱手聽命悅服無間言其後偏裨官至將軍提鎮者數十人至督撫者亦十餘人及入內閣愛才好士見官屬必教以慎持名節毋營競見外吏必戒以廉潔自矢毋貪黷所居廳事前僅容旋馬日食不及四簋絕無園林聲色之樂比其薨也天下識與不識皆嗟嘆之先是公從軍於北路及平伊犁收回部拓地二萬餘里上欲置兵屯候尉益壯西北屏藩同事大臣未肯肩其任公獨奏請從容建置浚河渠集農功立驛傳築城積穀商旅交集不十年而甌脫變為都會自嘉峪關西天山以北直接科布多烏里雅蘇臺與喀爾喀諸旗相接而葱嶺以南直抵葉爾羌行者如適堂塗如哈薩克布魯特及北鄙強悍之俄羅斯亦恪恭震疊公薨後伊犁將軍保公徇衆請建專祠隨蒙俞允蓋深知遺愛之長也公有作輒焚其稿予偶見而錄之故所存止此

感懷用蘇文忠公寄量美叔韻

少小重意氣，踟躕誓前賢。惟知一往樂，誰能計萬全。而今衰老矣，狂直都棄捐。心跡聊自慰，功成付與天。百憂如蝟集，擾擾白髮年。雖塵生還想，寧知口碑傳。胡不賦歸去，恣意窮芳鮮。松竹陰吾廬，朝昏飽雲烟。涇渭自清濁，美醜何憎妍。不見亦不聞，幽谷長日眠。予有數椽在盤山下擷彼南山茶，松枝活火煎。一甌滌內熱，快意耽靜便。豈必覓丹砂，妄與神仙緣。醉鄉亦復好，遑惜囊無錢。

蘭泉比部初度

瘴地三年客。軍中百戰身。傳經崇世講。闡泉鄉試座。主夢少司農。文子會試座。主錢少司寇。稼借箸重嘉賓。白髮歸還未。青鏡聚正頻。初辰一卮酒。梅放近陽春。

話舊贈錢冲齋觀察

憶昔承師範。蕭齋只兩人。始從親研削。直至命冠巾。經歷風波險。甘同蔬水貧。十年情意重。愛我比祥麟。
余幼隨冲齋。學人元朗先生受業。至登科通籍。終未易師。而先生亦別無弟子。間一歸浙。閱數月。即返京師。在南日亦未受館。他氏十餘年中。閱歷憂患。甘苦共之。不獨文字獎許也。

人海藏身久。翛然物外情。會心耽易理。厭俗避詩名。貧賤長如素。文章莫與京。誰知繼起者。尚有父風清。
先生秉節高介。澹于酬接。晚年好易。朝夕不釋手。時有心得。即籤出之。以質先文勤公。典會所至。亦寄吟咏。長篇大章。有至一百二十韻者。然從不以詩自名。制舉義極工。而艱於一遇。時論惜之。

祝維誥

字宣臣。號豫堂。秀水人。乾隆三年舉人。官內閣典籍。有綠溪詩藁。

蒲褐山房詩話。先生少有才名。一直薇垣。公卿皆為延譽。查張兩相國尤器之。屢隨清蹕。故灑河遠海風景。數見於詩。李布衣鐵君謂其怡穆醇靜。沈宗伯稱其出塞諸作。激壯適上。蓋是時風雅中巨擘也。然沉淪下秩。久之當出補同知。而非其意。所願量遷內閣典籍。乞病以歸。未及家而歿。余至京師。即辱先生獎許。以綠溪詩稿屬為點定。留篋中者垂四十餘年。今始歸其孫世守焉。子喆亦已謝世。別見於後。

舟次同陳丹城

連朝多東風。向晚灑疎雨。漁燈隔暗葦。幾點明烟渚。照我同舟人。寥寥一相語。微聞山鐘歇。詩思杳何許。

夜度長城嶺

已出清涼山，行行過臺麓。巖風時刺面，餘雪猶塞谷。明晨當度嶺，人馬畏僂促。芻秣乘夜闌，倉卒戒奴僕。冥冥十數里，顛滑冰歷碌。嶺頭門不開，欲進詎能速。彳亍荒山坳，却退少村屋。稍前得古寺，叩扉橫被逐。破廊三尺餘，蹲踞各蝟縮。手足骨已僵，口鼻氣難續。始信苦寒行，此況最云酷。四更嶺門啟，跨鞍忍駁瘡。橫空十八盤，千仞更一曲。林深易相失，徑黑致互觸。仰窺天宇微，旁睨地勢蹙。臨高素知戒，拾策但匍匐。側身防偶蹉，錯趾嗟屢跼。乍聽鼙鼙號，復恐豹虎伏。馬跑雙泉響，掛甲古松矗。俗傳宋楊延昭掛甲處坡坨旣縈紆，崖壁亦重複。雞鳴到關口，野店且憩足。驚魂擾終宵，履坦俟朝旭。險阻寧憚勞，紀行聊備錄。

泊瓜洲

維舟宿瓜步，欹枕聞驚湍。深夜月微白，長江風自寒。壯情千里闊，歸夢五更安。不奈金焦望，茫茫烟路寬。
二月十五日尋春過偶圃憶朱大

暖風到處動吟魂，芳草閑尋近郭村。黃耳隔籬能認客，蒼頭刷筍自開門。春留元亮花三徑，飲乏劉伶酒一尊。迢遞京華游子在，旗亭新唱與誰論。

崧峻招游澈湖

平生未到澈湖濱，此日招邀許問津。葑草綠生雙浦淨，杜鵑紅點萬山春。人思賀監空留宅，情比支公愛

結隣日暮悠然桑竹下。桃源風物古來淳。

翁莊感舊同壺尊作

徑荒苔竹圃荒泉。戶滿蠨蛸只黯然。可記讀書清曉坐。水風涼到曲闌前。

高瀛洲

字翰起。號願圃。仁和人。乾隆三年舉人。官太平同知。有小稱意齋集。

賦燕

雕梁小壘漸泥融。修尾長襟鬪翠紅。不愛高飛愛雙宿。晚簾消得月朦朧。

袁枚

字子才。號簡齋。錢塘人。乾隆元年薦舉博學鴻詞。四年成進士。官江寧知縣。有小倉山房集。

蒲芻山房詩話。子才少舉宏詞。旋成進士。嗣以散館。出為縣令。初在江寧。總督尹文端公絕愛其才。既丁憂。再起。至陝西。與總督黃文襄臭味差池。上書萬餘言。不省。遂乞病歸。得廢圃于江寧小倉山下。疏泉架石。盤為二十四景。窗牖皆用五色琉璃。遊人闐集。時吳越老成凋謝。子才來往江湖從者如市。太邱道廣。無論費。郎蘇夫互相酬唱。又取英俊少年者錄為弟子。授以才調。等集。挾之遊東諸侯。更招士女。之能詩畫者。共十三人。繪為榜。詩圖。燕斂蟬鬢。傍花隨柳。問業于前。而子才白鬚紅鵝。流盼旁觀。悠然自得。亦以此索當途。題句於是人手愛之。所至延為上客。遮館授餐。而子才白鬚紅鵝。精饌。彙作食單。梓以行世。故三十年中。婦門納屣。為向來名人所未有。才華既盛。信手拈來。矜新闢捷。不必盡遵軌範。且清靈雋妙。筆舌互用。能解人意。中蘊結今石庵相公在江寧時。聞其蕩佚。將訪而按之。子才投以二詩。公閱畢。即請相見。頓釋前嫌。其詩得力如此。然謝世未久。頗有違言。吳君嵩梁謂其詩人多指摘。今予汰淫哇。刪蕪雜。去纖佻。清新雋逸。自無慚於大雅矣。孫君淵如又謂其神

道碑墓志銘諸文紀事多失實予謂豈惟失實并有與諸人家狀多不合者即如朱文端公軾岳將軍鍾琪李閣學綬裴文達公曰修其文皆有聲有色然予與岳裴二家之後俱屬同年而穆堂先生爲子房師李少司空友棠之祖且予兩至江西見文端後裔詢之皆云未嘗請乞亦未嘗讀其所作蓋子才遊屐所至偶聞名公卿可喜可愕之事著爲志傳以驚爆時人耳目初不計信今傳後也

水西亭夜坐

明月愛流水。一輪池上明。水亦愛明月。金波徹底清。愛水兼愛月。有客登西亭。其時萬籟寂。秋花呈微馨。荷珠不甚惜。風來一齊傾。露零螢光濕。屢響蛩語停。感此元化理。形骸付空冥。坐久并忘我。何處塵慮櫻。鐘聲偶然來。起念知三更。當我起念時。天亦微雲生。

雨後步水西亭

雨氣不能盡。散作滿園烟。好風何處來。荷葉爲翩翩。羣花浴三日。意態柔且鮮。幽人傾兩耳。竹外鳴新泉。喁喁一鳥歎。閣閣羣蛙連。暝色起喬木。斷虹媚遠天。蝸過有殘篆。琴潤無斷絃。憑闌意清悄。與鷗相對眠。八月廿九日同補蘿晴江探桂隱仙庵歸憇古林寺

游山同隊行。看山各自領。不逢桂花開。且踏桂枝影。桂葉何離離。蓄意如未逞。寒潭明空霜。禪室納虛景。脉脉夕陽沉。冷冷天風冷。道人登竹樓。彈琴萬山頂。

曳杖隨所如。小憇古林寺。經聲如有人。松花飄滿地。一僧長眉青。萬竹短籬翠。爲我滌齋廚。供以伊蒲味。時當晚課齊。各各參佛義。余亦慧業人。拈花領微示。出門秋正清。下山月猶未。回頭雲一重。鐘聲渺烟際。

玉泉觀魚

玉泉何澄清。銀河移在地。戢戢萬魚頭。空行渺無際。紅鱗色陸離。白小影搖曳。窺客若有情。銜花儼相戲。池間荇藻長。風定水烟細。可惜夕陽沉。鐘聲雲外至。春山生睡容。遊客有歸意。回首波紋平。淡月僧門閉。

聞魚門吏部充四庫館纂修喜寄以詩

文思天子搜遺書。子以文名領石渠。士安不用借五車。娜嬛福地張華居。憶昔蛩蛩附鉅虛。兩家簡牒爭搜儲。愛而不見心瞿瞿。一朝去我翔天都。明堂大開招羣儒。青藜太乙僬僬趨。四千年物盡輓輸。朱文綠字體製殊。誰威玉牒元皇符。漢唐所少元明無。咸集舜陛來堯衢。西山光芒燭太虛。子與蘭臺諸大夫。雙眸一串牟尼珠。部居別白分錙銖。縱難讀盡在須臾。但觀大略亦足娛。有如餓腹餐天廚。朶頤未動口欲吐。又如大海遊鱉魚。恣汝屬饜樂有餘。問誰有此遭逢歟。領百萬君恐不如。我猶未免爲鄉愚。聞見狹隘探索疎。側身西望空嗟吁。不能從子爲書奴。願抄書目遙寄子。俾得約略知些須。此身不負生唐虞。

夜過借園見主人坐月下吹笛

秋夜論秋士。先聞水上音。半天涼月色。一笛酒人心。響遏碧雲近。香傳紅藕深。相逢清露下。流影濕衣襟。

起早

起早殘燈在。門關落日遲。雨來蟬小歇。風到柳先知。借病常辭客。知非又改詩。蜻蜓無賴甚。飛滿藕花枝。

北樓

北斗挂高樓。江山一望收。白雲簷外宿。清露檻前流。遠樹深藏寺。風窗易得秋。飛花雜松子。終日打簾鉤。

泊舟平望。偕齊次風宗伯周蘭坡學士訪玉川居士

輕帆爲我慰離羣。得見梅花又見君。三徑苔痕藏草屋。一湖水氣濕春雲。風停篆影微微直。雨歇鶯聲漸漸聞。彈指來遊剛十載。當筵莫惜酒杯醺。

題沈凡民蘭亭卷子有序

凡民與王廡舟裘魯清交最狎。沈王故工楷法。五十二歲時。各臨蘭亭一本。互角精能。畫者作流觴曲水。貌三人于其中。亡何魯清死。又數年。虛舟死。凡民每哭一人。則跋數語於卷尾。乾隆十六年十一月。凡民來白下。出圖命題。余生晚不獲見。裘王兩先生。而其時。凡民之官建德。余又將赴長安。感三友之多情。逢兩人之將別。磨墨愴然。不能自已。

先生垂老淚。星星行篋常攜感舊銘。一代交情存筆墨。三人顏色付丹青。酒杯白社秋來憶。玉笛山陽雨後聽。五十二年鴻爪在。昭陵風雪滿蘭亭。

浮生難挹魯靈光。風義羊求事渺茫。兩晉書亡王內史。六朝人剩沈東陽。金仙次第辭西漢。宮女憑誰說上皇。惆悵鍾期來海畔。斷琴彈落一天霜。

與郭鳳池侍講秦淮話舊作

當頭新月墜纖纖。十二年來吏隱兼。人似孤鴻雲聚散。詩如老將律精嚴。黃梅雨久秦淮闊。紅藕花深畫舫添。料得憑欄定含睇。六朝春在水精簾。

春柳

消息江南又隔年。秋千院落碧雲天。春心肯落梅花後。青眼常開寒食前。十里烟籠村店小。一枝風壓酒旗偏。遊繯欲綰愁無力。任爾橫陳大道邊。

欲訴衷腸萬萬條。滿身香雪未全飄。新絲買得剛三月。舊雨吹來似六朝。綠影自遮南北渡。春痕分護短長橋。五株一入先生傳。不學柔枝亂折腰。

春興

身居宏景三層閣。家住香山八節灘。愁踐落花時讓路。愛生春水獨憑欄。朱藤架老蜂喧早。薛荔墻高蝶過難。呼取樵青作僮約。幾痕新雨試魚竿。

山中絕句

草草亭臺布置餘。今年真個愛吾廬。牙籤卻放西廊下。自有斜陽來曝書。鎮日山腰劖白雲。裁量烟草話紛紛。春衫不用金爐爇。自向百花香裏熏。

青蘆葉葉動春潮。堤上楊花帶雪飄。滿地月明仙鶴語。碧天如水一枝簫。

春日雜詩

千枝紅雨萬重烟。畫出詩人得意天。山上春雲如我懶。日高猶宿翠微巔。
水竹三分屋二分。滿牆薜荔古苔紋。全家雞犬分明在。世上遙看但綠雲。
清明連日雨瀟瀟。看送春痕上柳條。明月有情還約我。夜來相見杏花梢。
萋萋芳草遍春潭。深院無人綠更酣。何處一聲清磬響。斷峯西去有茅菴。

湖海詩傳卷八

沈德潛

字確士號歸愚長洲人乾隆元年薦舉博學鴻詞四年成進士官至禮部侍郎予告歸加尚書銜贈太子太師諡文愨有竹嘯軒詩鈔歸愚詩鈔

蒲渴山房詩話先生潦倒名場晚登科第歷四林桐城之薦卽蒙主眷不數年游貳春卿卿雲復旦之歌卷阿矢音之什寶鬮稠疊往昔所無繼以年近八旬陳情歸老復賜詩以寵其行有云清時老名士吳下舊詩人又有云玉皇案吏今山客天子門生是故人其嘉獎至於此及鸞輅南巡恩榮畫接加銜食俸優禮彌隆宜海內誇爲盛事吳中傳作美談矣先生少從學于吳江葉星初雙葉居橫山故阮亭尙書云橫山門下尙有詩人然先生獨綜今古無藉而成本源漢魏效法盛唐光宗老杜次及昌黎義山東坡遺山下至青邱崆峒大復臥子阮亭皆能兼綜條貫嘗自進其全集御製敍言以高王爲比誠定論也所選別裁諸集隨千古之風騷聚一時之壇坫年至九十八而終蓋得于天者厚矣或文有反唇而譏者真少陵所謂汝曹昌黎所謂羣兒爾

制府來

客述制府始末甚詳因成樂府四解誌往事做後來也

制府來勢炎赫上者罪監司下者罪二千石屬吏驅使如牛羊千里輦重來奔忙鞠脛上壽登公堂制府賜顏色屬吏貼席眠破得百家產博得制府歡制府之樂千萬年一解揚旗旌麾三軍制府航海清海氛聲名所到步步生風雲居者闔戶行者側足但稱制府來小兒不敢哭軍中隊隊唱凱還內實百貨裝樓船

文武郊迎。次且不得近前。制府之樂千萬年。二制府第神仙宅。夜光錦披牆壁。明月珠飾履舄。貓兒睛。鴉鵲石兒童戲弄當路擲。平頭奴子珊瑚鞭。妖姬日夕舞綺筵。賞賜百萬黃金錢。天長地久雨露偏。制府之樂千萬年。三太陽照冰山。傾黃紙收制府。片刻不得暫停。軺車一兩千里無人送迎。婦女戟手冒童穉呼其名。爰書定在旦夕。求爲斷養。斷養不可得。盤水加劍請室閒。從前榮盛如雲烟。制府之樂千萬年。四

侯氏三忠祠迎神曲

天門高呀然開。儀肅肅神靈來。神靈來太常公披朱衣冠芙蓉。激雷電斷金鐵。排趙媯擊曹節掖庭危。邊疆敗公直言櫻螿。經百折歷九死死握拳生嚼齒靈在天欣同類。揖楊左肩周魏靈既來升華堂羞燔炙。達羶蕪靈安坐奏清微。颯金飈寒衆體修肝蠶忠孝門聚星辰光乾坤。

右祀太常公諱震賜

坎其擊鼓。廟庭之下。俟我雲車。迎我風馬。車馬繽紛。通政降只。飛龍元螭。牙角從只。血痕斑斑。心憤痛只。論伸冤獄。力折強藩。連丁陽九。龍馭升天。銜鬚受刀。決脰報君。精衛填海。身腐心存。卞壺授命。盱眙從死。不辱門風。是父是子。辭鈞天所。來饗齊明。綱綱縕縕。達以精誠。鳴梟妖狐。伏而不鳴。

右祀通政公諱嗣曾

鬼雄前隊操戈。鬪髀纍纍血模糊。飛車兩旁翻絳旗。中有義士髯而鬚。髯而鬚。侯季子地老天荒。鐘鏞

遷徙廣柳車內藏忠臣。陳臥子事敗連駢棄東市。升元冥謁帝局。上帝謂而忠貞相隨而考而兄出入玉闕。金庭被髮翩然。娛游下土。周覽城郭。心悲離黍。後車載美人。冠帔何容與。當年巢破卵不完。連娟修眉殉其主。神靈風雨飄颻如。酌神清爵神來乎。

右祀太學公諱岐曾

分賦古鼎詩三十韻

龍文高晃朗。雲氣覆霏霽。丈室神彩凝。高座古鼎在。蕭穆儼介珪。鄭重埒蕭龜。蟠螭足參立。貫索耳雙對。無色不駁榮。有狀悉萃苴。藏伏饕饕魂。追取最屬熊。鬃鬣天馬羣。雕尻鼯鼠輩。上鏤雷回文。下鑄乾艮卦。窳鄉別俯仰。窺輒誌腹背。字類鄒嶧碑。銘非考父誠。跟肘細分析。詰曲空抑噫。初疑周虎鬚。亦異虞瓦秦。比紀甌增價。並石鼓稱最。腹儉失名號。口吐詫靈怪。康弧俗情闕。玉鉉庸耳聾。常然鬻易熟。函牛汁堪喂。取部魯非禮。售賈宋竟味。染指嗤子公。覆餗訕元載。滋味仗調燮。法物諒珍愛。器列禮祀時。用昭廟堂內。正直形不頗。靜虛量匪隘。吐景成晶瑩。敲雲散埃瑳。烹煎明作離。灌溉澤資兌。實黃流在中。席文茵于外。左陳伯索孟。右置師飴敦。塵劫逾千秋。神游歷三代。相對供捫摸。雜坐勤盼睽。扶風傳瑰奇。彌明謾狡繪。博物蒐典籍。琢句慙曹鄴。世寶垂億年。作歌期保艾。

泛碧浪湖泊道場山下

泛汎碧浪湖。乍離峴山亭。吳興太守段康。建亭於山名顯山亭。後改峴山。荷蒲無故色。寒林有餘青。驚鱗潛水草。沙鳥立雲汀。但憐空翠過。幾忘舟楫行。青山與白塔。隱隱如相迎。已覘墟落近。漸識炊煙生。野叟作吳語。相顧殊有情。涼月誰共對。村酤易爲醒。明發入雲去。遙尋清磬聲。

九月登賀九嶺初見霜葉

賀重九處 相傳吳王

陶公愛重九。我意同斯語。遊興高令節。山行覓儔侶。已謝籃輿逸。遂陟崇岡阻。讌樂想霜圖。傳聞匪稽古。縱步無近尋。流眄有遠覩。隔隴動齋鐘。半嶺聞樵斧。楓林點輕霜。紅葉燦可數。貌腴神欲凋。浮榮難久處。超遙偕同游。沈寥感秋序。倚杖佇蒼茫。輕煙起平楚。

游天池

山靈招我深。輕策上層阪。巔頂涵清池。坎艮象成蹇。水寒魚不生。穴黝龍疑假。想當融結初。天匠費鐫鏹。鑑影鬚眉寒。洗心煩鬱遣。沿緣把垂藤。趺坐藉蒼蘚。是時暮樵還。風送歌聲遠。雲凝羅徑濕。煙動僧廚飯。聊追謝監游。詎同阮公返。不見青蓮花。羽化空遙緬。

竹塢訪文文肅讀書處

山深境亦寒。人家住叢竹。言尋故相居。指引隨樵牧。秋籜點林閭。斜日下蘿屋。登堂緬古人。當年此耕讀。經術協天眷。貞亮秉鈞軸。道直泯險夷。恩渥輕寵辱。曾罹孟博危。復遘曲江逐。斯人已云亡。巖壑畱高躅。

望遠重致身。懷賢恥干祿。清風激頑懦。名山享尸祝。何處來溪毛。寒泉羞杞菊。

曉登小白陽山

山嵐曉濛濛。踏雲仰層頂。林深光未顯。峯折路疑引。陟岡輕嶮巖。縱目得深迴。遙巒勢環抱。隱隱作蕃屏。參錯互烟水。橫縱開畦町。是山客少過。地阻名未炳。彷彿高蹈流。韜聲晦箕穎。人嫌洞壑寒。我愛松石靜。攀條驚鶴棲。漱澗分狷飲。握蘭緬道侶。雲臥逢真境。晞髮巖之幽。初陽照孤影。

晚入鄧尉山宿還元閣

晚鐘流巖壑。尋聲經疊嶂。重游二十年。雲山故無恙。來登四宜堂。聊此息筇杖。老桂漸凋殘。吾生豈強壯。憑軒送遠目。百里納清曠。晴雪漫陂陀。香風透屏障。花影連湖光。夕陽搖滉漾。俄頃寒烟凝。遙嵐換形相。夜投還元閣。高枕鳥巢上。風雨驚夢魂。松濤入紙帳。

經仙掌峯至石屋

文肅嘗
讀書於此

尋山得靈閣。險磴緣雲上。峯裂十指形。云是仙人掌。造化弄奇巧。畱此意外想。蹊危少安步。石仄容孤往。迴矚途屢變。遙睇景難象。古洞勢豁舒。深入轉開朗。境寂返聽真。無風動虛響。石扇疑啟閉。仙蹤乍惚恍。哲人孰誦讀。於此得幽賞。出山嬰華簪。罹禍幾鉤黨。撫躬審行藏。懷賢緬疇曩。何如此冥心。元珠探象罔。

過廂

截流利轉漕。險要開版牘。奔流挂丈餘。玉虹下石硤。驚靈擺礪硯。鐘懸響鞞鞞。未到耳先震。乍覩氣已讐。客舟排檣竿。喧逐亂鷺鷗。儒者懼欲引。勇者浪堪踏。長年理戩箠。鳴金衆夫集。退行索齊挽。逆上船疑立。忘身與水鬪。性命輕於葉。人定終有濟。忽奪兩崖入。中流自在行。安危判一睫。出險更思險。心定膽轉怯。猛省戒垂堂。未敢貪利涉。前途浩茫茫。願言慎舟楫。

鳴鴉

山形如玦環。聚族成邨塢。東向受初陽。和風滿林莽。人家藝花竹。傍湖實網罟。嫁娶不出邨。禮讓成賓主。世氛日囂喧。隔水風偏古。我行訪林屋。失道遵枉渚。居人知我至。相邀具雞黍。地僻多遠心。情真寔浮語。把卷懷前哲。諫蔡九遠
秦存古詩臨風久延佇。

石公山

青螺點蒼波。登陟忽巒岫。山石備萬形。變態各奔湊。荒幻理所無。假詭境罕覩。造物費鑄鑠。用力幾莫就。亭臺嵌巖阿。因地成締構。風出一罅天。雲生百尺竇。石公與石姥。峙立分左右。我來秋已深。遙林熟橘柚。問齋饌伊蒲。隨目觀衆皞。夜畱來鶴亭名巔。霜寒伴猿狖。

度石碓嶺

谷深沸淙潺。山亂圍合沓。緣山臨無際。注目氣先讐。徑仄趾不受。石礙頂欲壓。覓路穿高雲。盤盤百尺級。

同行肩難並。後進履防躡。磴危碎石支。沙崩古槎接。亦知垂堂戒。尋幽願深入。到頂身屢疲。趨下目轉捷。半途不退悔。踰險終寧帖。寄語學道人。用志慎毋怯。

發慈光一路經老人峯。緣天都峯趾。過斷凡橋。上木梯。至文殊院宿。

欲窮升仙境。言別金仙宅。取逕傍嶮巖。穿松入蒙密。盤盤路忽高。十步三憩息。巖深谷虛牝。澗瀉泉噴激。經過老人峯。僂僂似迎客。峨峨陟橫雲。境界頓開闢。沿緣天都趾。仰睇蓮花萼。崖裂容一人。磴仄礙雙屐。扶掖憑山僧。駮蛩勢難雋。尻高首偏下。穿洞行匍匐。入井復出井。牽綆用全力。支木接斷橋。梯空上危壁。到頂地平坦。舊締化人域。千峯總圍抱。一氣周羈屨。造化理所無。到者人方識。辛苦苟未經。奇快何由得。彌勒許同龕。留此桑下迹。

天都峯

黃山天下奇。天都峯之特。絕地九百仞。陡如下斧劈。勢疑塞高空。體許鎮地脉。無心拔衆上。衆自莫敢敵。通體斷寸膚。萬石怒分坼。蚪枝蟠千年。蒼蘚積五色。石室開曠朗。甘泉流罅隙。或云仙人都。軒轅此游息。浮邱與容成。飛行無留迹。斯理果不誣。長生歸有德。胡爲學仙人。空聞鍊金石。

下百步雲梯過華溝穿鯨魚洞作

山轉路滅沒。險逾川中棧。斗然遇雲崖。直下足難踐。已累百步梯。課數九折坂。探奇志勇猛。前進不敢嬾。

氣銳力副之。崎嶇亦平坦。迴合望欲迷。凹凸勢莫鏖。行過蓮花溝。一線蛇蜿蜒。是日雲烟凝。四望失巉巖。策恐支虛沙。足防滑蒼蘚。高步躋危岡。恠偉忽在眼。有境窺門垣。無底入甌甌。呀呷疑吞人。僕行敢驕蹇。漸穿巨鯨腹。神定體幾瘡。飛鳥斷蹤跡。樵者見亦罕。行當逢容成。丹臺路匪遠。過此爲煉丹臺

登獅子峯望石笏缸

奇巖搏象形。雄踞高隱嶙。發興登其巔。餘勇賈未窘。後顧氣混茫。前瞻境虛牝。到眼驚喜并。荒幻見石笏。刺天攢千戟。迸地出萬菌。破碎互相糅。逼迤遞徂引。覩此靈奇質。衆類覺竄蠢。物象隨人名。俚俗半堪哂。鬼工險莫加。天匠巧欲盡。而胡六六峯。轉使嘉名隱。跡高人莫知。箕穎樂肥遯。維時罡風來。壑谷吼聲殷。愜心願少延。佇足防未穩。下阪屢迴颺。抗手情豈忍。

憩雲外峯趾度數嶺至皮篷以杉皮爲篷

我從雲中來。又尋雲外路。稍稍憩雲根。盤盤跼微步。黯黯穿荒榛。喧喧聞瀑布。山花媚游人。徑仄不暇顧。少焉逢坦夷。短筇且停駐。迴瞻峯頭雲。是我經行處。澗泉趨正絕。涉水濕芒屨。向來午聲鐘。星星空際度。撥雲問香林。葱鬱娑羅樹。山僧松圓孫。耕厓係程孟陽後人猶餘詩人趣。相遇不言禪。默默得靜悟。前行逐孤雲。更向巉巖去。

度萬年寺後嶺穿林涉澗緣岡踰嶺二十餘里至石梁

出雲復入雲。度嶺還上嶺。遙山千圍合。環抱下疑井。跼步恥後怯。鼓勇赴前猛。涉澗流方激。穿林光欲曛。是時秋氣高。萬樹微霜凝。丹砂間點漆。錯雜類文錦。游目奇已過。醉心趣旋領。輕身降平陂。橫從辨畦町。覓徑得荒庵。萬松庵叩門乞苦茗。迴憶攀陟餘。險夷變俄頃。前聞輕雷聲。殷殷路修永。行將度石梁。漸入仙人境。

石梁觀瀑

巨靈用全力。兩崖忽分斷。放出三白龍。天矯互鬪戰。莫窮水之源。直下急於箭。巨石不容水。水怒力逾悍。水石兩相爭。倒躍勢撇漩。如傾萬斛珠。噴灑濺崖岸。匯合赴一門。迅疾激雷電。俯看奔驛馬。仰睇掛匹練。久坐心骨寒。乍驚耳目眩。石梁跨穹窿。劍脊險逾棧。猿鳥亦回蹤。客子敢輕竄。過此逢仙眞。堪使凡骨換。雲裳許裁服。芝草當餐飯。津逮有何人。渺焉悵雲漢。

瓊臺望雙闕

山形如缺瓜。峨峨倚天半。插根清冷淵。陡削天匠鏟。欲上無梯級。鳥路懸一線。行人緣線升。有足不敢健。猿挂憑攀藤。蝸旋疑陟棧。終焉上層巔。攬奇遂初願。兩峯劃然開。雙闕峙對面。宛如龍門鑿。亦似伊闕斷。放眼千青螺。重重褰峭蒨。此中列仙人。蹤跡多變幻。寸心果精堅。鶴駕行可見。何處天姥峯。夢魂餘眷戀。

過金地嶺記所遇

層巒千迴折。陡下忽平坦。洄洄松根泉。蒼蒼坡間蘚。藉蘚挹泉流。酌取冷然善。何來一老僧。龐眉手自撚。問僧年幾何。行將三大衍。年百四十示我養生方。無爲順仰俛。忘身並忘心。數自莫能管。大藥在偶逢。蒼朮宵龜犬。服之屏營爲。亦足壯關鍵。熊經與鳥巾。古語術空緬。最下鍊金石。伐性適自殄。語罷超然行。忽近旋忽遠。我欲往求之。雲路迷深淺。

黃山松歌

爲翁霽堂作

古盎倏見盤。蚪龍鱗甲剝。落蒼苔封。蟻枝偃伏三尺許。豈是峨帽頂上萬年不長孤生松。問松托根來何從。乃在黃山六六之奇峯。黃山山高接霄漢。古松連蜷挂巖畔。怒裂石罅斷土膏。日月光華潤枝榦。工人善鎚鑿。長繩繫其軀。下絕俯絕澗。萬丈懸空廡。磊砢山骨巧。斲破一卷怪石連根株。遠從洞府最深處。千里移置幽人廬。空堂時有烟靄起。天都雲氣髣髴來庭隅。我對黃山松。想象黃山巔。浮邱與容成。雲際時往還。安得身騎白鹿蒼崖間。松肪食罷體輕舉。抗手羣峯迎列仙。

張鐵橋畫鷹

鐵橋道人性疾惡。慣寫蒼鷹露奇狀。金眸閃爍爪拳鐵。猛氣稜稜出紙上。空堂子立形軒然。百鳥驚飛不敢颺。陰山九月天雨雪。林木槎枒凍欲折。此時翻空入雲去。萬里高大灑毛血。胡爲歛翼棲枯枝。掉頸獨刷毛羽奇。從知畫師有深意。要令鷲鳥藏霜威。草間狐兔不足擊。健翮且漫橫空馳。君不見鶴鷗臯鳥多。

惡聲封狼破鏡時。從橫會須使汝食其肉。一洗宇宙歸澄清。坐看麒麟鸞鳳來明廷。

濟南雙忠祠

祀巡按御史長洲宋公歷下知縣韓公

大軍向南下。屯聚攻危城。雲梯攀躡爭先登。陣雲壓城城欲崩。御史率縣令。奮義抗強敵。殺馬食民民不忍。食裹瘡吮血。列防衛。援絕兵殘勢危急。是時日色無晶光。天地黯慘飛嚴霜。御史登城望闕拜。稱臣萬死無以報。陛下。一身誓與城俱亡。須臾城隅陷。被執志不屈。大聲呵叱如雷霆。面受刀傷。瀆股血。冲天烈燄。骸幣銷。原軫歸元。竟空說。兩公同日死。騎箕游昊穹。握拳透爪追英風。邦人立廟崇雙忠。神之來兮雲旗紅。嗚呼千秋享祀歷城下。以媿爲人臣而懷二心者。

閱三朝要典

熹廟御極。頽乾綱。疎遠保傅。親貂璫。茄花委鬼。互蚪結。薰天勢燄。何披猖。守原之問。史貶斥。況令婦寺。紊朝常。顧命老臣。半誅戮。朝衣血裹。投圍牆。清流白馬。禍更慘。一網盡矣。空巖廊。顛倒是非。著穢史。手翻三案詞。俯張詞。云挺擊陷國戚。追論可灼。誣先皇。移宮噦鸞肆。迫脅康妃。八妹奔蒼黃。更云筆削。繼孔聖。大書時書。明壬章。永爲人臣不忠戒。冠以御製文。煌煌黨與。秉筆亂忠佞。顧乘謙黃立極馮銓等 霾閉日月。無精光。同文館獄書黨籍。元祐君子。遭摧戕。二蔡二惇。恣兒戲。竟使二帝幽窮荒。此書千古同繆戾。力鉏忠耿扶姦彊。從來事往有定論。青蠅白璧終顯彰。刑餘死骨斲身後。正士祀典修烝嘗。所惜國本旣剝喪。再傳宗社

旋淪亡。小人勿用著聖訓。承家開國須周防。

鬼車

夜寒慘澹陰風呼。長天咿嚶疑訓狐。乍東乍西無定響。條斷條續行空虛。一聲初起衆聲應。似有萬鬼同悲歎。家人聞聲滅燈火。掩耳且勿驚童叢。蠻奴拍手嗾犬吠。羣犬狂叫奔街衢。或云妖鳥鬼部領。滿車載鬼雲端趨。車中鬼眼運鬼手。下瞰雞鶩殘其軀。或云此物最荒恠。兩翼十首形容殊。當年天狗斷一首。至今頸血猶模糊。淋漓一滴濺華屋。高門大宅應焚如。世間無物比陰毒。但所過處思驅除。吾生疾惡性最猛。擬抽弩矢彎雕弧。寒雲漫天暗如漆。何從覓影行誅鉏。夜深飛鳴勢轉盛。欲挾鬼族游清都。妖孽莫漫矜得意。東方會見升金烏。

客談燒山事甚詳詩以紀之

叢山合沓藏於菟。目睽舌磔常負隅。封狼纒綸連元狐。醜類朋比甘爲奴。食人白骨堆霜顛。下及麋鹿牛羊豬。佞魂蚩蚩効前驅。獵人蹶張墮雕弧。時當獵月風割膚。蕭蕭苦竹鳴黃蘆。四山草木僵不蘇。壯夫憤激忘其軀。火攻巢穴良可夫。始焉數點疑火珠。乍隱乍現光模糊。忽看烈焰漫空虛。炎炎照耀千里餘。林神社鬼來獻諛。返風滅火大雨濡。山君咆哮走郊墟。血人於牙肆吞屠。上帝赫怒行天誅。祝融經天色純朱。彤旛赤纛翻絳旗。火龍蜿蜒火馬俱。巖焦谷爛驚斯須。榛莽灌櫟遭焚如。山精木魅潛逃逋。炮燔猛獸

燔厥徒存者竄伏黨與孤兒童伸手編其鬚往時豸獠安在乎開闢險徑爲坦塗遠近寧貼無驚呼除妖降祥瑞則符麒麟騶虞世豈無嗚呼麒麟騶虞世豈無

趙忠毅公

名南星

鐵如意歌

爲蔣半關賦

蔣侯購得鐵如意銀絲鏤飾存款識額圖太極八卦形背列天垣斗星位銘辭無多語詰屈廉而不齷君子器詞銘流傳知自忠毅公年月日與姓名備維公生值桓靈朝婦寺秉政同宣驕紛紜鉤黨禍正慘孟博繫獄訴咎繇城狐社鼠不易去悲歌擊節心憂焦上方請劍空有志唾壺敲缺真無聊賢臣從古一網盡遣禦魑魅投邊郊邊草荒荒斷行跡邊風蕭條邊月白尙書振臂忽起舞手持故物還拂拭一揮天地欲低昂想見鬚髯立如戟賜環無詔來邊庭萬里忠魂歸不得陵谷變換廟鼎遷尙書手澤今依然光彩爛爛照四筵鬼膽震懼那敢前珊瑚二尺不足擊指揮并勿談枯禪蔣侯蔣侯知爾所寶在人不在物要令忠義之氣垂千年

蔡將軍歌

名人龍吳縣人天啓壬戌進士仕潯州守備遇獠民亂力戰死子至中召死士入藤峽俘其魁縱火焚之藤峽平詔贈人龍游擊將軍

蔡侯人世飛將軍身長九尺勇絕倫左射右射開六鈞上馬下馬舉百斤生兒更似李亞子一門驍勇非

常人時逢。猿獠反藤峽。草木爲屋山爲門。猿獠出沒肆攫奪。青天白日誅平民。將軍奉詔入重地。膽大直欲通於身。十萬十決勢莫敵。生鶻橫入烏鴉羣。峽深路險援兵絕。漫山賊衆如蜂屯。將軍願死不願生。呼聲動天雙目瞋。伏劍血流體僵立。義憤上訴天爲昏。郎君慟哭召死士。拔刀誓衆風雷奔。前驅遇賊氣欲吞。殺賊不異屠雞豚。深入巢穴縛渠魁。揮刃刳脰何紛紛。餘黨拘繫夾碓斧。一火木石俱遭焚。掃清藤峽只旦夕。報主差足酬先臣。當年平播砣朝棟。史書劉綖昭殊勳。楊應龍反播州將軍劉綖討平之朝棟應龍子也將軍父子闕紀錄。雖經贈爵終沈淪。敢告右史秉特筆。臣忠子孝光乾坤。

魏傅巖畫墨竹歌

鄙南公子髯如戟。眼中無物氣無敵。醉餘揮筆掃竹枝。倏忽琅玕勢千尺。一叢新長成籀龍。亭亭直上捎青空。一叢礪畔忽斜出。寒梢俯地烟濛濛。一叢偃蹇穿石罅。蕭疎鳳尾搖清風。兩枝枯幹頭且童。勁節中斷如截葱。其後崇岡惟石各異態。千梢萬蘂隨橫從。乃知成竹在胸次。元氣入手人無功。自言北地寒威酷。只有黃沙少修竹。平生愛竹如性命。借此豪端洗塵俗。坡圖涼氣來滿堂。觀者動色神蒼茫。恍惚風雨黃陵鷓鴣語。令人咫尺游瀟湘。

贈王耘渠丈兼道別

昔年相遇秦淮樓。樓頭買醉澆牢愁。今年秦淮復相見。落拓依然縱談讌。髭鬚白盡兩頰紅。興高奪稍羣

英中酒酣耳熱肝膽露。豪情右盼還左顧。先生少主文章盟。使筆直使秋空鷹。跨海欲掣尾鯨。意氣魁壘山嶽傾。豫章干雲世誰用。龍泉貫斗光難平。一官如泥等閒棄。鳳鳥肯逐羣雞鳴。杜陵老去依幕府。醉後登牀傲嚴武。青鞵萬里歸去來。滿徑蓬蒿守環堵。回空那及猗氏盈。名塞滄瀛竟何補。唯餘愛才一寸心。結交忘年到爾汝。酒間誦我新詩篇。爲言逸興凌雲烟。低昂奮袖時起舞。淮樓四座停歌筵。我生厄塞殊自憐。途窮慟哭年復年。一人知己可不恨。何況推獎逢高賢。爲雲爲龍未可定。東西南北安得相周旋。春花落盡辭鄉久。歸心觸撥濃於酒。東風知我重離羣。當筵吹折秦淮柳。前途彼此兩茫茫。天邊明月分清光。遙憶君家著書處。金壇山下松花香。

吳小仙雙松醉仙圖

天半雲雷卷中起。龍吟虎吼空堂裏。誰掃雙松勢千尺。吳生小仙醉時墨。几席陰森失豪素。上拂元冥真宰怒。林間中酒一丈人。頽然高臥忘其身。松風滿壑吹不醒。一臥直欲三千春。何時起來松下更飲酒。笑問乾坤無恙否。

集黃尊古草堂觀山水圖作歌時黃將游武夷

五年相別今相見。綠酒青燈夜開燕。主人酒酣示我新畫圖。壁間高挂鷺溪絹。江流一瀉水。山岳數蟻邱。咫尺萬餘里。浩氣凌滄洲。空堂嵐氣出復沒。耳邊似聞熊羆叫。嘯清猿愁。忽然川迴山斷勢平遠。清沓淺

洛林塘幽陰晴明晦遞變態粉墨真許追冥搜坐間劉廣文湘洲嗟咨歎欲絕亦有王文學舒學睇眠分豪末

我時把酒還披衿意興能窮造物窟我謂主人工畫如工文筆未落時先凝神主人謂我作文如作畫要使筆力回千鈞主賓相視復相笑此中三昧外人那得探其真我不能畫解畫理如君畫師辭客兼一身酒闌脫帽意氣豪自言趨捷追猿獍遍歷五岳到絕域采玉河畔嘗游遨武夷九曲未沿溯使我夢寐心煩勞今日有酒且痛飲明朝茫茫寒浪橫輕舸三十六峯試芒屨歸來皴染開邱壑高堂置酒邀我看神往仙巖聽仙樂水樂亦名仙樂

宋徽宗鸚鵡圖

徽廟畫手天所縱花卉翎毛無伯仲時危點筆太清樓萬里江山供戲弄至今流傳鸚鵡圖御押垂垂挂當空松枝纖末起長風羽族開張勢飛動一鳥鬪敗力已殫翻身下墜轉向天一鳥憑空奮拳擊忽盪其腦難回旋一鳥旁矚欲相助不許雄猛摧衰殘從知渲染有至理扶持合在危與顛如何助金滅耶律欺人孤寡前盟寒燕雲雖復兵禍結如以鳥雀隨鷹鷂靖康之恥繼懷愍萬里龍沙夢初醒鸚鵡之鴿之公辱之稠宋佶桓略相等畫圖早已露先幾誰向幾先發深省馬角難從塞外生有人將畫寄朝廷朱弁在沙漢寄六帝

御容及徽宗御畫歸披圖似帶冰霜氣可是來從五國城

戴文進看碑圖

魏武未嘗渡江。看碑會稽之上虞。其事莫須有也。因已載雜記中。故詩亦從俗。

三百年後碑當墮。當墮不墮逢王叵。此言似諺還似謠。不解解之無不可。曹公看碑事有無。錢唐戴進

名寫出江上看碑圖。浩浩江流勢欲走。撐空巖窟昂其首。碑陰仰看者爲誰。面目生動軒須眉。一人緋袍

一官綠。大帶撻尾腰間垂。前者解頤若有得。後者沈吟良苦思。從人奚官好結束。罽韉短後羌兒服。三鬢

翦出桃花駒。嚙尾嘶風與翹足。此文傳是蔡邕讚。敏絕楊修識黃絹。老瞞心忌伏兵機。就烹偏在能鳴雁。

聰明受患今古同。畫師微意傳豪翰。吁嗟乎。才子淪則戕其身。范史云修雖才子淪我淳則愛深砥憤空傷神。何如投

江抱屍知有父。碑雖磨滅心常存。

覺生寺大鐘歌

牙角鬚鬚蟠老龍。色相古黝兼青紅。旋蟲躩踞列衆獸。旁羅鬼漢諸姦凶。重逾萬石更萬石。漢高廟器將毋同。金泥傳自明永樂。遷都北地仍燕封。廟社旣建鼎呂定。次及梵宇成華鐘。道衍監造役鳧氏。數倍仙掌鎔金銅。彌陀華嚴蒼全部。沈學士度筆藏稜鋒。懸之傑閣入雲表。六僧舉杵齊撞舂。當年燕飛啄孺子。南兵百萬爲沙蟲。抄連瓜蔓凝碧血。禍延赤族鋤羣忠。妄憑佛力消黑業。趨趨聲徹大門重。恆河沙數至無算。火燄滅熄刀輪空。從來王者貴不殺。豈緣象教尊禪宗。神孫更創萬壽寺。大璫勢力移其中。熹宗以後委諸地。誰臥沙草雲難從。熙朝郭西建寶刹。重樓複殿棟宇隆。錫名覺生代木鐸。警醒憤憤憐愚蒙。鐘

從廢寺徒新構。萬牛迴首驅徒工。鯨鑿鼉鳴整課誦。響達長樂隨天風。我來郊原訪林麓。一徑委折趨靈宮。諦視古蹟決雙背。偉觀一豁平生胸。因思雞鳴埭西北。巨鐘蝕土眠蒿蓬。摩挲永樂二年鑄。兩地轉福邀天功。一鐘淪棄聲久啞。一鐘叩擊驚頑聳。蒲牢亦等遇不遇。何況士類分雌雄。獨惜大鏞置佛地。虛無祇伴金仙蹤。今皇崇道講經學。鴻都觀禮來耆童。始終條理藉法物。曷不重鑄歸辟雍。於倫於樂頌聖德。相和鼙鼓聲逢逢。

夏日述感六首

旱潦頻仍後。三吳風景殊。民貧輕揖讓。力盡畏征輸。瘠土農皆散。平田麥已蕪。吾生慙俯仰。觸目總艱虞。糠粃聊充腹。遷延及草根。長官齊設粥。黎庶最銜恩。奔走誰家子。哀鳴到處村。吏胥休蠹食。國法至公存。癘疫連三月。災荒歷二年。空村多鬼語。茅屋少炊烟。乞命崇淫祀。招魂赴野山。四方俱掩骼。感此意茫然。三尺森然在。無良尙有徒。探丸分黑白。劫客隱萑苻。聖主時蠲賦。賢臣欲繪圖。爾曹須向善。回首免刑誅。身世空搔首。茫茫總不堪。多金高甲第。無食賤丁男。救弊須良策。哀時敢戲談。傳聞鴻雁羽。肅肅去淮南。

時淮民多
就食四方

五行多錯迕。恆雨又恆暘。乍看修堤急。旋聞屨水忙。憂時勞丙吉。占策問京房。玉燭資調燮。還期格昊蒼。

今古含冤地。孤臣舊死忠。已成三字獄。竟廢十年功。匡復憑諸將。沉淪念故宮。六陵殘毀後。泉壤泣英雄。大將迴戈日。中原陷敵時。朝廷輸幣帛。父老望威儀。天意竟如此。神靈儼在茲。千秋見孤憤。認取向南枝。

漫興

見說岐山鳳。和鳴及盛時。羊腸千折險。虎口一生危。直節風霜鍊。清名草木知。重華真至聖。款款許陬詞。荃蕙成蕭艾。芳馨忽變更。申申詈正則。下下考陽城。擊斷憑卿貳。寬仁仰聖明。猶存三代直。野老有公評。

有感

天上風雷過。人間氣象新。狐羣竟濡尾。象齒足焚身。有媿文章伯。誰爲社稷臣。爾曹堪一笑。回首等埃塵。

夜發

古壘戍旗收。烟中起棹謳。風霜欺短褐。星漢入歸舟。鐙動江樓影。蛩吟野岸秋。往來常此路。欲白旅人頭。

晚秋雜興

亢陽連四月。凶歲歷三年。恭遇成湯世。難回覆閔天。西風動茅屋。荒草滿原田。黃雀虛求食。飛鳴亦可憐。蓬戶炊常斷。朱門廩亦空。已判離骨肉。無處嚮兒童。井邑征求裏。牛羊涕淚中。誰能師鄭監。圖繒達深宮。北闕須才峻。山林士氣增。蒐羅到麻革。曲直中鈎繩。周變逃名苦。孫宏對策能。虛聲應共雪。莫負爾書徵。

送王蘭泉會試

之子魁南國。邦人願枕經。此行冰雪路。歷盡短長亭。水湧黃流濁。山橫岱嶽青。廣川三策在。望爾對明廷。

月夜渡江

萬里金波照眼明。布帆十幅破空行。微茫欲沒三山影。浩蕩還流六代聲。水底魚龍驚靜夜。天邊牛斗轉深更。長風瞬息過京口。楚尾吳頭無限情。

吳山懷古

大觀亭榭俯丹梯。千尺峯巔一杖藜。孤嶺界分城內外。曲江劃破浙東西。潮頭如馬當空立。山勢猶龍入望低。吳越興亡總陳迹。伍胥英爽震羣黎。

三千強弩捍錢唐。賜券分茅異姓王。五季代傳唐土地。百年廟受宋蒸嘗。林柯曾寵將軍號。溪谷還霑錦繡光。所惜擁兵名義正。未從羅隱伐朱梁。

夫差曾報闔閭仇。宋室南遷事竟休。和議有人增歲幣。偏安無詔復神州。中朝已灑蓂宏血。塞北空聞杜宇愁。莫上鳳凰山頂望。冬青誰認舊陵邱。

襄樊失守勢飄搖。半壁河山付北朝。餘燼但依新會水。無情深恨浙江潮。君臣俘馘歸沙漠。宮殿荒涼遍黍苗。唯有青山終古在。夕陽回首客魂消。

舊邊詩九首

我國家內外一統。萬方寧謐。揆文奮武。無遠弗届矣。闕明史見季年屯政不修。邊事日壞。民生凋敝。因作舊邊九首。述往事益以慶太平也。

憑關俯海舊邊疆。一線迢遙指薊方。外國梯航通貢賦。高麗貢道中邦門戶重隄防。渾河冰合勞飛輓。長白霜清冷戰場。誰識天心正東眷。鬱葱王氣在遼陽。

右遼東

漁陽重地衛幽燕。倒馬飛狐關嶺連。自徙寧藩無外鎮。遂令古北急防邊。初以大寧爲外邊。永樂間寧王內徙。而薊始重內邊矣。牧人度阪時驅馬。名將當關日控弦。不有築城楊御史。恐教羽檄達甘泉。都御史楊博修邊牆。設防禦。敵患少却。

右薊鎮

大寧棄後守開平。又見蒼黃失重城。土木變後。開平與和亦不能守。正憶文皇犂絕塞。翻憐英廟誤親征。風旗蔽野晨挑戰。雪帳連山夜斫營。設險正須防上谷。安邊總爲翼神京。

右宣府

代北燒荒草木空。防秋從古重雲中。二關形勝環寧武。三面烽烟繞大同。俺荅內侵邊柝苦。吉囊遠寇陣雲紅。行間欲問平戎策。魏尚當年有戰功。

右大同

蘇武城頭落日低。明妃冢畔暮雲迷。重臣逐寇籌方略。都御史何喬新逐寇於灰溝設善後六策遺孽操戈釀禍梯。吉疲馬帶
槍馳代北。土兵枋腹守山西。不聞仁愿防邊日。張仁愿歲歲荒原動鼓鼙。

右山西

榆林遠過皋狼鎮。洪武新兵設備多。末季無人恢套口。中朝有恨棄黃河。正統時所棄三更急雪還傳箭。萬竈
飢軍且枕戈。能向延綏勤挽粟。馬騰士飽定如何。

右榆林

賀蘭層嶂入云霄。五衛蒼茫殺氣遙。冰結黃河飛敵騎。風高紅寺落盤雕。牛羊野老常驅隴。弓箭遊軍各
在腰。共識靈州沃衍地。蒿萊滿目莽蕭條。

右寧夏

鎮連八郡咽喉地。戍鼓邊笳晝夜聞。鞏鳳徵兵須轉餉。每歲調臨鞏四鳳兵防守芻根在本軍額內支給非策也甘肅失勢莫移軍。甘

蘭軍獨駐花馬池亦非策之上者霜嚴萬堡停樵爨。雲暗千山亂馬羣。倚劍儻能籌勝算。獨教虞詡立殊勳。詡守階州關

右固原

平羌斥堠界山丹。白草黃沙沒馬鞍。萬里先兵西水弱。三軍鳴劍黑風寒。永寧地險周防急。哈密鞭長戍

羌人懼服

守難欲慰廟堂勤遠意留屯邊境起凋殘

右甘肅

題王蘭泉三泖漁莊圖

魚扈連延接雁汀伊人新勒草堂銘
三重湖泛天邊白九點螺橫鳥外青
菰米飯炊香淡淡水仙操動韻泠泠
往來時有樵夫迹問荅微言愜性靈

蘭臺

蘭臺空署赴輪臺詔遣從軍萬里來
食祿自應持正論至尊終是重良才
不教天遠投魍魅更許兵屯闢草萊
想象高秋望京國一時回首白龍堆

送杭堇浦太史

殿頭磊落吐鴻辭文采何嘗憚作犧
王吉上書明聖主劉蕡對策治平時
鄰翁旣雨談墻築新婦初婚議竈炊
歸去西湖理場圃青青還蕝向陽葵

南鎮

周禮會稽推首望大神作鎮鎮南方
位同炎宿垂朱鳥德秉離明祀赤璋
寢殿闕宮常肅穆雲車風馬每騰驤
吾皇報饗勤咸秩總爲蒼生祝降康

寄周迂村

移家自得天隨友。尤飢鶴居皮市迂村自甫里移家居臨頓里怡符皮陸棲隱地偕隱相攜孺仲妻。向共閒吟追汐社。近聞直釣坐清溪。行藏齒冷乘軒鶴。文采心驚斷尾雞。何日隨君還故業。一蓑烟雨課畊犁。

北垞

白云生高原。忽渡南湖去。遙知隔溪人。應與雲相遇。

曉起

疎星淡已無。纖月猶木杪。天末明霞生。烟中散羣鳥。

雨泊話舊

寒雨蕭蕭夜打篷。篷窻相對一燈紅。十年無限存亡感。并入空江話雨中。

過許州

到處陂塘泱泱流。垂楊百里罨平疇。行人便覺須眉綠。一路蟬聲過許州。

湖海詩傳卷九

程景伊

字聘三。號莘田。武進人。乾隆四年進士。官至東閣大學士。諡文恭。有雲塘詩鈔。

潘謁山房詩話。文恭贈於詞章。兼精吏贖。初不以道學名。而濂洛五子之教。素所服膺。故肫誠樸實。頗知大體。其見於詩者。冲和真澹。雖非風騷。正則不愧有德之言。乾隆庚子。余爲都察院副都御史。元旦朝賀。都御史侍直西階。大學直東階。駕出當先。在中和殿行禮。余往邀之。會是夕大雪。公來早。中寒已不能語。按歸邸舍。未幾而歿。

送同年馮若渠客遊平陽

驪駒已駕苦難攀。襍被攜囊赴晉關。楚裏白雲龍尾闕。馬前秋色雁門山。驚才定卜三都貴。樂志寧愁六月閒。只悵從遊違舊雨。何時樽酒待君還。

題同年許紅橋春宴圖卽送之任粵西

薄寒風物正宜人。舊雨過從趁早春。每到醉鄉稱小戶。恰于花國得閒身。酒旗星聚人千里。燈樹光融月一輪。排日朋簪渾未厭。離亭怕見柳條新。六街燈火曠長隄。接軫聯鑣鳳闕西。選石名園全醉月。攀花曲徑一登梯。春回上苑鶯喧早。人去灘江草綠齊。促席追歡能幾日。不堪回首鷓鴣啼。

中秋前五日劉繩菴廷尉移寓奉東二律寓中有小閣可眺西山因卽以西山二字爲韻

一枝穩占鳳城西。掃徑誅茅位置齊。借綠短牆雲作屋。攀花曲磴石爲梯。管絃近接扶風帳。書卷長親太

乙藜。茶臼筆床隨處好。當頭明月待新題。

移來家具菊初斑。籬落秋深靜掩關。片石剉苔新作沼。小樓拄笏飽看山。退朝詩思爭花發。近市心情似

水閒。舊雨過從容剝啄。聯吟暇日好追攀。

裘曰修

字叔度。號諾皋。新建人。乾隆元年薦舉博學鴻詞。四年成進士。官至工部尙書。加太子少傅。諡文達。

蒲褐山房詩話。公神閒氣靜。明致自然。事無大小。談笑應之。雖盤根錯節。迎刃而解。每遇朝廷大議。論衆說紛紜。而談言微中。分肌劈理。如奏刀若然。如土委地。人人各達其意。以去。總督高君書麟。謂天仙化人。不可湊泊者也。公沒後。相傳爲燕子磯水神。後有家人遇之。拜視祠下云。若果在茲。願乞順風。以之東風。果作挂帆而去。故顧晴沙詩曰。爐香燭影曉猶紅。稽首陳情語未終。試看靈旂微颺。處春江已借一帆風。

恭讀御製土爾扈特歸順記書後

國家中外大一統。曩惟西事煩經營。兩朝撻伐未竟緒。皇帝睿斷功乃成。勝算在握要領得。如雷斯厲風斯行。乘機迅掃到回鶻。陽關以外無堅城。再讀御製歸順記。土爾扈特來投誠。前茲準夷梗化久。四衛拉特相支撐。我師當時定全部。獨此早竄偷其生。未曾遣使遠招致。亦不索取勞甲兵。幡然挈屬奉表至。彼

蓋邀聽心先傾。譬從地底見紅日。有不仰企非人情。試看稽首列萬帳。盡隸臣僕歸皇清。西陲全部此始結。更無別種防芽萌。上承付托述遺志。下慰蒼赤垂麻聲。倘非幾先具定識。安得臨事不震驚。大文細繹再三四。眼中事理昭然明。信哉至德感必應。昔者敵壘今編氓。提攜襁褓及婦子。不似昨日飢寒并。脫離羅刹入樂土。自此畜牧安昇平。渥巴錫汗知向背。鴛遷出谷茲爲榮。馬前纍纍復若若。乍習拜舞依龍旌。山莊宴賚盛典屢。丹青落筆騰光晶。鴻勳偉烈古未有。照耀天地環九瀛。豈知聖意益深遠。凜凜秦運猶持盈。

題桑菽甫五岳集

去年持節西域行。道邊恆華相逢迎。恩恩日馳三百里。那復酬對勞山靈。今年奉使出齊魯。岱宗天半空嶢嶢。中州中岳亦咫尺。烟雲寂寂巖畫扁。平生五岳入夢寐。輪蹄到處聊延停。其如可望不可卽。直等海上三山橫。向禽一語躬未踐。史冊已自垂高名。豈知遙遙數千載。有人誓不渝前盟。藉彼嶽欹磊落之面目。暢我高寒率筆之性情。客中投示紀游作。五岳一一足所經。芒屨幾緉昏嫁畢。快哉有志事竟成。學山至山果若此。我今相士不敢輕。手君詩卷待明發。回首猶望崧山青。

題陸包山仿王叔明高士聽泉圖

老龍夜吼濤聲起。近聽卻在松風裏。縱錚浙瀝和者誰。流泉一派清入耳。洞庭毋乃仙樂張。細叶宮商調。

角徵廣陵散絕經千年。兒女箏琶徒靡靡。幽人意態疇爲傳。披圖云是包山子。有元巨手數黃鶴。曠代高情工寫此。橫斜落紙遠逼真。毫芒底用求形似。莫言不見並不聞。有聲悟得無聲旨。萬籟俱息山空空。幾玉跳珠鳴不已。何當譜入無絃琴。志在高山在流水。

奉勅題江村草堂圖

應是白蘋洲上。居然黃葉村邊。鹿門有客招隱。蓮社無心結緣。乍可浮家泛宅。兼之鋤雨耕烟。臣亦江湖舊隱。畫圖重與周旋。

仙霞嶺

戍樓曉旆露初乾。一徑紆盤客意安。壁壘久忘當日險。功名仰愧昔人難。李文襄扼耿賊於此青連翠鳳排林起。白走銀龍瀉澗寒。形勢東南分控帶。眼中甌越下方看。

次韻送張寶臣少宗伯予告歸里

一笑翩然喜宦成。麥秋時節暑風清。朝廷屢緩還山勅。老輩難勝揖別情。調鼎有人留坐論。抽簪寧礙獨歸耕。某邱某水欣無恙。舊社雞豚約共迎。

儲麟趾

字梅夫。荆溪人。乾隆四年進士。官至宗人府府丞。

蒲褐山房詩話宗丞居諫院。仇直敢言。由是爲聖明所眷。海歷京卿。嘗遣祭少昊陵。奏唐虞五臣皆有專祠。惟契獨無。請立廟以補前缺。奉旨令蒲毫二州立廟。永垂祀典。既歸。嘗主書院講席。年八十餘而終。

張公洞

石洞破山腹。驚雷飛玉龍。採藥一仙去。至今呼張公。魚梁噴珠沫。靈響疑笙鏞。初猶索火照。徐乃天戶通。振衣上層磴。雲影盪塵胸。奇石蹲獅虎。山花無春冬。出洞已巔頂。指點數諸峯。歸路躡鳥道。彷彿疑仙蹤。

西溪卽事

溪上露華白。舟行破清曉。林端隱缺月。烟際出叢篠。渡筏漾碧沙。漁罾倚紅蓼。逢僧問前路。舉步疾飛鳥。

李繩

字勉伯。長洲人。乾隆六年舉人。官平樂知縣。有葑田吟稿。

由青田至錦水塘

灘響非一名。峰疊更千狀。乍疑前溪阻。忽訝後嶺障。牽纜泝委紆。蕩楫信容漾。清月一以對。萬象皆澄曠。巉石印虎跡。叢條淒猿唱。閱日遇轉新。撫景意彌愴。鄉思忽宵增。清謳聆越榜。

遊靈峰寺羅漢洞至一線天

仙洞拔地起。怪巧天匠鏤。披莽穿仄徑。尋異得幻觀。蓮瓣兩岸裂。佛掌一罅漏。上梯井牽綆。下坂簷墜露。

同行挾山僧。駢歷互牽就。倒退尻高响。直進趾壓首。隨步凜戰兢。履險無蹶仆。入洞轉曠如。板屋成結構。石樞挂珠簾。泉乳孕巖竇。僧牀狙共眠。佛髻蘚爭繡。枯坐了聲聞。歸雲翳寒岫。

登城望西山殘雪

寒原動晴暉。城闌暫流憩。遙峯雪未消。積素明新霽。白雲映層嵐。清光互虧蔽。藹藹烟樹疎。陰陰返景麗。岩翠淡欲流。涼氣攬衣袂。一塔指吳宮。雲林望迢遞。

憩靈異亭眺東谷諸峯

下嶺谷轉深。奇秀衆峰窟。聞鐘引前路。松徑入蒙密。溪迴得幽亭。淪茗偶停歇。過耳喧琤淙。到眼驚峯嶽。巧疑鬼工鏤。怪訝坤軸裂。摩空劍戟攢。逆地芝菌出。鼙鼓叩逢逢。斑管抽乙乙。俱峯名肖形隨稱名。雅俗難盡述。是時微雨過。巾袖涼風拂。石泉和松籟。仙樂奏竽瑟。步移幻態增。目眩詭景失。諸天坐空虛。境寂塵抱豁。白雲解留人。幽禽叫林越。

遊東谷一路登靈巖尋龍泉水

雲滃衆峰浮。雲淨疊嶂曉。竟日白雲中。泉鳴雲路杳。丹花綴幽崖。翠壁敷寒篠。過目接新賞。引步紆遐討。入寺剩頽垣。苔堦淨如埽。旗鼓峯名卓東西。屏障削天表。捫蘿追層巔。峰峰盡可了。虬幹走巉岩。寒湫俯深窅。何年蟄毒龍。雲黑露鱗瓜。拂蘚尋留題。道人句可考。境靜契無生。塵網脫宜早。隔塢度疎鐘。纖月挂林

杪。

山行過古寺飯訖遇雨觀山田插蒔感而有作

山行綠澗深。危步踏澗石。入谷聞午鐘。鐘遙嶺轉隔。山僧導我前。野蔬手自摘。齋廚動炊烟。幽禽下窺客。濛濛濕雲流。千岩翠欲滴。庭陰潤松篁。嵐靄上几席。開軒面畦塍。涼風吹巾幘。油油動秧針。灑灑引泉脉。勤力冀有秋。敢咎山地瘠。芸人愧無成。忡忡感行役。去去攜孤筇。烟消亂峰碧。

過蘆溝橋

吹角戍樓寒。征塵上馬鞍。斷雲橫碣石。斜照冷桑乾。設險前朝事。悲歌此地看。故人燕市酒。相憶路漫漫。

天台道中

亂壑響春雷。山泉百道回。梯盤松路暗。崖削石門開。水碓雲中出。樵歌澗曲來。幾家殘雪住。籬落點疎梅。

河間懷古

兩津故道指茫茫。文物由來重此鄉。訓詁一家傳博士。山川終古屬賢王。黃沙夕捲河流合。白草秋枯野燒荒。何事田間還佩犢。問誰奏績繼循良。

舊渤海郡

周迂邨丈招集諸同人宴小漆園卽送周緝堂還吳江吳南勤之華亭

雲龍追逐久忘年。接軫還看二妙聯。松石尙留名士蹟。簪裾重卜故人筵。池光到榻涵疎雨。花氣侵塔雜

暮烟珍重明朝分手去。一樽款款話燈前。
嚶嚶鳴鳥恨離羣。折柳歌殘酒易醺。十子風騷懷北郭。三江烟月望南雲。疎鐘遠樹溪堂隔。細雨春帆驛路分。預擬崦西梅信到。探幽重爲待夫君。

涿州早發

三輔藩垣此一方。切雲雉堞倚巖疆。角聲千帳飄殘月。客夢孤城入早霜。經術古文傳涿鹿。英雄土俗話樓桑。時清休吊岐溝事。白草蕭蕭戍壘荒。

姜恭壽

字靜宰。如皋人。編修任修子。乾隆六年舉人。有皋原集。

蒲褐山房詩話。靜宰自號香巖居士。能詩善畫。工篆隸。癸酉從雷翠庭副憲視學江蘇。時予尙爲諸生。靜宰得所試詩賦。愛之。遂來定交。後五年復遇於都下。靜宰寫梅數枝。取姜白石疎影詞。篆書其上。以爲贈。嗣後不復見矣。聞其病亟。遺命以古玉一枚。華嚴經一部。殉葬。蓋矜奇之士也。

豆花

暮色下秋旻。蒼然生老圃。庚庚鹿眼離。紛紛豆花雨。豆花旣以白。豆莢亦成縷。晚飯臨涼風。秋實腴堪煮。上有青蟲縣。下有寒螿語。霜田落爲莢。小人良辛苦。

杜若

秋水不受染。芳杜搖孤翠。白雁下橫塘。照見相思字。天未懷夫君。日暮期不至。江南可采蘅。西風吹垂淚。別去可復論。露華易蕉萃。

渡江東歸

燕子磯邊九月天。鯉魚風送石城船。黃花又見歸來日。紅豆空裁寄遠篇。玉樹歌中陳後主。仙人掌上柳屯田。緘情合付長江水。江北江南盡惘然。

秋夜

餘焰耿頽垣。荒蕪滿庭戶。中有人未眠。蛩吟入秋雨。

題梅花

一枝璠藥倚春風。鶴去寒山夢已空。記得夜深林下過。月玲瓏又雪玲瓏。

申甫

字笏山江都人。乾隆元年薦舉博學鴻詞。六年舉人。官至左副都御史。有笏山詩鈔。

瀟湘山房詩話。笏山副憲以中書舍人直軍機。掌內制十餘年。代言起草。指事頌情。九重時嘉賞之。爲詩抒寫性情。羌無故定。白樂天。楊誠齋。查初白。其兔園冊子也。好句如行攀石磴。無人跡。靜聽流泉。冷客心。幾日閒。眼關竹戶。一番細雨。長秋花。寒歸木末。全無葉。暖人梅梢。漸有花。尚有晚香留紫菊。不妨小閨到黃楊。至今有吟諷者。歿後畢秋帆中丞爲選擇而梓之。凡四卷。

旅思

二月天涯旅思交。輕寒惻惻雪纔消。一庭芳草客惆悵。幾點杏花春寂寥。何處借風吹好夢。有時聽雨度清宵。自從江令魂銷後。縹緲雲山不可招。

送陳西樸南歸

草檄才華久擅名。倦遊難得是歸耕。胸中湖海豪猶在。鬢上星霜老欲成。枯柳暮烟鴉陣陣。西風殘雪雁程程。江南到日梅應放。與寄相思太瘦生。

桐川大兄南歸率賦小詩送別

釀泥深巷雨如絲。矮紙催題贈別時。欲去始憐相見晚。得歸何憾到家遲。掃除塵土三年夢。成就山居一段奇。更喜津門楊柳暗。扁舟渾似畫中移。

己卯重陽日同監試諸公明遠樓登高偶成七律一首

鳳城佳氣曉層層。高處涼生感忽增。霜葉老留前代樹。風簷閒憶十年燈。尙容我輩憑闌望。可惜無人挈榼登。轉羨陶然亭上客。葦花如雪興飛騰。

送姚二念茲之山右次陳句山前輩韻

山長新如得好官。夢餘休更惹愁端。才名不媿陳蕃榻。豪氣曾經貢禹冠。久住忽成千里別。強移聊借一枝安。草堂貨要隨時蓄。垂老依人畢竟難。

七月朔日籀石招同地山少宰小集山齋爲鴻博同年之會兩公各賦七律六章予亦和之書于籀石所畫歲寒三友圖後以誌一時盛事

山館涼生面面風何分賓主此情同故人海內今餘幾往事樽前話不窮各有姓名留薦牘儘多酬唱人詩筒衰年倍切齊年誼氣類相關要始終

接葉亭邊落葉寒紛紛送客出長安丙辰秋冬之間厲樊榭沈東甫沈幼牧迺耕石汪槐塘諸君同寓于接葉亭試畢先生出都同人咸于此餞別重來我只常

資進晚達君猶本分官未敢便爲徵士老不妨仍作布衣看風流畢竟推前輩早向雲霄刷羽翰少宰由書丙辰中式及庶常予與籀石並爲後進

下馬高車已在門少宰先至相逢一笑略寒溫兩公視我如兄弟三世論交到子孫肯以虛聲孤物望將何努

力蒼石恩他年各買扁舟去剪燭淮南盡處村

四十年光電影俱晚收或者在桑榆飛騰踏雪曾留爪老馬衝泥自識塗難得盤桓同躡屐卻煩羅列到行廚劈箋更做元人意松竹梅花共一圖

曾捷宗

字瑤圃贛縣人乾隆六年舉人官鄜州州判有瑤圃詩鈔

南浦曲

郎自居南浦。妾自住西澗。盈盈阻江水。澹蕩起長瀾。一解 欲採浦中花。凌波兩槳斜。單衫紅杏子。白袷罩輕紗。二解 邀郎入花浦。不知郎住處。人傳郎門前。雙雙烏桕樹。三解 漠漠春風吹。迢迢江水暮。問郎來不來。風濤那可涉。四解 入亦復苦愁。出亦復苦愁。相思隔南浦。明月照樓頭。五解

江行晚泊

川原迷水驛。旅泊嘆孤篷。永夜一杯酒。寒江半櫂風。燈昏知雪急。衾薄愛爐紅。回首鄉關遠。青山幾萬重。

江行

天闊雁聲遠。江寒沙渚明。孤帆何處泊。日暮晚烟平。

楊述曾

字二思。號企山。陽湖人。乾隆七年殿試第二人。及第。官侍講。卒。贈侍講學士。

蒲褐山房詩話。學士為內閣學士椿之子。博綜史傳。乾隆己卯冬。上修通鑑綱目輯覽。命學士及大興朱編修琦。武進蔣編修和寧。仁和張舍人霽。同余充纂修官。發凡起例。斷斷不少假。余輩常集其邸。家人善治庖。討論之暇。輒出飲饌。以恣燕衍。酒酣以往。諧譚四出。猶見先輩風流也。詩不多作。偶獲二章。亦駁駁入作者之室。

題陸乾日隸書千文。乾。日名。瑣。河南巡撫。陸朗夫燿之父。摹漢魏八分十數種。有石刻。

秦時王次仲。六書變體。創八分。梁初周散騎。羲之碎字編千文。羽人已化大鳥去。侍郎髣髴嗟如銀。迢遙應千載。源流一一區。河汾八分鴻。都石經後。元常準尾波。勢尤超羣。開元碑頌。僅具體。韓梁張史徒云云。

千文智永擅神妙。八百分散留江憤。吳興王孫所傳十七卷。俗書依仿價本尤紛紛。松陵陸子嗜古有奇癖。蟲形鳥跡遠欲窺。臯墳一九險塵作釜甲。三寸柔翰供鋤耘。京華旅食坐無事。閒窻素紙舒羅紋。割分篆隸綴管字。規撫曹蔡凌右軍。當其捉腕時。引而不發有如勁弩縣千斤。及其縱手快。盤空天矯有如鷲鳥摩秋雯。倏如長矛掃鋒鏑。突如巨石崩崖垠。屹如巍堂列柱礎。綿如遠岫霏烟雲。攬張如怒羣龍奮鱗爪。敷紛如綴百卉垂葩芬。或如淇園風動千竹葉。薤薤。或如湘流帆轉九折波。云云。纖濃各意態。直曲隨鋸鉞。含文復包質。強力還豐筋。書成應置國門外。摹觀紙價逾元纒。嗟予學奇觚。拙手空辛勤。華山岱嶽未經到。邵陽酸棗憑傳聞。元黃賸句兔園冊。凡將急就同斷斷。縮蛇螭蚓自嗤笑。偶遊燕市欣逢君。一編示我插高架。縹囊珍重薰香芸。恍疑師宜帳。疑曳羊欣裙。何當數晨夕。泥飲乘酣醺。便從竊村學梁鵠。還持奇字師劉棻。昨宵殘月正離畢。飛雨颯雷砢礮。曉來西山起晴色。豁開東牖延朝昕。摩挲舊籍忽三歎。沉吟拂几心股殷。張生石鼓李潮篆。杜詩韓筆萬丈光。灼灼我生已晚學。蕪劣文章豈直殊。蕪薰搖毫擲簡不知暮。起看遙樹漠漠含斜曛。

浮山禹廟觀壁間山海經塑像

真宰三靈萃。鴻鈞萬彙陶。神姦原並育。山海競潛韜。緬昔平成烈。時先浚洞遭。八荒勤僦步。四載奠林臯。蒼玉開函授。元圭錫命叨。鑄金窮變怪。象物晰秋毫。魑魅窺形屏。龍蛇匿影逃。洛符同寶貴。泗鼎忽淪滔。

斷簡存劉略。遺文問楚騷。尸藏相顧械。鳥飼畢方號。精驗如符契。疑言尙剖刀。何年圖鬼秘。入廟肅清高。靈石當塔峙。奇功一篲勞。岷峨聯脉絡。淮海帖波濤。浮似來孤鷺。移寧藉六鼈。中央森殿陛。百物備牲牢。恍惚陰雲合。睚眦怒氣豪。鱗身兼虎齒。魚負亦蛇操。飛有驪頭翼。髮生役采毛。燭陰曾不息。相柳尙餘臊。夸父奔林渴。刑天舞戚遨。森羅事顯相。環列儼分曹。過目名雖記。臨風首重搔。江河當四會。樓櫓集千艘。簫鼓喧祠禱。魚鹽雜市囂。古松崇廟貌。美馘換神袍。博士勞舟艫。驅巫逐赤緜。人天同詭誕。士女混譏褒。平野鱗分次。殘陽弓半放。茫茫橫百感。歸路響寒颺。

寶光鼎

字元調諸城人。乾隆七年進士。官至左都御史。有東臯先生詩集。

蒲褐山房詩話。先生性情伉直。遇事敢言。而尤以文學受知。大考翰林第一。不兩載間。晉內閣學士。直南書房。夙荷文獻之命。其再使浙江也。發平陽重徵之案。幾爲交構者所中。幸而實上聞。詔令覆審。乃五縣於法。浙中人士無不踴躍感泣。而先生還朝。晉總憲。兼直上書房。蓋皆荷聖明如神之照也。然先生自謂獨挈聖賢之旨。故於宋儒所言。指斥不遺餘力。聞者往往驚駭。至詩非所屬意也。其後僊蹇以歿。門人秦君瀛置其栗主於西湖望湖樓。且哀其詩而刻之。

登九仙山

連山東南豁。百里俯滄洲。陽崖叢石蓮。陰壑蟠潛蚪。嶢朵造白日。山絕頂名八朶峯。羲和礙行輶。萬壽冠羣峰。石色連天浮。覽古憶漢士。問年齊浮邱。娑娑傳丹液。可遇不可求。想像明月夜。鸞鶴驂遨遊。銀臺光照耀。倒

景隨東流浩歌。遏白雲清絕。令人愁。鶯鳩搶榆枋。黃鵠固遠投。涼颼振林樹。柯葉如驚秋。夙心展廣眺。及茲縫冥搜。

言陟從壽嶺。佇望仙橋路。有升仙橋積石淙清流。斜陽亂紅樹。賞心會獨往。倦足容小佳。頽宇龍象愁。危巖獅

虎怒。山有獅象峯。虎若峯。仙人逼蓬萊。溟漲不可渡。溯洄溪風長。寒林颯已暮。杳杳遠鴻音。鬱鬱隱豹霧。撫化時有

適。得已物無忤。揮手攬皓魄。振衣拂白露。行行謝磷緇。終然完吾素。

游天井一名白龍潭

游子追險絕。造物祕靈境。始下九仙麓。檻泉書崖名峰頂。西行得牛涔。幽尋問天井。杖策半缺折。谿徑猶榛

梗。跼身緣峻嶒。步澀覺道永。稍出石門隘。已怖風色猛。湍瀑迴羣壑。硤角會諸嶺。仰睇練峰嵌。轉睨龍塔

迴。勢挾河漢落。氣侵毛髮冷。黑雲閉靈霽。白日匿晶影。俯崖窺半壁。陰鑑洞內景。想見虛無底。積水藏溟

滓。有時沃驕陽。霖雨應禱請。沉牲終不受。澹灑涵淵靜。適來驚蟄潛。殷雷晨一警。豈謂感鬼神。茲游固多

幸。西暉餘照曜。延佇惜俄頃。

韓碑

昔讀南海碑。今來南海廟。遺碣越千年。望占集遐眺。洪鈞播萬類。噫氣吹衆竅。遭水自成文。韓潮極神妙。

南溟稱天池。晝夜浴兩曜。直極爲尾閭。嘘噏百靈召。軒波礎五嶽。鯤鯨恣擲掉。惚恍游萬怪。三躡窮窈窳。

厥大莫能名。斯文與之肖。刊石勒祠廊。萬里鎮炎徼。想見神光起。燭夜連嶺嶠。遺文重摩挲。絕餽仰輝燿。扶桑奉一枝。乾坤有餘照。濡筆增怖愕。摹繪難領要。別派細潢港。小言碎螢爝。觀爛雖有術。坎科每自笑。何當學龍吟。一息蛙蚪蚪。

送胡少京兆從軍金川

落日明寒水。驚風動大旗。已知經絕域。不復憶生離。入穴寧論險。擒王或用奇。安邊定深計。番婦與番兒。雜種那高壘。天河已洗兵。笳吟雲棧落。劍倚雪山清。幕府從籌筆。宮僚愧請纓。祇應驗楊柳。與作凱歌聲。

送王熊峯先生謫任西川

劍外論兵地。巴西望歲人。瘡痍羣命賤。飛輓異鄉貧。白馬今從事。青雲實致身。勿云分半刺。萬里借良臣。

夜過彈子磯

日下碧峯暮。山寒蒼鶴號。江流催地轉。石氣與天高。直想移靈鷲。何年斷巨鼇。客帆不得泊。欹枕送驚濤。

雨入滇陽峽作

西壁巉無路。南天隘此門。疊空浮雨氣。迸水瀉雲根。灘厲牛仍鬥。峽中兩石如牛鬥狀曰牯牛灘江寒鷺不翻。樵歌聞谷

口。稍稍見前村。

還過觀音巖作

迴岫枕江斷。入天青未分。波心塞過雨。洞口暮垂雲。滅火魑應見。吟風虎每聞。歸舟還小憩。宿霧白紛紛。

占水道中

遠岫如螺湧。迴江作字流。波清從浴鷺。帆靜不驚鷗。前輩文章盡。荒岡日月留。江濱有日岡月岡溪樓不可上。獨立倚灘舟。

抵清遠作

香爐中宿接嵯峨。擬訪禺君蹇薜蘿。夜雨偏從枕邊急。春山卻向夢中過。驚心峽鳥喧芳樹。滿眼江雲送綠波。此去無勞費牽挽。停橈閒聽木魚歌。

登浴日亭次東坡韻

扶胥南下水如天。倚棹孤亭黃木灣。海外初收鯨背雨。雲中稍辨虎頭山。卽看銅鼓添沙稜。南海廟前漲沙數十里名銅鼓。豈有丹爐駐玉顏。東望白雲山有安昌期丹竈我欲騎鯨攀若木。偏懸五色十洲間。

登越秀山

鎮海樓頭過雨痕。越王臺上俯朝曦。地連五嶺分鵬背。水帶三江下虎門。歌舞歲時人代換。山後爲歌舞岡東南市舶島夷繁。頗聞利病關絲禁。尙待咨詢達帝關。

章寶傳

字習之。歸安人。乾隆七年進士。官吏科給事中。有蘆江詩存。

秋日借友人登陶然亭

蘆白楓紅淺水間。斷雲高曳小禪關。屐分莎徑涼蛩語。磬出烟林暮鳥還。畫格今看秋易老。宦情好與佛同閑。凭闌莫便輕回策。一髮螺青似故山。

書山水册子

放懷濠濮間。晤賞寂無侶。漁艇一燈遙。和烟落寒渚。

曉發碧浪湖

浮玉諸峯郭外欹。蕭然兩岸荻風吹。碧天印水平如鏡。剪破涼雲鱗一枝。

鄭虎文

字炳也。秀水人。乾隆七年進士。官至左贊善。有吞松閣集。

將軍山

山含春雲青。石露虬骨瘦。倚空有孤撐。跨波得虛覆。壁削平孰磨。罅坼碎如湊。初疑女媧遺。采煉彌缺漏。又疑石髓流。風凝出皺皺。問名訝將軍。倅象殊甲冑。苔蘚偶作綠。土壤不敢垢。樹古蟠蛟螭。屏展界紋繡。上枝蔽危峯。下根貫陰竇。高宜致仙禽。險不隱怪獸。探岳遲巨觀。循江副奇觀。去舟泊中宵。迴榜覲晴晝。

酬此隔歲心。如有十年舊。磨崖欲題名。迅帆促歸溜。遊屐空遲迴。山林笑凡陋。

首夏偕近叅拈花浚谷雪園叔六開谷昆季遊城南王氏園林

我本死湖釣魚者。只愛乘船怕騎馬。無因得避馬頭塵。扇障元規亦聊且。江南一別動年年。夢裏春波水接天。消磨上巳桃花雨。辜負清明楊柳烟。忽見街頭賣紅芍。坐惜流光付蕭索。城南水木自清華。十載遊蹤猶約略。聞雲出岫鶴辭軒。休沐能來避俗喧。因呼我輩不羈友。共訪王家沒字園。園中無聯額。因呼爲沒字園。入門

便覺意思好。一味清涼消熱惱。竹下原非爲主來。花間未識綠誰掃。無多亭閣似星羅。一碧池塘新鏡磨。回首誤謔幽鳥喚。穿雲愛趁綠陰多。松風壓頂秋濤急。草色侵鞵空翠濕。山成覆簣樹爲籬。隔斷紅塵吹不入。偶來人外十分閒。風景依然似故山。我欲盡捨書籍賣。脫身長寄水雲間。此願終愁墮空杳。高飛媿爾安巢鳥。出門舉手謝園林。潑眼烟光青未了。

度磨石嶺觀雲海

黃山雲海世所傳。

曹圖洛禪學士有圖。

潘記

稼堂先生有觀黃山雲海記。

歸愚篇。

沈尚書有觀雲海詩。

昔常披玩不忍舍。懷此不到空年

年。今來楚南度磨石。如石磨磨折且旋。枯蝸并壁蟻出穴。高凌碧落卑重淵。悄然坐我三十六峯頂。俯視下界甃羅綿。維雲觸石膚寸起。澹痕輕素飄炊烟。初升一縷合萬族。漸彌罅隙無旁邊。當其欲合未合間。百重樹杪噴薄無聲有象之飛泉。分流互注各有態。虛空欲碎難雕鐫。遲來惜我未見此。但見浩浩一氣

相盤聯幻。參雲水寓色相。妙兼雪月爭幽妍。恍疑一拳坐一葉。斷查銀漢浮張騫。還疑岳陽喚未醒。神遊
赤岸君山巔。或云天差夜郎洗陋俗。綴寧志云。古夜郎地。天吳海若紛駢闐。不然夸娥負山送我北海之北南海南。
罡風鼓籟聞成連。盪靡星日噴杳杳。平夷凹凸歸平平。就中忽露雙峯尖。光明搖漾青螺圓。與之低昂波
上下。俄然遠近風便娟。瀛洲方丈此或然。不爾胡得空中懸。吾聞乾坤大物山與海。表靈蘊真窮言詮。惟
山有海海有市。變滅諸相真虛元。代傳其說見者少。況我過客尤難焉。登州海市禱乃見。侈神報豐天哀
憐。不祈而獲我何德。重是帝命司文權。與蘇殊遇遇差勝。可無健筆追坡仙。坡仙往矣不復作。詩成未擬
投時賢。時賢自有黃山在。那識渠陽別有天。

平金川

峨嵋橫絕指金川。鳥道羊腸路幾千。域外河山歸禹服。寰中日月共堯天。不矜兵力誇三捷。自有宸謀出
萬全。一怒安民功勒石。漢家勳業陋燕然。
上將胸中富甲兵。登壇受鉞命專征。一軍未許驚韓信。五餌何勞策賈生。日下風雷馳號令。春來草木識
威名。天誅更不煩擒縱。白羽輕揮瘴霧清。

卽事

半捲蝦須蕩玉鈞。蕭閒景物一庭幽。清池得雨青浮面。荒草無人綠到秋。落葉亂驚歸鳥疾。薄羅輕趁晚

風柔望中無限飛鴻影。看盡斜陽下荻洲。

王太岳

字基平。號芥子。定興人。乾隆七年進士。官至雲南布政使。左遷司業。有青虛山房集。

蒲錫山詩話先生詩宗魏晉。下及唐人。醇古淡泊。可謂高格。生有至性。每言及古來忠義事。輒爲感慨流涕。卽觀劇亦如之。與邵叔小鄭誠齋顧密齋諸同年。以文字相磨切。才名甚著。及自雲南罷歸。復直四庫館。授司業。居海澱之太平莊。憔悴以終老。

讀史

漢祖戡功臣。本圖磐石安。豈知禍所伏。近在蕭牆間。牝雞一司晨。翰音遂登天。炎劉幾化呂。坏土殊未乾。產祿實昏駭。平勃勳爛焉。倘其遇莽操。何計能圖全。乃知牀第私。匪惟因庸孱。由來蓋世氣。半消兒女前。李唐武后禍。亦兆貞觀年。文皇豈不偉。貽謀何膏然。千古同一慨。覆車無後先。關雎謹妃匹。信爲王化端。子孟起宿衛。綽有古人風。寅恭著夙夜。進止何雍容。六尺既有託。四海無兵戎。一朝臨大事。隻手迴蒼穹。凌烟標霍氏。遠紹伊且蹤。功成不知退。震主威隆隆。終爲兒女誤。躬與弑逆同。滅親昧大義。禍發還覆宗。信哉貴學術。臣節庶克終。

黛流村新營所住

昔予黜朝簪。本自滄洲吏。一辭京雒塵。適會田園志。卜築代巖栖。嘉招漸遠至。遂賃伯鸞春。頗授揚雄字。

林閩結架小。郊扉晝常閉。灌溉發陽翹。荒粗豁蒙翳。剪彼惡木陰。暢此芳菲意。非惟娛徂年。兼得閑外視。支杖聽風篁。披襟納山翠。片雨洗青天。寥寥元古思。

種藥

結廬近壤陌。獲與田夫齒。蒲杏日萷與。農候茲焉始。余方據槁梧。素業亦時理。荷耒竟不任。聊欲勤四體。鋤瓜夜雪餘。種藥春陰裏。酌以長生瓢。注之功德水。豈不念朝飢。好事良自喜。擾擾區中緣。遂性亦云已。奉酬檢討從兄見過之作

王城車馬路。尙愛野人廬。石隴看雲坐。春畦撥雪鋤。自憐頹放慣。人許往還疎。所賴吾宗秀。時時問案居。秋朝晏起吳百藥見訪酌酒敘懷

涼飈下梧葉。日夕滿庭墀。清曉鳥啼歇。岩窻人起遲。倒衣知有客。解帶坐論詩。世上紛微逐。將無文度癡。歸自東臯得顧密齋學士書口號卻寄

看遍秋山又獨歸。楓林樵徑晚風微。寒原漠漠耕人語。烟渚沉沉浴鷺飛。嘗有遠心當暮景。絕無飲興典春衣。集賢舊侶能相問。人在東臯賦采薇。

早過潼關呈屠參政

日上關門宿霧收。角聲悲壯肅高秋。山連二華橫秦塞。水控三川下豫州。行處牛羊歸聚落。幾家鷄犬共

林邱風流輸與屠夫子。深坐溪亭理釣鉤。

廖運芳

字湘芷。又字楚厓。龍南人。乾隆七年進士。官嘉定縣知縣。

秋溪晚吟

葉涼秋江清。汶口人家暮。新月上孤城。斷烟橫遠渡。星星漁市火。杳杳寒山路。古崖斷行人。歸帆泊何處。

飲酒

山氣殊未昏。雲林耿深曲。崖影墮層檐。暝色趨茆屋。遠村孤烟起。人家住深麓。清池澹涼颺。水螢度修竹。山巖然松燈。有酒我自漉。須臾石門月。娟娟照幽獨。

過靜聞精舍

石徑無人到。溪聲隔竹聞。殘燈孤嶂雪。曉色萬峯雲。僧鉢呼猿共。山樵混鹿羣。澄心留半偈。歸路已斜曛。

泊峽江病起口號

梳沐經旬罷。支筇作薄遊。鶴鳴秋水寺。鴉陣夕陽樓。背嶺荒城閉。迎風獨樹秋。如何三載客。淹滯尚林邱。

京口懷曾瑤圃陳鑑堂

殘夜空江水。懷人坐到明。愁心楊子渡。落月廣陵城。飛夢懸秋水。相思折杜蘅。南歸無限意。北望轉含情。

虔州客舍送劉遠暉之江南余亦返權南楚卽席賦別

天涯離宴一樽同。折柳危亭夕照中。失路三年俱作客。秋霜兩鬢又飄蓬。斷烟城郭逢初雁。暮雨江帆見落楓。別後心期應不盡。西窗可記夜談雄。

熊爲霖

字浣青。新建人。乾隆七年進士。官檢討。有鶴嶠詩鈔。

下清浪灘

揚颿愛風駛。下瀨喜灘急。龍涎激秋雨。濺使青天溼。操縱勞長年。屏息蒼鷹立。一石振一篙。心手妙相入。借勢待分寸。雷車翻欬歛。弄雪跳珠花。臥聽鮫人泣。

鬢拙留別盛于野

君將老劍谷。我亦歸緱山。山谷有真性。白雲爲往還。殷勤飲我酒。爲我彈猗蘭。酒力生春風。天地回朱顏。元音在正始。變徵還無端。惓惓向中夜。月落疎林寒。且復酌我酒。莫言行路難。

虎巖道中

迴巖通險阻。仄徑復艱難。礪曲水聲轉。雲深人語寒。隔林見村落。前路又峯巒。朔吹愁天晚。崎嶇十八盤。

黃崖

爲陟黃崖險。摩空欲建瓴。劃雲成境界。響谷下雷霆。鶴影瘦無際。村烟散幾星。倚欄看瀑布。一洗萬山青。

暮投瑞昌縣卽事

暝色來天杪。山城客到門。萬峯陰欲合。一水瘦無痕。樵唱月中影。僧歸竹外村。數聲吹畫角。霜雁落平原。

博陵蚤發

落葉破殘夢。疎林月五更。冰花勞馬跡。鐸語亂雞聲。影瘦寒仍怯。峯微遠欲明。中山遺石在。古驛近邊城。

陳宗達

字葯房。桐鄉人。乾隆九年舉人。有燕臺澄江諸集。

春日文子先生招同王大魯山西園限韻

春光澹沲來江南。澄江日暖天蔚藍。閒庭芳草吐新綠。名園上日窮幽探。場來風流羨六一。招攜同伴人成三。別墅從遊忝陪列。烏巾白袷容清談。初從仄徑歷苔石。漸臨曲檻依澄潭。枯池荷柄盡欹倒。淤泥濁潦真如泔。平林漠漠淡烟織。瞥眼恍忽羅重嵐。坡陀怪石各有致。猶如最屬雄如魁。孤亭峯嶽氣蕭爽。槎古樹撐楓楠。老梅低亞更清絕。晴暄盡拆霜苞含。支頤磅礴坐良久。依稀鼻觀聞優曇。卻憐今年春信晚。不然花底恣沉酣。狂呼聘目縱遠眺。君山俯瞰何耽耽。祇今中澗刺遺跡。儼如秋燕存空龕。人生會合貴適意。勝賞不厭貧。夫貧不見南樓劇幽邃。深篁密樹交鬢鬢。蕭閑妬殺閉關客。午餘睡足鐘齧齧。詩瓢

酒瓢想擗擋。揮毫潑墨樂且湛。獨憐歷碌事征鞅。東西南北其奚堪。焚書掃地平生願。幼輿邱壑吾能諳。白嶽黃山舊遊憩。徑欲小築誅茅庵。謝公登臨具逸興。聞言顧我頤深頷。夫子盛年歷臺閣。曾從祕殿窺金函。學窮二酉探四庫。風騷一代身爲擔。白門夙昔仰山斗。珊瑚鐵網羣雅滄。文旌卽日指吳會。詩人猛士隨征驂。張黃秦晁指難屈。不數短簿同髯參。東南竹籥舊稱盛。儲材羅杞梓榷枿。閑從公暇縱搜討。聯吟鬪韻披銀蟬。新詩奇崛氣雄放。劍文剝蝕光生鐔。而我枵腹等魏瓠。巴吟里曲心懷慚。青桐百尺鳳凰叫。屋梁巢燕空呢喃。卻登經閣覓奇字。偕游史喜朋儕簪。百弓千笏幽意愜。淺紅小白花光涵。叢薄日夕多畏佳。恍聞風激波滄泮。歐蘇詠雪森紀律。白戰不許持矛鏃。卽今韻險等競病。催詩火急聊推戡。枯腸搜索鬪匠巧。斗室偃仰同眠蠶。詩成閣筆扣銅斗。還期惠我春醪甘。

湖海詩傳卷十

夢麟

字文子號午塘西魯特氏蒙古正白旗人乾隆十年進士官至戶部侍郎有大谷山堂集

蒲獨山房詩評先生樂存力追漢魏五言古詩取則盛唐兼宗工部七言古詩於李杜韓蘇無所不
傲無所不工風馳電掣海立雲垂正如項王救趙時聲動地又如昆陽夜戰雷雨交驚雖係才多實
由天縱歸愚宗伯序之謂胸次足以包羅衆有非力足以摧挫古今蓋知言也先生嘗云五言必從
悟入而七言古詩忽起忽落信手拈來縱橫如意亦非妙悟不能尤屬前賢所未發生平宏獎風流
惟恐不及與乾癸酉南鄉試予得出其門下既進謁歷詢南邦人士予以風嗜企晉曉微來殷
升之策時東有爲對未幾視學江蘇取來殷諸人悉置之首列而于鳳嗜輩推獎不遺餘力既而召
陟司空旋改司農預參機務上意將大川之忽病瘵以歿木隕山積宜爲清流傷悼矣先生嘗作古
詩四章贈予又有句云軼塵孤往奮仙翮當今豪傑王與桑來殷企晉及德甫盤挈變滅龍騰驤其
推許如此而白首無成良自愧爾

戰城南

戰城南悲風吹吹黃沙沙倒飛左徒倒戈右徒棄兵倒戈者有生歸告大將大將怒女鬪死損我聲連師
夜動虜驚晝馳歸營舉爵甲衆嬉嬉張鐙擊劍夜雲四開各各懽喜生來歸我思來歸來歸安可得願爲
鬼雄鬼雄安可圖狐狸嘔血老鴉啄軀白日晚下游魂夜呼

雉朝飛

雉朝飛。其羽灼灼。雌前越。子後躍。于田于薄。是飲是啄。我弗如爾。行樂爾樂。我哀朝行。出游歲暮。獨歸兮心悲。羣嗷嗷兮夜飢。我無術兮哺兒。先我死者知之。

今年別

前年別。淚填臆。卷舌入喉。啼不得。上有白髮母。下有扶病室。忍啼作笑笑無力。出門三日不能食。今年別。苦復苦。出門無。入門無主。不見我母送我。但見兒女盈前。淚下如雨。我無母。憶我無旅。爾無母。憐爾無所。提攜保抱。恃爾父。父去誰與慎。寒暑爾伯爾叔。善視女。嗚呼前年別。啼不得。今年別。哭無力。

飲馬長城窟行

飲馬長城窟。城穴堆白骨。白骨爲人時。雙鞮奪馬騎。解一騎馬過城下。飲馬臨城壕。堅冰凝澁澗。朔氣鳴弓刀。解二枕戈臥沙場。星芒動寒陸。青燐黯不流。枯骸望城哭。解三

兄弟相送至蘆溝返

送者聯鑣旋。兄弟棄我去。林隙辨歸人。時見一回顧。停立瞻長橋。猶是見君處。層城隔暮煙。楚雨暗寒渡。賤子一寸心。長江千里霧。何當爲輕塵。冉冉京華路。

由天香行樂西盤初入山口

巖秀澄孤懷。趣塗意先往。理策遵迴蹊。空林得樵響。幽悚眷岑寂。矧茲秋日爽。霜徑稍曲盤。虛翠忽晃朗。

漸歷紆巒深。未識迴塗廣。孤暉隨趣濃。懸磴披煙上。杳藹接諸天。振衣發長想。王裴不可作。邱壑誰心賞。何時飯名僧。松檐稅塵鞅。甘從麋鹿游。拂衣謝親黨。

天成寺

秋氣寒空山。樹石忽清峭。採藥耽翠微。欣逐雲門調。叢薄稍蒙密。及此初日照。鳴淙石罅涼。欹徑雲間蹈。詰屈周櫺椽。捫攀辨蘿蕙。偶歷開士居。忽證前蹤妙。霽壑明山楹。迴梁灑飛瀑。向背辨明晦。豁達縱臨眺。百里際檐端。雲物相輝耀。山烟自晨夕。流覽蘊深悼。緬懷田子春。常風蹙微嘯。

薄暮至萬松寺

山翠昏陰崖。雲際聞孤磬。怖鴿驚深叢。枯筇響羅逕。松關晚森肅。荷衣拂深淨。日落山風吹。琴筑灑清聽。不見湯惠休。秋屨發高詠。曳屐循道門。簷間數峯暝。

曉入東巖往千像寺

幽尋意不極。披衣狗所務。山曉巖氣白。振策得微路。肅肅青松林。濺濺石流渡。零露晨未晞。青草濕芒屨。曲折入空翠。霜徑屢回度。烟巒紛若積。迴塗眇非故。髣髴聞鐘魚。香巖澹寒霧。

朝往香山

夢覺鐘魚清。褰裳月在棟。盥濯辭精廬。山僧出林送。苔光上芒屨。昨宵知露重。亂泉聽乍失。溪澗澀餘凍。

石骨生清寒。行吟抱朝甕。日出照幽谷。山鳥發新哢。微風被空翠。流雲散巖洞。永懷煨芋者。隔岫聞清誦。

豐臺王氏園

孤筇曳青苔。院靜禽鳥樂。幽懷憺不極。獨行果前約。綠蘿暗荒逕。流雲帶晴閣。夜來微雨過。青林數花落。水木明朝華。陂塘翳烟薄。和風散微溫。芳叢扇紅藥。幽陰澄近原。修綠浮遙郭。不辨荷鋤人。高檐聽牛鐸。

園居夏夜

清池謝纖暑。岸幘臨冰除。徐步聞暗香。涼風泛紅葉。明月稍東上。悄然來清虛。遙樹影微得。近水光欲無。人聲過前林。迢迢歸烟墟。彷彿說禾稼。笑語良可娛。願祝百室盈。吾亦欣安居。

薄暮登清暉閣眺望

晚登池中樓。開眺池上山。草樹炫夕暉。烟靄浮青鬢。微風從東來。披襟爲盤桓。偶然襲蘋藻。練影生輕瀾。搖曳動窗戶。人在空明間。始知元化妙。及此半日間。無心得良晤。寓目情所關。白雲出山去。日落何當還。

晚步泉上

山氣生夕涼。林端月初上。余行適無事。偶此飫新賞。池涵宵影虛。魄濯露華爽。高閣臥澄鑑。波動微偃仰。宿鳥驚流泉。風葉遞清響。夜深松竹香。翛然拂衣杖。時逢樵採歸。村謳忽三兩。長歌懷古人。晤言發深想。

白雲寺

曉發蘇門山。晚憩白雲寺。晨昏辨朱樓。亭午行乃至。車輪軋犖确。砂磔軼軒輅。檜柏晝晦冥。叢薄鬱深闕。時聞風入松。灑然落清吹。遵闌步幽澗。雲構妥布置。植材老樹醜。嵌空怪石墜。有泉出樹杪。噴薄不到地。跳珠落圓鏡。喧靜源不貳。境古塵貌銷。谷邃日容避。其巔開華堂。佳木森淨植。烟雲倏爽朗。巒陵雜虛翠。山春釀暄和。苔繡簇鮮媚。乃知林壑妙。明晦各有致。暫覩舒遐悵。重來締餘思。無煩歎于役。了悟靜者意。

香山晚坐

秋晚珠閣涼。青山澹將夕。復此巖上住。披襟坐溪石。歸雲拂空林。蒼然翳餘碧。美人何時還。娟娟秋水隔。勞者徒爲歎。去矣將何適。飛葉響寒山。臨流悵行客。

永齊寺

籃輿就深烟。古寺入修竹。山光澄我心。復映窗戶綠。松雨墮殘滴。清響在空谷。隱隱西日斜。漸沒巖下屋。坐聞幽鳥音。眷此山間宿。

雞鳴寺

眷茲白下秋。稅鞅雞鳴寺。淨域臨古城。坐此巖下翠。殘露滿空林。鳥動時一墜。層軒傍松杪。寒濤瀉平地。烟影暮江辨。晚日澄湖媚。兀坐對青山。翠羽數雙至。

古詩四章喜王德甫過

璠葩麗雕榭。春飈扇崇蘭。美人衽服坐。瑤瑟聊獨彈。朱絃靜理蘊。遠調清徽完。音希闕苦意。闔戶資幽歎。殊響繁夜叢。冷泠曲枕殘。綜往兼慮來。引領起微歎。願折珊瑚枝。持謝知音難。

之子亦何好。窈窕光容儀。落葉朝翩翩。手持瓊樹枝。翠璫飾珠珮。翔步臨前墀。噓蘭拭洞簫。不惜勞空閨。明月來廣除。曲斷無人吹。含睇稍延佇。我願神爲移。曲調寧不嘉。白日方西馳。努力愛景光。崇德爲子期。暄風被陽林。巖構榮丹葩。蘭芷及荃蕙。郁郁回春華。輕颺發芳豔。孤秀凌朱霞。太古忽已遙。入耳皆淫哇。不悲元音遠。坐患流無涯。斯人詣淳古。指摘勞相加。願製芰荷衣。怡子以清嘉。鳳喙企音諸子。

元音逝已久。瓦缶空陳陳。哀哉枯桐枝。俯首同殘薪。大雅出晚世。古意陶天真。靜參淳悶趣。援手扶奔輪。沉光祕元訣。和性噓芳春。斯人亦已然。此曲何難申。咫尺獨緘憶。悵望勞嘉辰。謂沈宗伯。

夜坐園池

月出臨廣池。人影動空碧。松際隱清光。林罅露微白。風交樹影橫。鐘定空園夕。念彼前居人。悵望知何益。墜葉散青苔。時見幽人迹。

登舟將赴梁谿道間作

澹靄蒙青岑。孤篷冒疎雨。層波生淺涼。獨坐聞柔艣。溪迴移遠林。纒動驚棲羽。微辨墟上村。漸咽烟中鼓。出慣離翻難。客獨意增楚。匪緣逝者悲。誰識生人苦。稍與前渡辭。攀帷睇寒渚。江城忽已遙。孤情眷兒女。

夜過青浦

理棹投暮烟。餘暉黯遙巘。輕舸尋歸流。空波肆怡衍。野風送香氣。皓露滴微泫。重疊林景昏。微茫峯色淺。遠火辨孤城。隔岸聞亂犬。稍別烟墟移。漸覲雉堞轉。華月澹始照。流雲蔚初展。一與清景俱。乍喜塵襟遣。招悵懷前蹤。餘風動深緬。

夜赴澄江

川涂屢回驚。輾轉眺明月。微颺生斷崖。清響散林樾。竹香深夜聞。波靜舟人歇。雞鳴知近村。遠寺微鐘發。雄飛嶺

都廡緣其東。春陵迤其西。凌陰楫祝融。迎陽賓九疑。客首歸陽程。風色書慘淒。積纒惑明晦。亭午日已低。稜鈎巨石礙。壁裂陰林虧。入谷墮黯黮。上嶺排雲霓。不知天露艱。頰首隨猿狖。古木號驚叢。修蛇懸空梯。慌惚來山魘。技淚不敢啼。懸崖納瘴颺。天半奔鯨鯢。投身冑欹林。顛墜乃復稽。棧轉陽景匿。谷響雷車摧。絕頂俯萬有。高冠衝天扉。蒼梧何茫茫。苦霧迷湘妃。如聞洞庭哭。崩濤咽迴谿。壞雲西角來。獵獵翻裳衣。頓覺羽翼生。大翻盤秋暉。咄哉萬里遊。到此真雄飛。弗歷登頓困。詎與烟霏齊。周道多庸庸。吾行將安歸。

黑石關

亂山如斷鼉。指爪出奇力。意外貢盤錯。尺路無寸直。破荒搜棧齧。鑿空露鐫刻。朝塗趨營陽。日晏不遑息。

澗洞味昏曉。惕栗忘晨食。筭筭四山翳。縮足意惶惑。林礙天空高。雲入地底黑。嶄巖斷行旅。亂石作人立。百千蟲奇鬼。搖動不可測。峽崩綫空出。谷顯鐵壁寒。高步非無能。乃受傾崖逼。鯨鯢掉尾迴。獬豸磨牙集。毒手將老拳。蠻觸汝安極。長風摧石林。老檜不肯折。鐵中殊錚錚。駭此獨行客。逕絕甯雲爭。破關日月窄。顏垣出雲棧。梯石足屢側。稍辨墟烟高。喜與蒸黎卽。努力赴周塗。理策鼓登陟。

天閑驃騎歌

風沙獵獵花門湧。肉馱礮礮蘭筋聳。才大姿雄動有神。牽出銅鞮氣森竦。騰身遠踏流沙煙。深夜降精雷雨懸。列缺無光霹靂動。真龍拉杏生空天。青海蕃奴不敢控。蒲桃遠效哀牢貢。未施羈勒霜蹶翻。蹴空不待交河凍。但覺揮戈大漠馳。誰知踏鐵運乾動。浮雲颯颯風颺颺。山崩谷湧馳奔濤。泥洼萬里一坭輿。中天突兀方瞳高。天子宴坐含風殿。翠網輝分九華扇。夾鏡雙懸天骨張。蹴踏瑤階日光變。翺首長鳴電彩迴。至尊動色太僕羨。錦韉羅帕輕雲蒙。鏤膺繡簇珊瑚紅。作態懷恩自驕愛。殿前徐步何雍容。當時十萬沙苑馬。格鬪掀騰不肯下。當槽頗厭爭芻喧。短策時被圜人打。此馬入門始一顧。萬匹吞聲就虀瘠。前年大狩飛廉東。鷹饜兔兔無留蹤。至尊玉轡山桑弓。鞞蹄翦鬣高纏驥。此時朔漠來真龍。馳突大澤毛翠空。倒射黃羊殪其五。血飛漉漉迴腥風。金鞍翠飾被來好。龍芻餐遍天山草。殿閣爭鬪玉鼻驂。騰騫漫憶橫門道。君不見霜郊瘦馬如堵墻。東門日出看騰驤。天寒草枯朔風怒。長嘶夜半呼孫陽。

澹道人秋色梧桐圖歌

道人何故使我慘不樂。寒烟叢杳空巖落。西園氣爽客登樓。金井聲繁動鈴索。亦有禮李華。亦有園中桃。銅柯石榦豈不暢揮灑。胡爲說出濃氛縈拂風蕭騷。道人驅走東華道。飽閱炎光覺秋好。著色悽迷任化工。披牋黯澹還天巧。當其落墨時。倏歛風雨生。粗枝大葉氣橫出。披拂盡作秋聲鳴。琅玕一片赴瑤砌。欲墮不墮疑鏗鏗。遠憶梧宮報早秋。銀床夜冷露華稠。都將暝影虛闌意。寫入關山萬里愁。道人以我胸懷曠。寄來命挂中堂上。素幔渾連翠影勻。孫枝似有輕颺颺。極目江關首重回。涼烟斷鷺接層臺。霜濃湘浦芙蓉落。露滴幽巖蕙草摧。龍門亦有參雲勢。可奈西風鷓鴣來。

上方角鷹歌

上方角鷹番錦毛。星眸閃爍光如刀。綠鞵絡臂黃繩操。陰崖激日翻秋鸞。刷羽戢翼勢飛動。勁氣掣斷黃金條。盤空曾踏天山雪。決雲驟起飛影滅。刷翎朝斷鶻鶻花。奮拳夜擣狐狸穴。倏忽騰身入霄漢。雨灑層空亂毛血。花裙胡兒不敢放。氈廬遠獻千秋節。嚴郊底貢馳青驄。鷹師祇候長楊宮。壯士臂歸動霹靂。英標下立凝清雄。厲吻空樞眺寥沈。大翮疑落花門東。坊開近在銅龍側。永日嚴威動八極。鈴掣虛簷烏鵲馳。影翻昏晝鶴鷗匿。陰庭轉瞬爍流電。羣精潛喘夜惶惑。是時大冬風怒號。天清海國盤霜鷗。水枯草短豺狼嗥。獬豸貓貍接雁尻。棘枝凍雀相呼呶。跂喙翔走紛繹騷。雕戈雪練迴幢旄。鳴弦厲鏃揮孟勞。凌空

一逝不可招。高陵大谷追懸獠。疾過盤睫馳修毫。河陸山櫓窮搜牢。毛羣羽族紛騰逃。孤飛擇肉披羶臊。霜晴不動寒穹高。下眎鷺鳥非吾曹。

蘇武牧羝圖

似烟非烟霜凍鬚。欲雪不雪雲寒塗。西海北海冰膠臚。鈞者鱗得陰鷗噓。磨霞繭足鷺鷥呼。貍豬黃獐潛伏墟。有羶其首來于于。非羣非牽亦非踰。曰粉播羯厥狀殊。矜矜濺濺誰謂無。長肱不麾十指瘡。陰岡斷坂遊以娛。或羣或友亦步趨。寢訛降飲儕厥徒。何人重戴氈裘襦。短筮不假招蕃奴。高舉玉節持不孤。翠旒歷落紆丹朱。未央建章黃雲徂。酸飈獵獵翻干旟。哀哉子卿今牧芻。絕食大窖神女扶。鞞塚慘栗愁弗舒。羝乳則歸歸或誣。有雪爲嚙旃爲茹。阿誰寫真充顧廚。鉛黃粉墨生態紆。麒麟漫漶丹青淪。畢謹效死真丈夫。少卿衛律嗟哉都。拜恩賜號封新除。兩甄馳逐形魁梧。驪騮蕃頌來余吾。祁連獵罷休氈廬。醴漿鹿脯封醢酥。寒茄按拍聲嗚嗚。紅羅綺組排妙姝。地鑪煖爇紅氍毹。君獨胡爲拘櫪株。子卿善覩千金軀。繳檠弓弩良可圖。上林雁帛來神書。

循山西南行宿北壁小閣放歌

太行三日送我行。參錯萬派羅虛明。迴旋起伏突奔峭。鸞翔鶴峙標仙薨。今晨近山覩山奧。深藍淺碧丹黃青。磨礧空翠出千變。似娛我意故遺窈窕來逢迎。何人置此數椽閣。與山曲折無經營。招山欲來拂鬢

髻時有雲氣，倏窺簷檻。我本愛山兼愛雲，愛其紆迴參錯無相傾。佳處非山非雲，亦非開妙會，適與雲山并。却憶昨歲入西粵，城東峭壁排青屏。當崖一亭特孤絕，烟霏歷亂縈冠纓。雲山不復異南北，轟聒但少千雷霆。彼旣無期此無約，偶然得耳非前盟。我聞退之禱衡嶽，掃除陰翳開崢嶸。東坡廣德祝雲海，霜晨海市千人驚。二公丹誠感神鬼，天憐遷客施元精。今我不禱復不祝，坐收萬象澄孤清。登臨豈不憶鄉國，一身已逐飛鴻征。世間萬事本無主，當盃一笑諸緣輕。君不見雲山變幻不可恆，放歌且慰雲山情。

登樓行陝州使院作

七月流火疾弗瘳，十日不上西南樓。今晨風色清且柔，憑欄聊作凌風游。樓中几榻窗戶幽，樓外巒壑縈沙洲。中條倏歛雲氣收，萬尖突兀撐高秋。寒樹依微燼平陸，以烟點點微雲浮。黃河一線東方流，抱城北折潛蛟虬。誰家挂席乘扁舟，流烟落日不可留。雲山緜渺生遠愁，夢魂昨夜歸蘆溝。歲聿云莫，心百憂。今我不樂，日月逾。當風一嘯翻輕鷗。

中元舊縣驛夜歌三首

長河在南斗在北，叢樹無人月深黑。破柵殘扉不滿百，夜昏瀝酒家家哭。獨客聞之黯無色，欲見邱隴那可得。四年此節在異國，但見他人供酒食。孤兒何曾在親側，靈不見我應歎息。生不能獻祭遠適，父母生我亦何益。

去年南頓月之日。白六來聞我母卒。驚迴淚斷哭無聲。仰睇皇天白日失。倉卒翻疑前日書。書上平安誰所筆。憐兒或恐兒心傷。兒歸更繞何人膝。瀕危知復欲云何。未親含殮憑誰說。歸來一慟兒今還。呼天不應心如割。朝來漿酒陳應同。楸梧肅肅生靈風。五子羅立獨不見。靈魂應到東阿東。

我妻嫁我十年半。十日啼飢九無飯。苦憶嚴冬一破裳。嫁我嚮盡供炊爨。年餘飽煖抵幾何。奄歛銷沉魂已斷。肝摧隱痛彌留時。腸牽兒女淚被面。流連知爾意無限。到頭何日重泉見。月來數女知何如。淒颯浙瀝吹裳裾。朝攜祭榼綠青蕪。秋墳呼母母則無。覓爺中夜聲嗚嗚。

王將軍行過汶上彥章祠墓作

太原城頭千老鴉。東飛大漠啼黃沙。晉陽王子子勝父。捧矢告廟拔刀舞。十萬健兒猛如虎。日出河心播大鼓。鼓聲闐闐朝入雲。大梁夜遣王將軍。將軍意氣一何勇。揮戈叱天天欲動。十盞十決當者誰。朝趨郛濮來援稀。雲浮萬騎闐來追。裴回驚馬空鳴哀。梁唐朝暮生焉爲。不爲我用爰斬之。如公之死死豈多。爲朱三死如公何。

輿人哭

輿人迸淚悲嗚嗚。舌乾口燥哭路隅。爾獨何事中煩紆。輿人仰頭答。欲語聲於喅。自言祖父曾攻儒。孤兒生苦身無襦。收瓜負米販齊楚。兄嫂不可同家居。去年報名銅山縣。負戴趨走事良慣。日分五十青銅錢。

夫頭月給銀兩半。前擡官府經淮南。出無一月錢盈串。北關租草屋。費我三百文。勉強取隣女。約略營衣
裙。出門日無幾。聞說家遭水。妻在水聲中。宛轉隨波死。所住間半屋。至今在泥裏。昨日縣帖下。說道官今
來。驛吏備馬匹。縣吏呼輿擡。一班十二人。聚集相分排。平日喫公食。如何逃官差。天明發銅山。午至桃山
驛。不道五十里。泥深沒腰膝。足下著菲登頓滑。赤脚肉痛畏傾仄。泥深沒我身。觸石傷我骨。前日擡官來。
聽道往江西。彼時雨雖落。大道猶平夷。今日擡官去。言往江南滸。那知步步難。舉動皆辛楚。回首我家亦
何許。足無完膚苦復苦。不怨行路難。但願蒼天莫下連宵雨。此去新豐鋪。道里尙三十。官路一尺泥。泥中
有石脚難入。欲歸不能行。不得吁嗟輿人爾。勿哭爾不見。頽雲壓首沉西北。千道電光如箭激。殷殷震雷
在汝脊。

哀臨淮

嗚呼怪事吾不圖。臨淮城上淮水趨。崩濤直下城郭無。沉澆巨澤菰與蒲。七月廿日吾在途。月再閱乃成
沮。城頭鼓棹平地如。不知下有田舍廬。縣官俟我城南隅。我叩其略聲淚枯。淮流欲入洪澤湖。湖水逆
淮淮倒驅。夜乘厥勢來吾郛。洶濤驟湧人叫呼。夫逃子逐牽其孥。坐拋屋宇羣負屨。有室而沒田而瀦。細
流入括倉廩儲。巨流橫灌牛羊徂。官凡三夜遷厥居。今之住者氓之逋。北風中人金僕姑。于野誰恤衣無
襪。昨計丁戶來十郛。倉穀坐沒償錙銖。千村萬落悲飢烏。貧者富者同嗚嗚。嗟哉不救啜與舖。坐無擘畫

痊爾痛。願官好恤無母。雖天實鑒。此非彼辜。民不堪命。吁可虞。中丞今夜來其蘇。

河決行

癸酉秋九月。河決銅山。東小店汛。麟時司試江南。過茲壤。情態目擊。作是詩。紀天子紆策促使。憂悴民命也。

嗚呼。咄咄鼓隴胡。黃河之水。點滴無。嗚呼。黃河萬里之水。曷得點滴無。巨防溜決。南東徂。乃使故道鬱塞。泥沙淤。宿靈虹。泗奔濤。趨小店。東來不一里。河身坐見馳驪駒。驪駒馳過河。河中飛黃埃。皇帝陛下痛觸。徐方災。前遣大司寇。旋遣大司馬。賜之驛騎。勿許休息。連宵來。屬以十從事。迅捷如風雷。傳聞宮中昏且。罄擘畫。令百卿士。各以所見。陳瑤階。天關九重。高高等萬里。天心乃與。茆檐葑屋。相周迴。徐州水衝突。物料無所求。皇帝命河東。協濟毋逗遛。河東大吏。各各率屬。驅行。知我陛下。日抱蒼生憂。道逢老翁。哭山徑。攜妻抱子。含悲哽。老翁老翁。爾不見。廟堂吁咈。宸衷勞。九年之堯。無此聖。嗚呼。九年之堯。無此聖。女曹何患。無性命。老翁罷哭。涕在頤。插翎數騎。東南馳。

潑陽夜大風雪歌

山風吹。山山夜號。雷碾霄。雲奔崩濤。地軸挫折。鳴巨鯨。攫孳老樹。鴉雀逃。夜入萬族。掀蓬茅。砂礫旋舞。雪疾作。鷺毛萬片。如手落。東鄰墻塌。西叫呼。夜半搶攘。聲勢惡。雪片轉粗。風轉急。長空叫嘯。坤輪裂。倉卒真。

同海水翻。敲鑿時見簷瓦擲。毋乃下民于風伯。不然行者丁奇劫。冬盡知無雨。雹來夜昏疑有鬼神入。雙扉翁歛塞無力。僮僕凋喪婦走匿。嬌兒顧我意惶惑。擊祛呱呱傍爺泣。嗟乎兒泣尙可休。無衣之人何以活。君不見銅山縣東四十里。築堤十日工方起。呼集丁壯諧汝聲。下埽日僅尺與咫。手僵脚凍埽不穩。眼見千夫萬夫死。我乞天神願神已。此風莫入黃河水。嗚呼此風莫入黃河水。

長歌喜徐大快亭至飲酒作

黑風吹海聲如號。大江千里無征艘。東溟漁人棹船至。君從何處橫輕舸。閩吏傳刺我方食。投箸而起羹霑袍。積惘蝟集忽相晤。如背癢得麻姑搔。坐君琉璃四面閣。飲君碧玉千春醪。轟飲大嚼盼左右。卮融琥珀盤堆螯。青眼高歌望吾子。杜句橫空岔起騷人騷。男兒不佩斗大印。便當去作鄉里豪。不然肆志憇泉石。空庭佳植羅樛樞。丈夫舉事貴快意。譬若鷹鷲離鞬條。嗟君簿領膩塵漬。五年作吏東蒙間。科條朝布吏役雜。錢賦暮比鞭箠敲。有時大吏出行部。前驅負弩馳如獠。掃治館舍索酒食。人奴口角饒訾警。歸耕既無田二頃。出仕歷有途千遭。伯道無兒伯夷餓。爰書判斷須咎繇。羈留歷下月再閱。叩門弗應吁勞勞。酸風夜吼馬毛縮。淘汰凍合浮艇膠。衣裘破敝行李乏。每念及子中焉切。心游道塗計月日。飛觴寧敢期今宵。嘆君跋涉喜君到。咨嗟叫笑兼呼呶。窗紅盞綠獨生蕊。鱗鱗碧酒金波搖。更籌屢易檐烏宿。戟門撾鼓鼕鼕。攀攀高開簾起視。雪在地。霜空片月圓松梢。

出郭見西山晴雪有懷謝青柯

夕籟喧叢籟。蕭堂昨夜寒。朝暉上西崦。雪在青林端。此日跨驢客。梅花誰共看。一瓢勞遠意。落葉浩漫漫。

西堂秋夕

雲影度銀浦。碧天橫數星。幽人眷良夜。捉席暮山青。荷動觸虛籟。竹深流暗螢。遙思潞西客。翠袖倚風櫺。

寄題雲壑草堂

衆綠被墻趾。蕭然蘿薜陰。一谿明霽壑。半畝面雲林。柳是先生種。松如靜者心。時來北窗臥。流興滿青岑。

郟城楊園

虛砌蟲語歇。夜涼開竹樓。數星動林際。片月西南流。露氣暖深竹。池香寒早秋。迢迢望河漢。莫慰異鄉愁。

河陽薛氏園亭

行盡蒼苔路。高齋暮色晴。一花如有意。數樹不知名。排闥書堆案。開軒水抱楹。小池更幽絕。烟水晚逾清。

欹枕臨池睡。招呼得晚風。帳鉤花影外。人夢月明中。意愜幽懷澹。神閒客慮空。來朝踏塵去。更起步深叢。

孟縣早發洛陽道中

弓衣小隊詰朝閑。岸柳風吹宿霧還。却訝樹頭紅日出。隔河青見洛中山。寂歷荒郊向晚過。道旁高塚鬱嵯峨。珠襦玉柙三泉冷。月黑楓林鬼語多。

面面青山是洛州。黃塵無際碧波流。荆榛不獨銅駝恨。十里寒蕪冷似秋。
園中春色麗甚。觸懷爲詩。

又到嬉春中酒時。苔青幽院捲簾遲。花前一事關情甚。覆盎門東賣酒旗。
拄笏空亭日欲斜。林光池影映烏紗。黃蜂紫蝶入牆去。一帶綠楊歸晚鴉。

錢維城

字幼安。號稼軒。武進人。乾隆十年殿試第一人。及第。官至刑部侍郎。卒。贈尙書。諡文敏。有佘山集。
任邱縣

我行任邱縣。頓覺行路好。泥乾少顛躓。馬足亦輕蹻。頗疑民氣開。共訴膏澤少。插秧雖已多。結穗日就槁。
前朝過涿鹿。夾路秀梁稻。豈意百里間。造物判殊巧。縣尹塵土來。齋沐方虔禱。具言民艱難。農事非草草。
六月纔布種。田功已不早。典衣備力作。男女盡耘耨。夏秋五十日。縱雨亦微小。已空室中財。徒得眼中飽。
豐隆遂終臥。家室恐難保。我開心瞿然。歎息視天表。迴斡當有神。盈虛亦天道。宵來起微陰。竟失衣上燥。
庶幾雨濛濛。忽復日杲杲。凌晨登前途。泥滑任馬倒。

舒城旅次作

王安石通判舒州
以文彥博薦召入

宋業墮神宗。安石實首亂。時真寬法網。天末快窮竄。如何學士口。臧否尙相半。賢奸無首鼠。少正尸兩觀。

文章工何爲。斯高亦篇翰。趙高有發歷篇。餘毒乃紹述。安足誅京貫。點火熾廣原。百物遂焦爛。詎惜彼灼威。而忘星星炭。理亂非一人。財用司其券。不聞治成康。囂然起嗟怨。大臣操國紀。得主患不斷。忍傷天下心。矜已伸一見。前朝紛礦稅。神廟惑寺官。藍袍翻御床。思陵可勝歎。

桃花嶺

陟巘疲千盤。幽壑屢迴迓。遙見前山人。招手可共語。層峯起跼下。瑣碎不可數。白雲滄其間。倏忽若吞吐。深秋無定風。容易作晴雨。石窄滑不支。礮深危敢俯。螺旋已無經。蟻附復可取。人生苦局促。擬擬羨鳥羽。未盡三十程。曠輪過停午。

觀瀑

靈泉竇雲根。飛洒自天半。初如匹練下。觸石遂零亂。飄蕭恍雨霰。隱約冒苔蘚。霧氣霽虛亭。霏微着几案。潭底無定珠。東西濕遙岸。客遊涼素裹。屢欲衣裳換。失口訝垂虹。驚風忽中斷。雷霆乍砰擊。琴筑復疎散。誰噴冰雪懷。高唱接雲漢。太白今則遙。翹首再三歎。

定遠山行見田間蓄水有法禾黍暢茂卽事述懷

山田上下如割棊。十步五步溝通池。農家婦子水爲命。蓄積升斗同金費。節宣起閉重分寸。兼察地勢分高卑。自然服習等臥起。非有智巧誇神奇。氣疎每至風雨好。澤潤并得癘札稀。揚州厥土惟塗泥。田實下

下經所嗤。溝渠未失古遺意。東南財賦天下推。北方惰農亦鋤犁。禾生滿野無町畦。關門枕肘問晴雨。嗷嗷開口憑天時。禹勤畎澮首竟冀。誰其墮者不可稽。遐哉衛李安所責。荆吳亦豈當年基。屢煩明詔拯瘡痍。亦有使者紛驅馳。奉行豈必盡不善。事等創造驚愚黎。中丞崔公紀昔分陝。下令鑿井民猶咨。於今稍稍食舊德。樂成圖始理則歧。況今屯種險安西。輪臺蒲海咸得治。遂人瀦舍職不講。奚取百萬供軍資。安得九扈官農師。赤墳白壤澤畢陂。遊談莫問是與非。滌池汨汨禾離離。男耕女饁不敢嬉。三錢斗米何足希。

屬疾寄曹劍亭

微疴如小隱。閉戶卽山林。節序拋孤枕。生涯賸苦吟。霜中羣木盡。雨後一燈深。持此蕭閒味。應符靜者心。

寒食齋中卽事

寒更已蕭寂。近岫復便娟。清磬上明月。孤琴流暗泉。投林山鳥適。背郭草堂偏。此夕念湖海。予懷正杳然。

分綠軒對月

夕景清殘暑。涼生滿院霜。不因風動竹。未覺月侵牀。有客吹長笛。何人倚曲廊。吳歌傳子夜。歸夢隔蒼茫。

雨後過平陽縣時奉命往泰安

雨過空翠滴。風轉弱雲低。一路杏花發。滿山春鳥啼。人家斜崦口。城郭夕陽西。不信塵中得。行行惜馬蹄。

桃城舒城縣北三十里繁盛過於縣城其名無可致稍南為北渚有類曰人在鏡中

五里桃城路。烟花夾岸多。秋風吹北渚。日夕起微波。巷有周郎曲。人傳小吏歌。塵沙騎馬客。自笑鏡中過。

舒城縣同年姜王田曾宰此縣有春秋山形如臥龍李伯時讀書處亦名龍眠山

山翠落龍眠。孤城起畫烟。風辭昨夜雨。雲作去聲早涼天。香稻千村熟。清池一邑傳。關心詢舊尹。此地有名賢。

文翁舒城人

桐城山中曉行

山行愛侵曉。松露滴人衣。晴旭澹空翠。虛嵐澄素暉。村烟看始上。谷鳥試初飛。及此諧清曠。何妨暮色微。

新秋雨後夜坐

斜陽殘雨外。一半作秋晴。雲葉飛無定。檐花落漸輕。螢流深樹影。鐘隔遠溪聲。靜愜幽蘭意。方凝玉軫情。

蛩

商聲不在樹。空砌結秋心。久客苦長漏。騷人愛短吟。并添四壁靜。獨對一燈深。復有清砧和。能無白髮侵。

十六日晨達温州

潮駛三更落。風平一葉輕。晴巖明海色。寒樹雜江聲。鳥語喧山寺。人烟護郡城。為耽遊興好。遲爾半帆程。

登樓

萬樹斜陽迴。西風滿小樓。海雲多作雨。山氣易成秋。歸馬高城暗。殘蟬古寺幽。披襟聊騁目。暝色一窗收。

懷儂歌

永巷聞歌聲。歡愁不同調。儂情一寸燭。能得幾多照。清淚掩重袖。君行豈忘家。須知鸞鏡影。不是菖蒲花。

月下吹笛

碧雲無際海天長。十二樓頭思渺茫。一曲落梅吹夜月。霜華飛下薄羅裳。

蔣元益

字希元。號時庵。長洲人。乾隆十年會試第一。官至兵部侍郎。有志雅齋詩鈔。

月夜追和碧城韻

含情脉脉倚闌干。料峭吟肩不耐寒。欲破閒愁憑綠蟻。難通芳信憶青鸞。靜中鈴索分明聽。遠處簾櫳約略看。怪底烏龍頻吠影。想風微動月如盤。

泛舟至法海寺

煙艇夷猶去路賒。尋春蕭寺夕陽斜。風迎桂櫂聽歌客。影亂湘簾隔水花。載酒俊遊消此日。帶人濃艷落誰家。暮鐘欲動香塵遠。擬認輕雷逐鈿車。

閱鸚元

字少儀。德清人。乾隆十年進士。官至江蘇巡撫。

中秋夜登州試院和吳沅春韻

乘槎直到海天東。秋意蕭騷興不窮。萬里相看明月夜。三山半落酒杯中。魚龍寂靜波濤闊。樓閣清寒嘯詠同。最有吳剛工斫桂。香風飄拂滿簾櫳。

李友棠

字西華。臨川人。乾隆十年進士。官至工部侍郎。

辰陽關

叱馭入沅陵。高下羅衆皴。幽探歷荒林。煙霏阻遐觀。卓立山骨開。垣墉森傑構。湍激石齒齒。靈淵滴潏潏。犖确逕愈微。僕捕愁馬仆。輿丁引雙繩。推挽翼左右。雄鬪勢撐霄。巉絕信天就。自可九泥封。那容方軌驟。吳淠昔披猖。伏莽餘殘寇。釜魚喘尙延。檻獸困猶鬪。開府九伐崇。問道千金購。沿溪出奇兵。遂使虜巢覆。介然成康莊。行旅來輻輳。層坡無曠土。原田紛錯繡。隔嶺聞吠鹿。飲谷見懸狖。遺聞故老傳。承平百年後。履茲周道直。盡歎戰功懋。稅駕日將逋。山前有孤塚。

由文德關過相見坡至華嚴洞小憩

紉如街鼓猶頻敲。荒雞山郭鳴嚶嚶。俶裝西出臨遠郊。浮嵐冷霧霑征袍。綫路漸逼黠廳巢。幽壑俯見杉
篁梢。晨星磊落高晏拋。日出下界聞喧呶。峯迴逕仄誠崑庠。誰遣五丁開磔礮。石崖中斷風颭颭。當關一
夫如虎虓。仰攻坐廢千衝輜。何須百二誇函峒。遐觀又怯岡巒巢。三峯矗立殊顛顛。遷喬入谷登降交。向
背起伏揚旂旛。車騎歷歷無遁潛。僕夫竭蹶汗流骸。朝饗遙指前山坳。道人行脚僧打包。我亦瓶鉢隨身
捎。齋廚野簞陳尊肴。洞門呀豁噓笙匏。揮斥二酉凌三茅。華嚴法界非虛談。巖窟枯籐罅蠨蛸。雪色蝙蝠
深壁抓。暗窺但覺寒生髻。試秉烈焰驚潛蛟。石髓凝滴形媼媯。天花紛紛綴優曇。大千色相同影泡。羊鬚
有珠充僊庖。雲漿一吸超凡胞。悔不深入中心慄。此間結宇饒芻茭。烏犍百尾耕荒磽。艸堂肯使嶽隴嘲。
漫譌長句資謹譏。小肯爲記郵程鈔。

荆門雜詠

憔悴江潭賦九歌。楓林葉下洞庭波。蛾眉自古傷謠詠。獨采秋蘭弔汨羅。
蒼茫雲樹隔昭邱。悵望秦川萬里游。遷客依人懷抱惡。不堪回首仲宣樓。

宋弼

字仲良。號蒙泉。德州人。乾隆十年進士。官至甘肅按察使。

題蓮洋山人集

誰掣鯨魚碧海。中玉溪端是出羣雄。臨川獨具千秋眼。爲許樊南繼杜公。
虎氣龍身豈久藏。華陰赤土拭干將。當時夜夜豐城色。曾掩星文北斗傍。
蒲坂遙連太乙山。二州八水照孱顏。如何姑射仙人宅。只在河聲嶽色間。
妙解惟應慧業知。生天成佛漫相疑。傳燈消息分明在。看取拈花微笑時。

江權

字越門。歙縣人。乾隆十年進士。官夔州府知府。

自通江至南江縣途中作

肩輿怯崇岡。盤辟不敢上。僕夫左右從。宛如牽百丈。川塗各舟車。形狀已非兩。自茲及南邑。山石間林莽。
尺地無透迤。百里失曠爽。烝徒時陟降。一身勞俯仰。念此山中民。跬步嘗負樞。日暮尋寒寺。深樹一鐘響。
自劍州至蒼溪縣途中作

兩劍爭嶙峋。過此稍夷坦。驛路絡山梁。古柏翼長坂。夾道散清影。森森寒欲晚。州城半在山。城下一溪滿。
涉溪下層巒。欹仄愁偏反。叮嚀告僕夫。日高行且緩。言尋招提宿。道路加餐飯。古寺多悲風。林聲夜未斷。
明發望蒼溪。朝煙已在眼。

南江縣大巴山途中作

流氛恣蕩析。蠶鳥髮土滿。生聚今百年。荒蕪尙在眼。茲邑更僻陋。崖壑深且遠。夜黑虎豹叢。日日行人斷。巴山兩巖崑。拱立如相伴。大巴小巴相隔約五十里中有尋丈地。稍稍露平坦。下令招流移。畫疆授生產。今來省耕斂。出郭經折坂。盤旋渡難水。水名往復似縈綰。行行巴山道。冰雪猶未散。深山多餘寒。燒畚亦已晚。民戶爭來迎。暮雨就行館。

銅鐘行

靈樓江上百尺高。夜深風雨爭喧號。陡聞有物在空際。吼聲動地如蒲牢。晨興相顧各詫異。上躡層梯辨真僞。四壁蕭條入闕空。鐵繩貫紐洪鐘絕。初疑神物不敢櫻。神靈呵護蛟龍鳴。視之駘目色斑駁。聽之震耳聲鏗鏘。須臾若抗復若墜。摩挲細讀行間字。武氏長安是建元。大撓甲辰當歲次。吁嗟運會不可長。人間彈指成滄桑。此鐘歷劫未磨滅。尙說流傳自李唐。是時唐室方不競。龍漦坐攝中宮柄。夷滅宗潢逐帝儲。才人作后還稱聖。萬象神宮制作垂。昇仙太子紀穹碑。制成奇字書青簡。欲比蒼靈萬古師。以囙爲月囙爲日。轉注諧聲皆勿律。迄今題字尙依然。諦觀洵是當時物。星移物換幾千秋。雲散風流一轉眸。景王無射歸何處。獻子歌鐘不可求。金輪御世經千載。追蠡上聲歸然仍獨在。僞符贗鼎旣流傳。何妨拂拭生光彩。百年高閣尙雄尊。萬物顯晦同朝昏。未審浮來自何日。想見逆浪聲崩奔。鐘鑄自合州相傳從嘉陵江浮來

湖海詩傳卷十一

盛錦

字庭堅。吳縣人。諸生。著有青樓詩鈔。

蒲謁山房詩話。青樓詩以入蜀爲第一。世人輒以杜少陵王新城爲比。然不知少陵由秦階經桔柏渡而至劍門新城。乃從夔翔寧雞經漢中。以至寧羌陸路不同。若青樓取道歸州。穿夔巫入成都。卽吳漢伐公孫述之路。亦卽放翁入蜀新城出蜀之路。其也。雖皆屬天彭井絡。而山川形勢迥殊。放翁雖有鐵馬西風大散關之語。其後封爵渭南。而南北棧實未按響及之。故諸公摹寫山水。各傳其勝。論詩者乃并爲一談。正如屈政之蟲方隅之眼。宜見笑於通人也。

履霜操自注。盧有撫琴渡。相傳尹伯奇彈履霜操處。遂疑是作。

霜皚皚兮瀟之澌。兒弗履兮畏我父母。叶兒身載寒兮。兒心載苦。兒心兮父心。兒身兮母身。寒兮苦兮。實傷我親。兒罪兮莫道。親心兮可轉。俟日出而回光兮。履霜亦暖。

十二碛

羣峰束奔流。虎牙怒相向。對峙十二碛。羅列鐘鼓狀。巔崖矗層霄。旁竇穿激浪。峽泉落九天。洶洶翻海藏。撐舟出井底。篙師氣先喪。衆工捷如獠。百丈緣壁上。木末縱飛騰。山凹迭升降。一鼓更作氣。千篙力誰讓。造化何神奇。設此待霸王。頗聞白帝子。於此拒漢將。鐵鎖貫浮梁。金戈森衛仗。蕭銑復何人。屯兵倚疊嶂。

羣雄電掃空。故壘猶在望。平生歷險巖。未若茲遊壯。萬里投蠻荒。一身墮煙瘴。風餐案傾欵。水宿魂震盪。搜奇命轉輕。得句神益旺。詎畏前途修。瞿塘險如象。

空舸峽

出峽復入峽。兩岸插青冥。中流逐狂飈。奔騰萬馬聲。下灘梭一擲。觸石危橋傾。逆挽勞百夫。十步九倒行。力盡聽所止。刺篙輒迴汀。愛此民居壯。凌空駕軒楹。宿雲出洞戶。古木撐巖屏。驚猿或挂樹。怪鳥時一鳴。捫蘿上絕壁。山風動冠纓。呼童拾錦石。信手扳雜英。興幽忘涉險。矚目多怡情。前途苦逼人。絕境難久停。過午巖日晦。磊落見數星。厓黑畏突虎。蠻語頻丁寧。移舟近湍激。拍枕聲鏗鏘。骨肉緣久斷。中宵夢亦清。狂吟出險句。那顧鄰舟驚。

過灘

重峽間百灘。一灘度一厄。江渦衆壑趨。厓口亂石積。大石疊龜鼉。小石攢劍戟。中流若沸川。翻倒蛟龍窟。牽舟逼下流。凜若阻兵革。長篙拄峰腰。遠纜走山脊。鳴金築衆工。銳進不盈尺。一絲中迸斷。百里供一擲。觸石無完艘。沈淵有驚魄。是時雨初霽。沙石多滑澤。亡命爭上厓。匍匐落冠鳥。婦孺互扶攜。雞犬任狼藉。暫脫魚腹災。波濤亦衽席。轉思斷鼉初。四極奠磐石。豈其禹力衰。此境終未闢。吾尤昇巨靈。何惜隻手擘。天宰眞夢夢。人事日偏窄。波靜有潛鱗。林深多斂翮。寄語營利徒。勿作遠行客。

峽夜

噉噉猿啼夜。淒淒鶴唳空。斷崖開四壁。深井落孤篷。樹漏暫明月。湍驚無定風。萬重雲水隔。歸夢亦途窮。

虎牙灘

楚蜀分爭地。雄關扼怒濤。灘聲牛峽轉。山勢虎牙高。巖樹丹青雜。舟檣上下勞。新詩橫槩賦。旅興一時豪。

曉發

曉發東安道。輕霜淨馬啼。亂鴉僧閣外。殘月女墻西。春冷花猶斂。沙平路欲迷。東皋待時雨。取次把鋤犁。

老將

白髮枕戈眠。黃沙帶甲穿。風雲經百戰。筋力盡三邊。舊識飛狐路。高談射虎年。聞笳心未死。尙想勒燕然。

登忠山謁武侯祠

瘴煙開曉霽。振策上忠山。霸氣餘三國。江聲走百蠻。懸崖祠屋古。割地陣圖閑。檜柏陰風起。疑提鐵騎還。

登白帝城

萬仞墻臨灩澦堆。子陽伯業割江開。白鹽峰對城頭出。巫峽帆從地底來。雲起化龍迷故井。風生躍馬有高臺。漢家陵闕同灰滅。淚盡寒猿日夕哀。

白帝城謁昭烈武侯廟

永安宮殿峽江頭。一體君臣祀武侯。天祖式臨傳詔夜。風雲變色出師秋。鳴鑾久絕空山道。籌筆猶懸古驛樓。瞻尙死忠。諶死孝。千秋配食重詒謀。

蜀道寫懷

辭家動作經年別。去國眞成萬里遊。淚眼已枯猿嘯夜。鄉書空望雁來秋。露叢路險連雲棧。鹿角灘驚上峽舟。心折江陵灌園叟。黃柑千樹比封侯。

舟抵瀘洲

錦江直下古城壕。地入炎荒近不毛。萬里親朋勞夢寐。十旬餐宿托風濤。征蠻羅甸軍聲遠。諭蜀文園築高。掃盡瘴烟開郡閣。岷峨天半落揮毫。

任城使院晤翁霽堂有贈

並馬長安憶舊遊。逢君道氣振高秋。酒徒半散荆卿市。詩版孤懸李白樓。握手星辰搖短劍。離心風雨送扁舟。明年醉我南池上。須典千金紫綺裘。

題杜文貞公南池新祠

自注沈某園侍御建。有公像。配以許主簿。

浣花遊蹟寄南池。洗馬鳴蟬感替時。遇主名高三禮賦。懷人心折八哀詩。鑄同賈島應呼佛。繡比平原合買絲。玉貌仰瞻如舊識。憶曾親拜草堂祠。

白蓮

玉井分栽到野塘。冰綃翠袖迴生涼。半江殘月欲無影。一岸冷雲何處香。真相尙留開士社。紅衣盡洗美人妝。水仙操罷扁舟去。誰與凌波解珮璫。

過渝州

月落清溪放櫂來。渝歌聲接楚猿哀。濤廻峽底三江合。壁立城頭萬戶開。貔虎尙屯巴子國。龍蛇爭避夏王臺。何當振策塗山頂。黑水茫茫辨九垓。

別兄弟

未斟別酒已傷神。四海終輸同氣親。此去白雲天萬里。望歸無復倚閭人。

別家人

伏雌烹罷勑加餐。秉燭喃喃語夜闌。點檢篋中裘葛具。預知別後寄衣難。

周準

字欽菜。號迂村。長洲人。諸生。有虛室吟稿。

蒲褐山房詩話。陳恪勤頌繫京江。迂村往從受業。及至京師。不交權貴。志節皎然。雖東漢人獨行。不
是過矣。沈文愨門下。承其指授者。以盛青樓周迂村。顧祿百。陳經邦爲最。其後則王鳳喈。錢曉徵。曹
來殷。稽左。崑趙。損之。張廷時。及予。後有攷詩學源流爲接武羽翼
之說者。不可不知。若企晉。雖曾親風旨要。未嘗有瓣香之奉也。

登北高峰絕頂

茲峰俯煙波。盤屈勢高峻。紆餘篁竹間。廻顧已千仞。澗滿藤陰垂。崖傾鹿蹟印。當其險初履。早識境逾進。潭憐空翠入。壁訝丹霞襯。寒嶠帶漁汶。晚帆凌雁陣。散情有遐致。舒日無留瞬。會稽渺天末。隔雲遙可認。何當泛越舫。一爲窮南鎮。

晚從冷泉遊。遂止招提境。入門聞清鐘。孤閣夜方永。傾耳聽泉聲。聲喧意彌靜。朝來小雨過。宿霧散高嶺。憑窗見層峯。澗壑殊清迥。不知曉雲過。但覺衣裳冷。清颺動林薄。初日照山影。行當訪韜光。直上松雲頂。

發朱砂菴逕觀音巖登石人峰

言採黝山奇。早別朱砂石。升厓得險境。指示已悚惕。熟遊尙色變。何況遠來客。凌空四無倚。投趾不容隙。壁削綠藤行。崖傾藉人掖。所憑勇往志。不隨艱苦易。幽巖旣已經。危峰自不隔。振衣造其巔。奇勝在咫尺。俯身入煙蘿。欲詣仙人宅。

緣天都峰趾度雲巢洞上升仙梯遂憩文殊院

天都信岩嶠。特立若翠屏。取逕過其趾。俯仰皆奧境。松石俱象形。巖巒類盤纒。將陟目屢眩。恐墜心更警。行經陰洞中。恍惚陷深井。須臾從井出。冉冉首露頂。流盼多創造。不類人世景。境斷緣梯升。氣逼毛骨冷。意堅斯有獲。出險真自幸。向晚憩禪扉。一燈照孤影。

長江萬里圖

江氣溢素練。江濤走虛堂。風吹江草杜若香。江源萬里遙相望。我昔經行武昌岸。計程未及江之半。天清
鄂渚見千里。惟有巴船出雲漢。楚寒別來三十載。披圖忽覩全蜀在。巴水盪迴控峽山。拂雲帶雨蒼茫間。
鼉鳴蛟宮猿嘯窟。驚浪不礙漁舟閑。十二峰高如可攀。雲旗恍覩神女還。反思往日遊趾窄。異境未極空
惋惜。白虎關。黃牛驛。引我夢魂重挂席。竹枝歌罷江天碧。

游空谷法螺諸菴

樹密路疑近。峰迴徑復分。泉聲喧亂石。花氣暖晴雲。碧澗印人蹟。蒼厓下鳥羣。坐憐紺宇接。到處絕塵氛。
送陳原一之官甘肅

旅食京華歷幾霜。一官纔喜赴莊浪。六盤舊著唐宗蹟。五衛猶傳漢帝疆。山逼屏河分井鬼。地連沙漠雜
氐羌。西風匹馬衝塞去。早識安邊有定方。

行經拂水山莊

扁舟汎汎趣南沙。倚杖愁臨澗路斜。孝穆荒齋猶竹石。摠持故宅尙鶯花。名高那許遺簪紱。情重難教棄
室家。太息百年同逝水。淒涼還爲惜才華。

晨目松陵歸渡太湖卽事

迴望垂虹隔杳冥。湖波浩渺快揚舲。半篙日氣霧中白。萬點浪花煙外青。隱隱榜歌來雁汶。淒淒漁笛出雲汀。還憐心切鄉閭近。未暇攜筇訪洞庭。

題秦餘女史所畫楚辭圖

繞雲煙浪洞庭深。芳杜幽蘭遍水潯。北渚已傳湘女恨。南征更識楚臣心。雲中桂櫂聲疑咽。天際瑤臺影乍沉。寫盡離騷無限意。竹枝歌罷又猿吟。

江上曲

空江潮落水茫茫。南楚征途萬里長。爲是曾經分手地。不聽離曲亦神傷。

蝴蝶詞

萬花谷裏逐芳塵。自受翩躚粉澤新。多少繁華任留戀。不知止是夢中身。

漢川

漢川城郭枕江隄。黯黯烟波日乍低。我欲停橈訪神女。暮山無際楚雲西。

陳魁

字經邦。長洲人。諸生。

月夜聞笛

訪沈石田舊居

裂竹蒼龍吼。飛聲入暮林。誰將折柳曲。吹我故園心。風雨有時作。江湖此夕深。倚樓人不見。規月吐遙岑。
故里荒祠在。鄉鄰尙典型。浮雲看富貴。介石寄丹青。世路憐皆濁。吾生任獨醒。弋人何所慕。鴻漸久冥冥。
秦箏曲

秋夜曲

珠箔初開急。柱鳴錦衣畫。閣坐彈箏。十年夢斷伊州月。猶帶淒涼隴上聲。

顧詒祿

字祿百。長洲人。貢生。有吹葭閣詩鈔。

宋楊西平郡王碑

涇原突騎如鷲馳。德宗避狄離京師。兇渠乘間竊神器。羣寮俯首朝塔墀。西平聞風奮勇武。提戈隕涕驅熊羆。飛狐夜出臨渭北。六軍感激忘其私。錦旗繡帽立陣上。欲使衆睹英雄姿。賊平人不識旗鼓。三代罕有師神奇。肅清宮禁迎帝駕。鐘簾園寢均無移。帝還駐馬重嘉歎。生臣扶國蒙天慈。節兼隴右位元帥。長城永賴威邊陲。恩延後嗣繼台席。殊勳表請銘鼎彝。裴公文章柳公筆。銀鈎鐵畫辭淋漓。流傳搨本自宋

代千載展誦虹霓垂。有唐中興功再見。惟王名與汾陽隨。如何君聰蔽奸譖。中道罷鎮空羈縻。宏才遠略置閒散。七年轉側懷憂疑。平涼劫盟國再辱。萬乘反受蠻夷欺。鹽州克復念王績。靈座始以新鹽遺。乃知乘軸貴賢相。社稷於此關安危。

朱碧山銀槎歌馬嶰谷席上賦

舊聞漢帝驚遠略。遣使西域尋河源。乘槎浮海歷歲月。誤入牛斗逢天孫。正史莫載疑杳渺。齊諧有志勞

探緝。漢書張騫傳載漢使窮河源無乘槎事博物志稱天河與海通有人資糧乘槎而去見織女亦不指騫惟梁宗懷荆楚時記始合而爲一云碧山一老信好事。鎔金想像

成芳樽。霜皮老樹苔蘚剝。摧牙落角千年根。綸巾踞膝氣傲岸。仰視四際雙眉掀。古來銀工不多數。朱碧

唐卿二謝君餘弟與昆。碧山神妙技尤絕。盡洗鑿斧無纖痕。槎旁款識刻至正。當時虞揭通交謹。閱今四

百有餘歲。市朝屢易多更番。人間重器半銷毀。此槎未省何由存。主人博雅富金石。愛護奚啻虞雉敦。酒

闌出槎重勸客。滿斟敢惜夕景昏。垂髻廻憶侍秀水。閑舉經眼皆瑤瑤。羽觴玉爵見無算。獨有一鱉傳前

元。聞之卅載恨未覩。把玩頓慰心神煩。談深飲劇漸酩酊。忽據班傳興狂言。竊當建元月氏返。具述天馬

生大宛。發兵取馬距郁城。六千騎卒空含冤。我思竊罪在不赦。胡爲寶此重錦捫。主云竊初羈外國。持節

弗失懷君恩。人生一端便足取。議古那許深文論。斯言可聽試再酌。坐看落月橫西軒。

大將星芒落，沉冤向此中。十年勞戰伐，三字痛英雄。復見神州陷，虛期漠北空。錢唐司馬在，相對泣孤忠。
虞山經拂水山莊

平泉竹石久凋零，寂寞空山戶盡扃。啼鳥尙來江令宅，蒼苔欲沒子雲亭。生前名字傳鈞黨，身後文章見典型。輸與東臬瞿給事，千秋汗簡自垂青。

韓 騏

字其武，吳縣人，貢生，著有補瓢集。

龔恪中餉鮮荔枝賦謝

頽虬遺卵閩海濱，火齊磊落炎雲屯。千林一掃附海舶，南風五日來吳門。吳門寓公閩中傑，然諾平生一言決。滿瓊投將赤鳳珠，開緘訝入驪龍穴。斑竹几陳綠玉盤，擘開紅縐浮精丸。高堂白髮添燕喜，稚兒黃口辭朝餐。入口水綃氣清馥，齒牙特倩瓊漿漉。全家骨肉飽啖餘，遍及親隣又童僕。漢宮百本交趾栽，唐殿七日涪江來。數枝碧葉菁華盡，一騎紅塵笑鬢開。何如心交出片語，水遞分甘舊相許。望梅安用樂天圖，畫餅欲廢君謨序。人生嗜欲良有繇，不知其味吾何求。一朝饜飫生色相，夢魂夜夜楓亭游。陳家紫方家紅，絳苞玉液紛成叢。老饕欲語顏還赤，珍重期君歲一供。

題馬湘蘭爲王百谷畫蘭

秦淮水色通江綠。教伎樓頭沸絲竹。春風領袖號湘蘭。生小幽懷託空谷。吳門才子丞相賓。風流本是同心人。紅妝不但烟花主。白首終期翰墨親。剡溪雲染湘江佩。葉翦蕭疎花向背。亭亭修竹倚孤叢。投贈分明兩相配。尊生王氏齋名玩好誠難偶。錦軸牙籤間敦卣。珍重標題作契兄。契兄依稀硯席同良友。二百年來供賞鑒。猩紅小記畱親驗。會聞十斛買名姝。豈惜千金酬素艷。長板橋南暮鶴橫。金閨亭館蘼蕪平。當年十日酣歌舞。何似香從玉腕生。百谷七十誕辰。湘蘭女樂張筵十日爲壽。金閨傳爲盛事。書生薄命甘同妾。人世穠華摠灰滅。美人名字足千秋。一幅清芬歎雙絕。書生薄命原同妾。百谷句也。

曉渡揚子江

月落未落天轉風。榜人呼噪船開篷。老夫睡眼揩朦朧。一葉已在江流中。是時殘月猶泛水。金光烟燦馮夷宮。須臾日破海雲出。赤燄正射浮玉峯。金烏玉兔兩交暎。奇彩頗恨言難工。蝸廬貪睡晨懶起。而此絕境殊難逢。孤舟昨日繫江滸。眠食不快愁蘊隆。豈知江神釀靈異。使我一旦開心胸。葉葉帆移雁陣起。層層浪簇魚鱗重。遂從江南達江北。涼颼簌簌菰蘆叢。無風三尺浪安在。一衣帶水何能雄。所嗟白下路甚邇。江源須向峨眉窮。

太真扶醉上馬圖

潼關一戰哥舒虜。霓裳幻作漁陽鼓。倉皇騎馬出都門。鈿盒金釵傳恨譜。圖中景物亂未逢。繁華天寶如

夢中玉環扶醉乘花驄。鈿釵欹側雲鬢鬆。金銜玉勒誇芳穠。得非驪山賜浴罷。或是曲江歡宴終。阿姨丞相各歸第。明皇前導力士從。餘興欲入連昌宮。彼昏醉眼方朦朧。桃花浥雨印頰紅。回眸一盼生春風。是時延秋烏未語。萬歲千秋樂相許。玉杯春薦荔枝香。回頭石馬嘶風雨。

題畫陳搏

退步英雄事業輕。睡中籌畫最分明。華山不與陳橋變。卻爲人間計太平。

題趙丞旨畫蘭

花花葉葉帶春風。自出王孫揮灑工。猶有遺民作心史。也將餘墨寫幽叢。

李果

字碩夫。號客山。長洲人。布衣有詠歸亭詩鈔。

蒲褐山房詩話。客山艱苦力學。忍飢誦經。衡門兩版。竟日翛然。良友至。輒呼小童取一錢。就茶肆瀝茗共啜之。樵蘇不繼。怡然自得。巡撫宗室雅公嘗過次山侍御。叩以吳中隱君子侍御對。以客山及惠松厓公。遂往造焉。避而不見。時人兩賢之。其後詔徵經學。總督黃文進以松厓薦。亦雅公所推轂也。

善哉行

富貴可樂。不如神仙。文章雖美。不如金錢。解一得志何常。貴在乘時。騏驥躡躡。驚馬先之。解二舉足宜慎。臨淵履冰。志士守貞。憂心兢兢。解三去日苦長。來日苦短。河流箭疾。時不可緩。解四讀書味道。耕於南岡。知足不辱。

庶幾安康_五
解

示兩兒

初冬可讀書。披帷對月影。困窮亦何常。天意默示警。所期在遠大。忘此清夜永。經義纂孟口。如汲得修綆。摛辭斐繆悠。百家足馳騁。蘊輝珠處淵。含英金在礦。世人競目睫。欲語還如哽。但求寡悔尤。焉用名炳炳。馬援厯聞過。柳玘重行已。吾家舊遺經。先德盛積累。黽勉無異營。頗識剝復理。中誠偶行游。致汝業漸弛。我無一頃田。經籍足耘耔。義理苟能通。出處有根柢。鑿藥與貨殖。困窮亦可倚。吾生少失學。垂老方知悔。展轉力就衰。炳燭思曉起。努力愛景光。汝曹從此始。

月夜黃姑灘露坐東山中一二知己

懷幽路轉紆。領異行復卻。寂寂黃姑灘。波光動林薄。臨流擷芳芷。月向懷中落。露下不知寒。空巖鳴獨鶴。坐久發微吟。覽物感離索。美人渺何許。吾懷向誰託。

還舟西津回望支硎天平山色

迴舟指西津。水淨寒波細。卻顧所來路。峯峯隔雲際。昨日別山阿。今朝復鼓枻。渺渺青芙蓉。欲去還含睇。重岩烟未沉。遙山樹如薺。何當復來游。咫尺悵迢遞。

王將軍劍歌

神物鑄成干將手。三尺蒼龍半夜吼。七星吐燄燭銀潢。魍魎潛藏白猿走。將軍匹馬來疏勒。手握寒光邊塞吼。贈將海內有心人。風吹一片無情色。半行籀文不可認。血花點點荆卿恨。平生慷慨思報恩。尊前睚眦何須問。

題黃山圖

黃山之高高插天。三十六峯橫雲烟。陰晴朝夕歛變化。畫師無數誰能傳。須江朱子本奇士。爲愛黃山入山住。興來拂素一寫生。筆底如有靈山助。蓮花天都何崔嵬。咫尺之間萬象開。傾岬疊石盡奇狀。飛泉倒瀉青莓苔。此外奇峯三十四。高低隱現無倫次。紫石朱砂峯色殊。指點丹青恣遊戲。山風習習山霧昏。淋漓潑墨俱無痕。雲翻滄海濤崩奔。猿吟鶴唳杳莫聞。蒼岬古木一氣吞。雙手展卷不敢捫。更恐虎豹深林蹲。寒瀑萬疊長松根。側見仙人倚吹笛。欲往不得傷精魂。世上喧卑那可道。振衣我欲茲山老。請君放筆爲我謀。一椽寫向何峯好。

晚菊

迎冬方吐艷。籬下竟誰看。豈敢傷遲暮。何妨歷歲寒。孤懷原淡泊。獨立未凋殘。遲爾風前落。騷人佐夕餐。

懷陳處士陽山

老臥天池嶺。寒松骨共蒼。人如陳仲子。詩是孟襄陽。有女尸蘋藻。無兒受縹緗。風流今已矣。忍更過書堂。

懷葉荃園黃山

黃山好山色。三十六芙蓉。以爾煙霞侶。高居第一峯。松圍秋屋雨。雲度隔溪鐘。我欲搜奇蹟。憑虛駕白龍。

送方望子還歙縣

千里新安路。君歸別思賒。江船搖夜雪。山驛繞寒花。負米荒城遠。看雲古樹斜。相逢舊隣曲。款款話桑麻。

旅舍喜逢故人

相別情難已。相逢話較多。關河同涕淚。出處各風波。棲隱知何地。懷憂且放譌。無繇及青鳥。長食玉山禾。

范文正公祠

石筍排空山骨清。范公祠廟儼崢嶸。獨從天下關憂樂。尙想胸中富甲兵。晚穗迎霜遺斷隴。寒烏啼月傍丹楹。先皇銀榜龍章在。紅樹階前交映明。

送人之邳州

送子臨歧燭酒傾。獨騎羸馬渡河行。楚州雪霽延年里。淮海風高下相城。地勢荒寒稀見雁。霸圖寂寞罷談兵。橋邊黃石今何在。卻望遺祠亦繫情。

鄭廷暘

字嶠谷。長洲人。監生。有紺珠堂稿。

蒲褐山房詩話。曠谷爲季雅先生子。書法。褚中令。小楷尤工。與予書疏往來。率作蠅頭小字。而銀鈎
鐵畫。出方藏稜。同時如蔣蟠。倚仙根。錢思賢。襄。皆不逮也。詩卷無多。將文肅公稱其姿致無雙。如靈
和殿柳。三起三眠。陳徵君撰稱其意到語工。自
然高遒。今所錄十數首。爲其生平最佳之作。

金陵拜方正學先生祠

讀書抱大節。刀鋸豈所憚。先生聖人徒。乃爲烈士冠。授經潛溪門。卓犖事柔翰。立言金石堅。矢志星日燦。
聿當開創初。旁求棟梁幹。兩朝侍崇罍。休明賴襄贊。詎知鼙鼓來。朝臣且魚爛。草詔不爲屈。正辭責背亂。
寸磔少完膚。十族死奚算。凜矣百鍊忠。千春白虹貫。荒祠長干側。夜夜子規喚。網絲垂四字。蒼鼠走空幔。
儼然見孤像。再拜起三嘆。風馬從雲車。應笑滄桑換。攷古覓殘碑。橫塔蝕落蘚。

九日與嚴大策馬出德勝門由西堤至玉泉山登高作

城西山色青峻嶒。愛之入骨無由登。今朝忽遇重九節。解意況有同心朋。走投小巷叩君舍。出郭兩騎相
驂乘。荒塗昨日風雨後。泥水活活盈溝塍。懶行駑馬畏鞭策。原隰高下猶龍騰。須臾回盼村落遠。長隄俯
瞰秋潭澄。嚴霜未降草還綠。疎柳萬樹垂鬚鬢。經過好景正滿目。不覺迎面烟巒層。年來辭家走京邑。染
衣塵土時堪憎。茲游若在畫圖裏。蒼翠觸眼多非恆。龍山往日擅奇絕。安用對此形誇矜。阮生雙屐辦已
久。攀援直上扶枯藤。振衣絕頂恣憑眺。日色慘淡烟光凝。長林叢木漸凋脫。時有馳突聞呼鷹。舉眸何處
望鄉國。客心怏怏愁逾增。景公徒蒙後人誚。牛山涕泣名誰稱。眼前墟墓積荆棘。羊虎傾倒何王陵。豈保

鼎鼎百年內。爾我攜手頻。相仍晚鐘近。出山下寺更。踏亂石尋居僧。繞門黃葉落。幾許空梁欲滅琉璃燈。
佛前稽首稍共憩。斜陽隱現明觚稜。呼童從此問歸路。莫待東崦寒蟾升。

江上夜泊

夕陽西墮近黃昏。江渚維舟傍樹根。水底雲開浮月色。灘邊風過長潮痕。老僧喚渡欲歸寺。小犬吠人何處村。今夜獨眠思舊侶。自應銷盡客中魂。

返照

舉目山川動客愁。生涯篷轉只悠悠。微雲乍過隔溪雨。返照忽明何處樓。逝水幾曾憐鬢髮。吟情惟是愛林邱。阻風中酒年年事。搖落江村翠竹秋。

無錫道中喜晴卽事

柳色春堤碧似烟。春流兩槩泛吳船。正愁雨細風斜後。恰到浮嵐暖翠邊。擁鼻漫吟蠶尾句。滌甌徐試惠山泉。少陵書籍如括賣。此處堪求負郭田。

暮春偶作

九十春光已漸闌。濃陰一片畫漫漫。無多點雨濕芳徑。第幾番風吹曉寒。纔見柔條舒岸柳。尙教密室護盆蘭。過時未布東皇令。正恐農家二麥難。

題畫新梧清晝景

春盡高枝葉漸添。薄雲纔送雨廉纖。戎葵欲放荼蘼謝。一院清陰到翠簾。

題汪近人春深臥雨圖

竹雞啼雨濕重嵐。嬾看千林綠正酣。卻憶小樓簾不卷。杏花時節在江南。

王岡齡上舍邀游江村園居時屆秋仲桂花盛開是日至者爲翁齋堂徵君吳竹嶼學博沙白岸

葉義山王述庵曹習庵朱適庭張崑南王存素諸同學

壺嶠仙人舉手招。蓼花波影路非遙。榜人笑指垂楊岸。泊到紅欄第幾橋。
西風吹綻小山叢。滿院幽香自不同。好譜廣寒秋一曲。夜深來聽月明中。
北海今朝識面初。掩關爾雅樂畋漁。牙籤三萬鈎簾坐。猶覓人間未見書。
林壑幽奇位置新。不容金粉掩天真。清暉娛處詩情澹。自是停雲畫裏人。

舟行得絕句

一葉扁舟上水遲。頻年客裏鬢如絲。不堪更聽吳娘曲。恰是瀟瀟暮雨時。

金農

字壽門。錢唐人。布衣。有冬心先生集。

蒲褐山房詩話冬心性情道峭世多以迂怪目之然遇同志者未嘗不熙怡自適也嘗論其四十七歲小像蒲州劉仲益題云堯外臣漢逸民著替草帶不諱貧疎髯高類全天真其標格可想見矣中歲爲汗漫游編走齊魯燕趙秦晉楚粵卒無所遇而歸誓願年五十如玉溪生打鐘掃地爲清涼山行者晚寓揚州賣書畫以自給書出入楷刻本之國山及天發神讖兩碑畫梅尤工頗自矜許然爲予揮酒者多至十餘幅今廣陵武林收藏書畫家或未能有此也

宿焦山

縹緲松寥山積翠下無路風籟鐘微茫鶴蹟雲散聚如聞定中僧禪窟勸小住牽月濯巾餅江光漾高樹

畫蘭竹自題紙尾寄程五鳴

江二炳
炎

寫竹兼寫蘭欹疎墨痕吐一花與一枝無媚有清苦擲紙自太息不入畫師譜酬人分精粗妙語吾所取鈴以小私印署名隸書古半幅懸空齋色香滿巖塢隱坐整日看冷吟獨閉戶飲水張玉琴斜陽忽飛雨

吉祥寺泉上十韻

新霽來山中精舍騁游眙始入灌木陰稍深緒風善維南豁平疇極西簷浮巘靜雲一族居幽澗衆流衍洑出浸淺沙濫時破重蘚瀟瀟靈液華涓涓連珠演手剌不亂淆口飲有廉辨卽此澹交訂君子意非舛惜哉無名緇綠塵鬥茶葦明朝續水緣石鼎攜松篔

吳中春雨泊舟入夜寒甚被酒作歌

春雨打篷雲冥冥篷底聽雨泊遠汀十五五長短亭好山對面失洞庭野梅縛棘香零丁疎香激玉飛

瓏玲苦寒瘁。夜不寧。水際一鐙如孤螢。照書冷燄光。星星傾三百杯影。勸形滋味濁。清辨渭涇。醉來荒唐。嗤楚醒。伴我臥者空酒瓶。

臘月二十四日江上無事因出家醞要諸鄰翁小飲

曾讀逸民傳。南邨舊隱淪。清江圍屋樹。寒雨對牀人。歲宴藥苗路。花開酒國春。依然敦漢俗。祭竈請比隣。

懷吳門陸嶠

公子美無度。讀書吳郡間。門留鬱林石。牀對小雞山。終歲淹秋駕。何時綴玉班。殷勤通旅夢。細雨穆陵關。

東岡之下老屋三楹陳文貞公讀書處也予嘗遊憩其間懷企有作

秋氣斂虛館。東岡生道心。林疎風脫翠。山暗雨添陰。既有出烟磬。復多遵渚禽。六時喧寂意。欲繼謝公吟。

初秋養疾焚上

巖居養疾遠郛壘。蓂朮多于粥飯緣。秋澗曲流喧枕上。槐花一寸積門前。未忘舌本思今日。尙損腰圍似去年。雲笈珠林從妙悟。絕勝騶衍共談天。

詣庶滋上人齋堂蔬飯望中條山

久從初地得皈依。紺宇精嚴一款扉。孤竹瘦於尊者相。野雲白似道人衣。何曾心地妨禽鳥。且向齋堂飽蕨薇。試上莓梯腰腳健。中條山色見纖微。

馬曰瑄曰聯兄弟招同王岐余元甲江墳厲鶚閱嶺汪沆陳舉集小玲瓏山館

少游兄弟性相仍。石屋宜招世外朋。萬翠竹聲非俗籟。一圭山遠見孤稜。酒闌遽作將歸雁。月好爭如無盡燈。尙與梅花有良約。香粘瑤席嚼春冰。

秋夜鮑明府鈇攜酒就劉郎泊小酌與姚世鍾同過

秋夜秋池幽且娟。涼鷗涼鷺五湖天。水明于月宜同夢。樹老如人又十年。散髮賀循言可聽。啣杯謝滿蹟堪憐。劉郎泊記思前度。好續吳興掌故傳。

南郭

連峒重阪近幽棲。茱甲抽青自灌畦。剛得天涼三日雨。秋光如水草蟲啼。

曉登煙靄嶺。歷水樂洞轉。憩慧日精舍。覓壁上題名。汎湖而歸。雜書三首寄昔年同遊王吳周

司山志章厲鶚汪沆諸朋好

霧隱雲容翠巘寬。此間濟勝若騫鸞。野梅苦竹無人見。破曉冰霜各自寒。烟林葉盡聲如掃。山鳥日高啼已空。獨立吟成有誰和。一方寒玉水丁東。蛛塵蘚墨認依稀。悵悵題名身世非。坐對諸峯浸湖面。黃妃塔下放船歸。

新編拙詩四卷手自鈔錄付女兒收藏雜題

天涯詩老浪相稱。棖觸清愁歲月增。一櫂今成五湖長。酒波如練雨如澗。
卷帙編完頂髮疎。中郎有女好收儲。帽箱剝落經籬敵。莫損嚴家餓隸書。

詠邱氏古樹

前輩風流一草堂。舊家松柏話勾章。歲寒自有諸孫守。不數成都八百桑。

沈之亮

字咨采。高郵人。子業。富有雪月生涯集。

落花詩

多少繁華曲未終。一年容易費春工。爲憐青眼移時白。不見朱顏舊日紅。乍拂遊絲還着地。欲霑泥絮更隨風。偶然何必分茵廁。悟後應知色是空。

萬點風飄一片飛。年年三月送春歸。再來門戶封塵網。重到園亭剩落暉。滿地綠陰雛燕老。半溪紅漲鱖魚肥。尋芳辜負隣翁約。青草柴門獨掩扉。

亂紅堆砌奈愁何。辜負韶光九十過。謝客恐妨侵蠟屐。問津端擬覓漁簑。江淹賦別才應盡。潘岳逢春恨轉多。太息美人隨逝水。蜉蝣生死暗消磨。

春來早起困蒼鶩。幾度呼童懶不嚮。燕剪枝頭裁片片。馬蹄門外踏層層。分封香國青爲帝。滅度空華老

悟僧寄語深閨遊子婦。高樓無事莫頻登。

陳 皋

字江皋。號對鷗。錢唐人。貢生。

自蓮花池舍車步至天城寺

舍車理箠屨。石路盤谿窅。朝噉在溪門。斷崖露削瓜。冰底啼幽瀨。宛轉行修蛇。兩山裒肘腋。徑轉開衙衙。翠屏駕香界。萬萼青蓮花。平生泉石心。於此興更賒。禮佛向白足。幡影揚寶珈。

晚自歡喜嶺取道西峯樵徑而下

松風吼潮音。澹日西嶺帖。山僧道我行。取徑何蹊蹊。側身穿石門。荒榛齧衣袂。崩崖鬼面皴。暗雨莓苔浹。下臨勢不畱。有似冰帶屨。查子濟勝強。騰身自誇捷。同人怖無言。予亦屢回怯。稍見祇樹林。禪燈出香葉。仰面千仞巔。翠色與天接。不知一枝藤。雙足何由蹠。

登挂月峯絕頂

茲山北戒雄。浮圖聳其上。蜿蜒轉神京。元氣淋漓王。東連碣石遙。西與太行抗。長城一線分。海水杯中醞。微茫十六州。幾點蒼煙漾。竭來據上頭。縱目四無障。白雲在其下。青鳥不得向。況彼塵世間。昏曉自殊狀。日月探兩丸。天風逼衣纊。何來浮邱翁。乞以蒼龍杖。揮手謝同儔。吾將躡瀛閭。

吳燭文

字樸存。山陰人。貢生。有樸廷詩稿。

游硤石山青蓮寺

頭頭止見山。初入疑無路。行腳厲前猛。曲折乃畢赴。精進毋憚遙。仄徑鮮窘步。怪峯高插雲。寒氣慘集霧。小松掛層崖。五粒紛無數。天光見不多。悉爲險阻據。最後得石門。安穩遂平度。豁然淨界開。如迷忽頓悟。當陽結精藍。紺碧輝雲樹。蜂房綴千寮。虎牙磔四怖。中有青芙蓉。村萼玲瓏貝。何年天風吹。墮此冷然御。其麓遶丹泉。危磯激吼怒。遠公擲筆臺。流傳毋乃誤。匡廬真面目。名同實難附。摩詰本無言。涅槃底用注。殘僧如猿狖。但知拾橡楨。禪理誰與談。勝境我幸遇。咄哉賽社人。競登珏山去。

曲陽孫晴崖以府掘地得晉王李克用書安天廟題名碑

陰風撼樹飄靈旗。山鬼吹火燒叢祠。沙觜崩塌露圭角。榮光下閃埋豐碑。孫君嗜古負奇癖。倚撫金石靡子遺。石鼓遙辨趨鱗字。金甌高媲窺軻詞。栽花曲陽有餘暇。命工掘地乃得之。剗泥剔蘚見古刻。傳自唐末僖宗時。隴西郡王忠且勇。中山告急親援師。道經神廟躬禱饗。凱旋賽神神格思。司空偕行名忝附。大書勒石盤蛟螭。歐九作紀軼此事。不學合受原父嗤。有唐晚葉事百戰。文人失職悲流離。鳴張鯨突鳳凰死。文筆亦復歸鴉兒。昭陵玉匣那可得。韓陵片石逾瓊瑰。依稀顏筋并柳骨。孫君寶此勿復疑。嗚呼孫君

寶此勿復疑。屹立直退千熊羆。

陸蘭圃右劍歌

昔觀周生說劍圖。厥衣短後纓曼胡。看畫尙覺神色王。況乃寶物懸庭隅。龜文龍藻光黯黯。莊芻桓葱價俱減。陸君何處購得之。石可中分蛟可斬。行年四十走風塵。磊砢昂藏八尺身。興酣斫地自起舞。風雨馳驟驚鬼神。我聞幽燕游俠子。慷慨願爲知己死。憑將櫛具報恩仇。葬近要離塚卽喜。君也讀書氣浩然。禮干義櫓無與前。恩耶仇耶平等視。所恨不逢張茂先。陸君酬爾一杯酒。拂拭無勞長在手。匣中虎氣任埋藏。自有光芒射牛斗。

扶衣玉刀歌爲朱浣桐方伯賦

維王爲兵傳古昔。後王德薄易銅鐵。耶溪旣涸堇山空。百鍊鋒芒在無缺。此玉原爲溫潤姿。良匠雕鐫異環玦。璞中有刃剖始呈。鞞外流輝襲難滅。一髮晶光冷射人。詎比鉛刀供小割。聞諸帝后御衣裳。用以抹腰無摺襖。不知幾度近山龍。一落風塵尙貞潔。自公購得長護身。人水不濡火不爇。千年寶物會通靈。豈逐烟雲歸變滅。宋家玉斧畫河圖。大渡遐荒外有截。劈正元時朝會陳。明堂丹陛凝寒雪。慨自滄桑世代更。沙漠牟駝等飄瞥。此刀猶幸在人間。黼黻瑤琨兩淒絕。吁嗟公乎慎毋褻。玉恐傷殘刀恐折。善藏鏤鏗養精明。避攝六丁窺太乙。

黃素堂觀察五十初度以朱竹垞老人井田硯爲介爰賦長句以代賸詞

造化輜奇石長壽端溪潛璞尤純堅義取諸井琢成硯水木滋氣耘書田厥銘製自竹垞老

銘云水而風田之容耕不

盡年長豐結隣曾與相周旋曝書亭前八萬卷丹黃甲乙勞磨研伏勝傳經歲九十三食脉望誇神仙我來晉

陽攜作伴汲深繙短瓶徒牽黃公秉節蒞茲土勞農勸相操經權剛中更具教養德心如止水澄波流春
秋恰符大衍數菖蒲九節開華筵鄙人進介乏長物用以此硯申寅虔從來石交能耐久況取井養無枯
偏此硯在公猶在我無得無失何推遷祝公並受明王福有收勿幕孚涓涓汾水春波足灌溉黃河秋信
防淪漣仁人利物不改邑會看萬井譟豐年

德州

斜日陵州渡驅車有所思杜亭無往蹟董子有遺祠春水魚爭上昏林鳥下遲香風吹墨露閒意覓青旗
陸青來見過次韻

濕雲濃霧曉難開剝啄曾無舊雨來舉舉江南重見子滔滔天下孰憐才桐枝乍折無鸞集艾葉如張有
雉媒向後升沉何足計是非都付掌中杯

馮清輔枉顧

經歲羈孤歎苦辛塊然也覺自嫌身親朋遠別無多字患難相看有幾人渺渺烟波愁北渚年年風月負

東隣毀車殺馬從今始。好向汀洲采白蘋。

春日晤廣陵唐再可

歸燕東風作隊忙。相逢燕趙話悲涼。雨中春色隨流水。月下簫聲憶故鄉。塵土難留騎鶴侶。烟波擬買種魚莊。幾番淘洗青衫淚。又爲唐衢泣數行。

賀周石帆學士納姬次符葯林韻

名香百和夜深含。好作同功上箔蠶。應笑香山垂老別。欲翻貝葉住精藍。銅街十二駕鈿車。蠟炬迎來鬢影斜。定向筵前親捧硯。吟成先飲玉蓮花。

趙虹

字飲谷嘉定人布衣。

蒲褐山房詩話飲谷邀游幕府久著才名閒與樊榭翁朗夫查蓮坡諸名士唱和惜老而無子依其姓于吳市中葺一室爲小吳船來訪者遂至若飲子與樊榭徵君定交于此生平能詩工詞兼善駢體效皆散佚故所存詩止此其寓竹西亦久常主許孝廉荔生家其序葦生槐墅詩鈔極爲婉麗

揚州

淮南名郡最繁華。烟月重城百萬家。豪客春衫九鬣馬。佳人冶袖七香車。雷塘有塚生青草。板渚無波壅白沙。莫唱江南舊時曲。銷魂愁見落楊花。

岳王墳

恢復中原誓不離。靖康何意竟偏安。渡江帝子羞泥馬。賣國封書祕蠟丸。忠鯁旋聞疎趙李。英雄況復失張韓。六陵陵樹冬青盡。只有南枝尙鬱盤。

戊午七月自大梁東歸感喟成詩用以自贈

飄零淮楚踰河朔。轉徙幽州更大梁。迢遞關河雙去雁。古今歧路幾亡羊。時無燕趙悲歌士。坐有邯鄲挾瑟倡。但得翠娥深勸酒。不辭酩酊罄清觴。

問訊滄浪舊釣磯。樵兄漁弟共相依。眼看西北高樓遠。心逐東南孔雀飛。園吏好尋濠上樂。丈人已息漢陰機。浚郊不用弓旌辟。自署中吳老布衣。

湖海詩傳卷十二

張錫爵

字擔伯，嘉定人。貢生。有《吾友于齋詩鈔》。

蒲褐山房詩話：擔伯詩中，矩中規，宜風宜雅，不失先正典型。自陸菊隱、孫松坪諸老云：祖優游衡泌，以吟咏發其性情。同時莫逮也。迄今六十餘年，而吐屬維新，古香映几，深衣大帶，猶彷彿遇之。曾孫彥曾，畫聲壇坫，譽美江湖，知其貽謀者遠已。

月夜過靈鷲上人院

小院垂烟羅，宵涼露微白。杖策獨幽尋，月明見行蹟。孤燈照不眠，中有忘言客。開門聞妙香，依依話秋夕。

題吳漁山雪景小幀二首

積雪埋孤村，空山靜寒夜。幽人應未眠，疎簾竹間下。隱隱壁留燈，經聲出茅舍。遠岸玉塵崩，長空華月凍。木落天宇寒，宿鳥清無夢。遙見釣船歸，濛濛水雲動。

萬壽寺華嚴鐘歌

今改爲覺生寺

城西七里前朝寺，銅鐘如山土花漬。唇吐三千寶地音，背蟠十萬蓮花字。九重願力超人天，點畫波捺何翩翩。六丁呵護霄電紫，羣真下讀慈雲鮮。靖難功多新鬼哭，銅山槌破鐘成速。龜茲樂奏勝幡飄，雙樹光

涵少師禿鐘高三丈腰圍豐。君王笑錫公侯封。南山伐木枸虛壯。照耀慧日何瞳瞳。鼎湖龍馭排雲上。神物淒清墮經廠。仙梵禪燈歷九朝。特勅移來地蕭壤。萬牛回首千夫馳。華棖巨棟光參差。曇花感夢聲沉夜。銀草搖風曉擊時。聖孝原承文母命。六僧日供齋筵淨。雷轟天半紫閣寒。潮捲津門塵世醒。文皇黑業豈能償。神廟垂衣祚自長。洪鐘靈應迦維力。金地千秋象教彰。前年繫馬鍾山下。靈谷蒲牢眠斷瓦。云是高皇東序鏞。金川破後無人打。

明宣宗御筆子母雞圖

上有勅賜內監王進等字

雄雞掉尾高參差。羽毛颯颯蘆花吹。青蟲入口尙天矯。丹頂倒泥珊瑚垂。牝雞張口拱而埃。二雛仰母求其慈。二雛爭蟲競延頸。一雛啄地偏委蛇。一雛上背一雛伏。注目總與蟲爲期。斜陽欲沒影荒淡。細草亂茁青猗猗。二雛七子各異態。雖有佳手誰能爲。安樂已平交趾棄。萬機多暇閑相嬉。含毫吮粉若無意。點染忽出胸中奇。宮娥遙看貴妃笑。內臣拜賜踰珠璣。三百年來事灰燼。此畫獨壽堪咨嗟。晴窗漫展豁蒙翳。題識隱隱銀鈎欵。得之象外洵無間。子母合繪良堪疑。君不見長門寂寂僊師閉。無子君心更誰記。

明景帝廢陵

秋風十里吹荒陵。繚垣欵斷莓苔青。停車覓路夕陽亂。淒涼寢殿枯松鳴。土木之變良可異。倉皇北狩畱王庭。廟謨國柄知不惜。舉身委振何其輕。長君弭亂社稷重。議和遷國徒營營。列宗二祖養士報。司馬號

令行雷霆精誠動天戰士泣。咄哉委任由君明。建炎踐祚宗李在。何爲不返冰天行。東安門外舊君人。握髮出走宜郊迎。紫袍拜舞臣子事。南宮朝賀家人情。皇儲既定邦本固。沒寧生順千年名。事不出此戀天位。束刀繡袋多疑驚。綸辛同鐘受杖亦何罪。一朝伐樹緣高平。完德良難吁可悼。奪門之釁宜旋生。當時惡謚誠太酷。殺禮營葬無人爭。我來況逢劫火後。野燒漠漠連岩屨。歎歎弔古不忍去。回看纖月升林坳。

送人歸包山

執手未能別。哀蟬還自吟。涼風一夜雨。秋滿太湖陰。歸夢日以遠。煙波況復深。願爲天際月。流照最高岑。

翠微寺

迢迢翠微寺。一徑入寒烟。樵路秋山雨。僧房古樹蟬。蒼藤垂砌外。飛瀑落階前。啜茗閒窗坐。浮生意渺然。

劉龍洲墓

大布衣無愧。小朝廷可悲。渡江揮涕日。詣闕上書時。千載留殘碣。何人復古祠。顧湄今不作。惆悵立山陲。

太倉顧伊人欲鳩同志爲復舊祠而不果。

臥佛閣

飛閣俯千峯。遙遙見山麓。高臥不知年。歸雲夜同宿。

河渚

月落河渚涼。面面煙波隔。何處起漁歌。天空葦花白。

王爾達

字通侯。嘉定人。廩生。有虛亭吟稿。

蒲褐山房詩話。先生同祖司業七世孫。太生孝廉之子。性情坦易。通懷樂善。多聞舊事。爲門弟子談。前言往行。袞袞不休。詩亦如之。予與鳳喈同年。而先生呼爲小友。每語出肺肝。相示和氣。所薰至今。思之猶坐春風中也。

閒居

客裏歸來日。匆匆已二年。詩懷緣病減。酒量趁愁添。屋小惟容膝。囊空不貯錢。故園行樂處。風月浩無邊。僻逕蓬蒿沒。卑棲耳目清。寧爲無事飲。恥作不平鳴。覓句拈枯管。繙書愛短檠。蕭蕭庭畔竹。共有歲寒盟。

春初雪不止

江鄉臘盡欲回春。雪共春來又浹旬。攬鏡漸悲青鬢改。對床猶喜白頭新。地爐溫暖添藍火。漁艇蕭條罷釣綸。何日凍消梅意動。攜柑貰酒趁芳辰。

和曹來殷歸省述懷之作二首

鶻噪枝頭散曉煙。軒車枉過敵廬前。故人暮景成三老。才子言旋記十年。欲訴舊愁如宿夢。幸逢乞假暫歸田。耳邊蟻鬪何曾歇。時患耳疾只恐高談聽未全。

編籬折柳圃添樊。雨雨風風過幾番。親健正思追洛社。君恩未敢戀邱園。筐鋪細蟻蠶初子。撞解新龍竹有孫。風物鄉關原最美。待閒愛殺閉衡門。

雙清閣落成追悼南華先生

采殿揮毫信手成。頭銜管領是雙清。杏花春雨江南夢。空寄相思虞伯生。先生乞假南歸。纔至天津病歿。構造皆由清俸餘。雲飛畫棟麗天書。閣成先赴修文召。香案仙班別有居。

王愔

字存愔。太倉人。諸生。

潘渴山房詩話：存愔爲烟客。鹽卿曾孫。繼臺侍郎從子。而畫筆蒼翠。秀兼擅其長。詩法錢劉。詞宗姜史。極爲沈文愔公所賞。爲子畫三柳漁莊。春夏秋冬四幅。見者疑爲古人。嘗爲企晉寫寒山雅集圖。十四人文愔及定字徵君皆在。存愔寫景。張彬如寫照。時稱兩絕。子淵亦諸生。早歲學佛。受具於華山。遷居楓橋。不知所終。

傲劉松年

油油原上草。潺潺澗中泉。幽鳥時一鳴。遠邨帶朝烟。新綠漸稠密。落紅餘芳妍。柴門閉深陰。草閣臨春田。煩囂旣云隔。機巧亦復捐。於焉慊心賞。自理風中絃。

山寺獨游仿夏禹玉筆意作圖題此

漸離塵世喧。遂造招提境。梵唄清道心。禪花照潭影。情忘不知返。趣澹默自領。瞑坐松下風。夕陽度秋嶺。

漁父圖做李晞古筆

漁父秋江上乘潮泛釣船得魚沽白酒晚酌荻花邊

梅花書屋做郭熙筆

長林繞屋幾千枝想見幽人靜對時小閣春寒香雪裏半簾疎雨坐題詩

蔡 瓏

字文舟崑山人貢生官舍山縣訓導

蒲謁山房詩話先生居縣之西墩墩東距嘉定安亭四十里蓋歸震川顧亭林所居故先生之學私淑於兩公為多性質慤意嗜欲教人以盡倫篤行讀書好古為亟嗣遷珠街鎮從游者益衆予童弗受經因得知讀書之要暮年選廣文尤以師道為己任諸生聞其言往往感激愧厲至有泣下改悔者居五年以老致仕歸臨終為文以戒其子曰余碌碌無能經經自守慨百年之虛度鮮一善之可稱壯歲飢驅言辭拙于冥報殘年吏隱筋力衰於當官上有黍於光前下無謀以裕而移家近市遂奔先人版廬抗顏為師未先昔賢之闡奧考於揚屋其又奚尤辱在泥塗分固宜爾而復徒久生於世是為幸民竟膺中許之期尤慙仁者茲以大分有限與世長辭雖天壽之殊形要於不貳既死生之一致夫復何足似露將晞如蠅斯化啓手啓足髮膚差幸無傷附身附棺誠信同嫌於薄虛文無益末俗不經俱應捐除毋嫌駭聽倘旁觀未喻以為子道有虧可取遺命示之更有囑者平生苦志屬文愜心絕少至於酬和間有詩章尤屬支離見嗤大雅流傳奚望藏拙宜先倘有存留悉宜焚棄故詩文多散佚者

留別環峯紳士

晚歲羈微祿婆娑鬢雪深長貧甘吏隱多病忝官箴鄉夢縈臯座朋簪謝泮林遙知故園月千里照歸心

憶昨辭三徑，攜家上一船。悲銜毛義檄，坐久鄭虔氈。講肆棲公廡，香燈侍昔賢。舍學無訓導，衙舍寄琴環。峯書院內有宋儒定夫游。

子木主春秋奉祀。

那堪策仕日，已是乞休年。

十月下浣在漕溪，正覺寺講約，因留信宿，賦贈智公上人。

捧檄來蕭寺，晴和及小春。上方瞻氣象，近市隔風塵。講席朋簪盍，寒氈佛火親。遠公煩貯酒，半偈悟前因。

西禪堂卽事

鄭虔歸白髮，筆研已封塵。愛此筠牕淨，悠然佛火親。茶瓜隨分足，花雨逐番新。莫問長生訣，憑君聽未真。

和曹聖淵冬日書懷

日御元枵斗柄迴，竹君梅友共追陪。寒消元亮杯中物，暖蒸昆明劫外灰。身未許人因有母，容爲悅己怨無媒。西山舊約平原隱，茅屋三間水一隈。

葛景中

字運乘，號若湖，崑山人。貢生，官來安訓導。

蒲謁山房詩話：先生明太常卿錫璠之後，遷居青浦珠街鎮，寓圓車禪院，教授諸生，爲詩學溫岐章莊，句如閒居賦就霜凝鬢，少友詩成月滿梁，無事且傾婪尾酒，有情休續斷腸詩，錦囊句好，歷新畫石帶茶香，讀異書，尚有故交留白社，更無殘夢到紅樓，涼思乍添前度雨，老懷重感去年秋，七冷然可誦，及卒，同邑劉門探其事，略入玉山人傳中。

九日澱山登高

何年一拳石，踞此崑湖濱。邱壑無多地，登臨有幾人。吹花餘暖節，落葉伴閒身。莫送憑高目，秋風易愴神。

東庵

爲趁東臬履，行吟興未央。半灣溪水碧，滿院木樨香。寺僻荒蘿徑，僧閒閉竹房。秋風吹短棹，歸思入斜陽。

秋懷

青鏡年華不暫留，西風又惹鬢絲秋。三春畫閣憐巢燕，萬里滄波羨海鷗。明月自臨芳草渡，好山多上夕陽樓。側身孤望成寥落，手把琅玕詠四愁。

金陵舊曲追次東籬舅氏韻

誰言春柳章臺路，只抵秋烟黃葉村。玉笛清歌憐別館，金釵巧笑憶當門。斷鴻落月秦樓夢，倦蝶疎花楚岫魂。建業西風人易老，白頭天寶話愁痕。

紅橋無復認桃根，萬事傷心烏夜村。蟬噪夕陽臨故苑，鳥啼深樹傍誰門。悲殘崔護來時面，銷盡江淹別後魂。剩粉零香今莫問，昆明何限劫灰痕。

金粉繁華自昔論，家家春色苧蘿村。魚鱗碧瓦花圍屋，雁齒紅橋柳捲門。鸚鵡珠簾朝學語，海棠銀燭夜銷魂。而今秋冷江城月，只有青衫惹淚痕。

辛亥生朝感興

蓬累年年負壯圖。相逢剛得阿蒙呼。東方自昔常求米。南郭於今且據梧。未必成名非豎子。尙餘故態似狂奴。出門一笑羊腸曲。馬齒空憐老識途。

沙維杓

字斗初。長洲人。布衣。有耕道堂集。

蒲褐山房詩話。斗初與張崑南皆居下津橋。自號兩布衣。斗初隱於商。來往江西湖北間。長髯巨額。如酒豪劍客。詩亦多悲壯激發之音。崑南隱於醫。豐頤紅頰。神情怡曠。間好古琴。詩亦多清和閒適之趣。兩人性情各別。而好吟咏則同。皆爲吳企晉所契。嘯侶開樽。呼朋命屐。靡不與兩人共之。嘗刻爲二布衣集。今下世已久。詩板亦不復存矣。

宿四宜堂

梵宇敞湖天。宵深風露冷。澗松奏羣籟。崖月逗孤影。樹近俯鶴巢。燈遙辨漁艇。久嬰塵世喧。暫喜招提靜。半偈雖未持。衆妙先已領。多累愧向平。無營慕宗炳。支枕不能寐。浮生歎俄頃。

登中峯寺訪念亭上人

一雨衆芳歇。綠陰佳霽初。擾擾心不閒。久與林僧疎。茲晨踐舊約。取路忘崎嶇。杳冥入蒼靄。忽得支公廬。叩門興非一。握手歡有餘。蔬圃半藥草。禪榻多儒書。吾生愛靜便。捨此將焉如。夕照斂梧竹。歸鳥喧庭除。淹留出寺晚。惜別還踟躕。

同張崑南王蘭泉曹來殷自華山夜還宿靜菴上人精舍

上方鐘動初潭壑興寒霧不知微雨來。藹然中林暮。歸鳥相啁啾。暗泉互奔赴。藤枯難屢攀。磴危少安步。松際漏月光。照見山下路。回憩高僧廬。愉悅論往素。慮澹息衆緣。心清得微悟。龕燈明夜闌。喟焉起遐慕。緣源去安極。遐眺益蕭爽。暫違塵世喧。聊資烟霞賞。

漁浦潭

題姚雪軒吳山晴翠圖用東坡書王定國所藏烟江疊嶂圖韻

棗花初落辭故山。舊游回首空雲烟。嚴冬蕭條變草木。披圖風景還依然。但見千山嵐翠各奔赴。懸崖百尺噴飛泉。晴光雨色互窈窕。捲簾雲樹疑斜川。板橋茆屋宛村落。雞棲豚柵當門前。石梯盤空度木杪。埕鈴風鐸喧諸天。烘雲染霧妙點綴。一邱一壑皆清妍。忽思吾廬何處是。不歸久廢山中田。蹇驢烏帽走塵土。未若此地耕鑿終殘年。空谷采薪山寂寂。石潭汲水雲娟娟。攜琴坐待月上飲。醉倒自愛松根眠。帝鄉縹緲無夢到。回首已謝蓬萊仙。雲巒半幅寫歸思。青鞵布襪須隨緣。歲寒桂樹恐零落。作詩聊繼招隱淮南篇。

宿中峯寺

丈室層霄外，明燈坐夜分。星河澄霽壑，鈴鐸語寒雲。問法依支遁，論交愧領軍。境空心更寂，花露滴俱聞。
江夜

牢落荒江夜，星霜歲欲周。枯桑出野火，凍浦斷行舟。莫問馮生缺，空餘季子裘。臨風獨搔首，哀鴈下汀洲。
潤州夜渡

山扼中流險，潮迴北渡難。魚龍深夜寂，星月大江寒。泛泛憐雙鬢，茫茫集百端。嚴城吹凍角，悽切向南冠。
泊蕪城

此夕蕪城泊，鄉心更黯然。夜燈江口戍，寒雨楚人船。冷落愁孤客，飄零感暮年。荒雞一再唱，擁被未成眠。
刊溝道中

短晷西馳疾，長淮北上遲。岸高崩積雪，船響犯流澌。烟火謝公埭，松杉董相祠。賴多陳蹟在，憑吊一吟詩。
過燕子磯

削壁臨千仞，征帆日去來。雲端盤鶴鶴，樹杪出樓臺。岸坼隨潮走，江喧觸石迴。白門懷古地，繫纜重徘徊。
松滋送友人歸

北風吹雪灑征衣，匹馬衝寒汝竟歸。短鬢獨判淹澤國，尺書須仗達柴扉。楓香驛冷猿啼苦，桑落洲空鴈影稀。此日河梁一分手，荒城留滯更何依。

瓜州城樓曉望

城上秋陰黯不開。烏鳥曉角傍空哀。數行宿鴈蘆中起。一片風帆樹杪來。日上海門分島嶼。霧消江郭見樓臺。夢魂阻絕鄉關遠。歲月惟將客鬢催。

菊

叢菊凌晨白露團。後時終恐易凋殘。幾經離落迎秋發。半向天涯帶淚看。元亮棲遲耽寂寞。少陵行役飽艱難。對花忽動平生感。蕭颯霜風兩鬢寒。

秋日雜興

頻年旅食意如何。歷險真從夢裏過。驅馬亂山穿虎豹。偃帆滄海傍鼉龍。梁鴻去國歌彌苦。王粲登樓淚更多。歸臥故園空四壁。家貧無事不蹉跎。對酒高歌氣尚雄。古來潦倒幾人同。擔簦躡屨功名晚。擊筑吹簫道路窮。華髮蕭疎催暮景。緜袍零落感晨風。百年通塞何須問。且向滄江把釣筒。

歸舟漫興

鳧鷖唼喋滿烟汀。橋李城南路再經。一葉輕舟風正穩。晚來吹過落帆亭。晴波渺渺澹無烟。酒店漁罾遠岸連。又見蛤蜊新上市。水鄉風景逼殘年。

月夜渡太湖

湖水接天天不分。水禽夜呼烟際聞。滿船明月唱歌去。七十二峯皆白雲。

張 崗

字崑南。號古樵。長洲人。布衣。有鶴健堂詩鈔。

秋日過碧公禪院

修竹無遠近。入門但清風。秋陰澹斜照。暮色蒼然空。苔花細路轉。石磴寒流通。碧公寂滅久。孤墻荒烟中。臨堂思舊講。循林想遺蹤。高風昔已渺。邱壑今猶同。了然悟無生。趺坐聞禪鐘。

登堯峯作

夙昔聞堯峯。游心歲已積。杪春羣物秀。及茲事清適。路轉峰西偏。蕭條但松石。飛泉若風雨。淙淙下絕壁。向晚猿鳥啼。時還見樵客。緬彼五湖水。東逝自古昔。烟波碧如此。人事幾更易。請從支遁流。空山共禪寂。

早春遂初園卽事

停橈向林園。修竹衡門裏。透迤入苔逕。嵐翠滴牕几。種藥有山翁。垂綸見童子。境遠親禽魚。汀香秀蘭芷。開軒面西山。雲壑尤清美。丈人養微疴。逍遙慕園綺。懷新感物華。論舊惜年齒。梅花已零落。但有青溪水。坐愁風雨多。春暉澹如此。夜深巖戶寒。幽籟松林起。信宿卽歸期。相思悵何已。

題三泖漁莊圖

泖湖浩淼浮清瀾。九峯秀出晴雲端。故人結茅傍汀渚。綠簑嫋嫋秋風寒。已知水木遠人境。況復鮭菜供盤餐。蟹簾漁簞吾已具。從君散髮垂綸竿。

秋暮同楊石餘過葆中集遂初園雨中登閣分賦

憶昔攜琴坐山閣。空山猿嘯風蕭索。一彈流水響寒空。再鼓湘雲起蘅薄。卽今重到已三秋。依然風露滿汀洲。芙蓉零落不堪採。美人相對空離憂。蕭蕭秋晚風雨多。相逢奈此良宵何。黃柑丹荔手自劈。況有翠袖彈雲和。與君歡樂已遲暮。別後相思渺雲樹。漁洋山下好烟波。明日揚帆五湖去。

銷夏灣看白蓮

吳王銷夏處。尙有白蓮花。湖色澹無際。水天秋一涯。微風動蘋末。疎雨散蒹葭。日暮垂楊岸。同誰繫釣槎。雨中中峯曉望

一夜中峯宿。風泉萬壑音。曉鐘雲外斷。春樹雨中深。華髮催遲暮。禪林閱古今。浮生多感慨。不獨爲登臨。歲暮送友人之吳興

復作茗溪別。依依岐路間。斜陽孤棹客。晴雪五湖山。逝水看東去。冥鴻聽北還。天涯當歲暮。想像鬢毛斑。

送友人游天姥

潮落扁舟夕，飄然澤國東。桃花一夜雨，春水數帆風。此去登天姥，行吟憶謝公。空山摘瑤草，千里悵誰同。

月夜舟次寄懷諸子

斜陽渡口水烟分，東望平沙鷺幾羣。江浦雨晴潮未落，兼葭月上酒初醺。歸船涼露三更笛，別夢秋山一片雲。此夕懷人勞遠思，西風憔悴沈休文。

秋夜雨中集金管園中卽席懷亡友亦瑜

秋暝松牕燈火虛，故人清宴子雲廬。啼殘林鳥空山靜，落盡汀蘭暮雨疎。對酒尙吟思舊賦，論懷休擬絕交書。相逢盡是江潭侶，重向秋風問索居。

秋日登靈巖同石餘金管

振衣同上落虹亭，古塔雲深入杳冥。山市草荒秋露白，香溪雨過暮潮青。天空一雁來胥口，木落諸風見洞庭。莫向西風更懷古，菱歌淒絕起烟汀。

寄懷朱草衣客楚中

竹西一別幾經年，雲海相思共渺然。老去杜陵猶作客，病來摩詰愛逃禪。月斜湘雁鳴沙浦，霜冷吳楓落釣船。惆悵故山猿鶴在，幾時歸臥白雲邊。

重遇揚州賽紅女史愴念舊游賦贈

露桃花暝畫樓東。簫管曾同醉綺叢。今夕相逢俱是夢。月明重唱玉玲瓏。
瓊花也復解憐人。腸斷隋家舊苑塵。水調無聲江月悄。十年冷落竹西春。
忍將金粉怨當年。落盡桃花春可憐。多少揚州興廢事。就中愁殺杜樊川。

送友游洞庭山

洞庭秋色渺愁何。日暮乘潮載酒過。七十二峯天際落。片帆西去白雲多。

胡承祝

字華三。銅陵人。貢生。官蘇州府學訓導。有輟畊書屋吟稿。

擬韋左司寄友

用寄全椒山中道士韻

郡齋夜漏沉。忽夢烟霞客。訪我秋雨中。屐齒印苔石。坐花閒前軒。尊酒數晨夕。夢醒月在梁。依稀見行蹟。

擬韋左司寺居

用寺居寄崔主簿韻

禪室掩青燈。蟲語響籬落。寒雲淡欲無。山月照虛閣。風泉繞幽林。孤樹興不薄。苦無同心言。誰與慰離索。

題王蘭泉三泖漁莊圖

雲間三泖環重湖。迴汀曲澗激相縈。紆九峯倒影潑蒼翠。水天一色涵空虛。此間代有高人居。季鷹歸老餐

蓴鱸二陸當年未入雒。讀書愛築平原廬。君家意氣雄千夫。金門獻賦長卿如。鳳池翰染方磊落。胡爲寂寞盟樵漁。知君樂志惟琴書。衡門抱影塵襟祛。數椽結構依芳渚。水邨沙戶相招呼。忽飢誦經人事絕。蘆簾紙閣青燈孤。有時刺艇來菰蘆。竹竿手把笞箬俱。筆床茶竈左右列。嘯傲烟月何舒徐。予家鷓岸江環闕。波寬匹練光平鋪。風冷蕭蕭飄荻葦。雨昏拍拍飛鷗鷺。頻年匏繫羈東吳。樵兄漁弟還往疎。恨不及早賦歸去。鳴榔月下譟烏烏。披君畫卷烟霞敷。此境惘水驛綱無。鮭菜江鄉美風景。足迹未到神先祖。溶溶秋水兼葭枯。伊人宛在清而癯。何時結隣來薛濺。撈魚射鴨同長逋。

曉發

宿雨風吹盡。篷窗薄冷侵。水烟臨曉重。山翠入秋深。野渡人聲聚。遙天雁影沉。那堪回首望。落木正蕭森。

春曉曲

翠帳輕寒動。春風入繡闥。遼西無夢到。一任曉鶯啼。

題畫

迴汀曲澗杳無涯。曬網漁舟對岸斜。一帶疎林殘照外。白雲黃葉幾人家。

款乃曲

烟澹湖村燈火微。隔溪漁艇夜深歸。棹歌杳杳不知處。涼月一灘沙鳥飛。

過春山

字葆中號湘雲吳縣人諸生有湘雲遺稿

蒲褐山房詩話湘雲家居市井性愛邱樊獨與沙斗初吳企晉朱適庭張崑南諸君為友博通羣籍尤精於新舊唐書嘗為補遺糾誤未及成而卒患微君定宇極稱之年纔二十有九楊石漁磊寄懷詩云花約圖書並賞音筆牀茶竈伴微吟最憐小閣聯牀語多病常懷出世心其標格可知矣詩宗劉春虛王龍標及王孟章柳錢郎潑鮮幽逸妙悟天然自出清襟不由襲取玉樓早賦賞識者希沈歸愚先生甄錄別裁時子示以詩采擇數首今舉其工者悉著之庶毋致烟雲變滅也

雜詩

織女常苦寒。農夫常苦飢。里閭游俠兒。裘馬自輕肥。上林射雉往。平樂鬪雞歸。華燭布瑤席。香風引妓圍。酣歌散烟霧。咳唾成珠璣。得意苟如此。安知是與非。

雨霽卽事

霽色收微雨。白雲澹遙天。東原桔槔歇。新流分稻田。苔逕每孤往。蕭蕭聞暮蟬。藤陰凝暗露。樹杪生孤烟。秋氣晚來佳。爲吟桑者篇。

秋日寄諸子

秋林風蕭蕭。茅徑無人迹。閒居久沈冥。步履散愁疾。衆鳥各已歸。西山藹餘日。不見素心人。浩歌空竚立。

夏日閒居

果園沐新雨。空翠積几席。卷書午倦餘。墜葉紛蕭槭。乳鷺集卑枝。陰蟲吟暗壁。遇物多所懷。靜觀知有獲。同心二三子。幽事已成昔。新月滿蒼苔。誰爲一步屨。

中峯水明樓

積雨岩壑靜。古木吹幽香。山樓坐翠微。雲氣生衣裳。佛火耿幽龕。經聲雜風篁。蕭然萬籟寂。水石空青蒼。夙懷方外游。何爲疲津梁。誓將持半偈。掩關臥繩床。

雪中簡吳竹嶼

雨雪積深夜。荒溪斷樵牧。晨烟冷茅茨。陰色靜空谷。迴風颯以至。殘滴響修竹。蕭條孤興發。視聽轉幽獨。故人隔溪水。邨墟辨喬木。何當著屐來。床頭酒初熟。

沙白岸朱適庭秋嶺吳竹嶼夜集茅齋遲張崑南不至

山月隨客歸。華門烟中啓。涼露暗生衣。落葉時盈几。忘言淡相對。頗得清靜理。開軒望遠郊。隱隱微鐘起。不見抱琴人。幽懷付流水。

同吳竹嶼登凝遠樓

雨後遙山碧如洗。蘿逕無人暝烟起。露滴荷衣生暮寒。抱琴獨宿秋聲裏。爲君一鼓滄浪吟。萬壑千巖流水深。何處夜猿啼不斷。西風蕭颯引離心。

祇樹庵黃山松歌

何人植此黃山松。虬枝屈鐵高巖崑。日色慘淡烟濛濛。虛堂白晝生雷風。疑是軒轅遊載玉女。青天飛下蒼精龍。不然仙人縮地弄雲海。恍惚坐我天都峯。蓮花百丈倒空翠。飛泉十里噴長虹。老幹槎枒奏羣籟。寒濤澎湃聲摩空。道人無營靜對此。薄寒翠滴秋衣濃。招予松根聽清響。落葉謾謾驚秋蟲。無勞採藥三桑東。但乞方便安禪宮。高枕莓苔跣兩足。悠然夢覺寒山鐘。

寄吳竹嶼

野外疎人事。蕭然掩敝廬。涼風落山果。微雨長秋蔬。倚村歌招隱。臨流誦卜居。芷蘭誰采采。日夕落愁予。同吳竹嶼水亭夜話

水亭纖月上。蘿徑散秋陰。涼露生衣袂。清風滿竹林。美人坐遙夜。逸興托孤琴。一聽滄浪唱。悠然塵外心。對雪獨酌和邵澗夫

積雪滿窮巷。林深獨閉門。隔窗梅破臘。盡日酒盈樽。凍浦下寒鷓。空山啼夜猿。扁舟欲乘興。杳杳暮天昏。積雨

積雨荒江暮。危樓水氣昏。亂山開夕照。獨鳥下寒村。種種吾將老。哉詩誰與論。近來憔悴意。欲共白鷗言。竹爐山房訪天鈞上人。不遇上人好古能詩藏竹爐詩卷墨蹟希世寶也。

精舍泉聲裏。行人出翠微。雨餘芳草長。春冷雜花稀。浩劫留詩卷。名山老布衣。無因陪杖屨。惆悵對斜暉。

曉起

曉起理蔬圃。疏籬日影遲。秋寒菜甲細。露重荳花垂。散帙時閒讀。濁醪長自持。隣翁諳野趣。乘興過東菑。

問楊石餘疾

落葉滿汀洲。斜陽閉竹樓。十年吳苑客。一臥海門秋。往事悲青鏡。餘生付白鷗。相將有嵇阮。把臂入林邱。

曉登支硎山

閑人青蘿去。寒山深幾重。晴雲牛古石。空翠落長松。倚杖看流水。忘言坐曉鐘。下方初放梵。曙色辨諸峯。

山行卽事

澗道依山轉。迢迢積翠深。疎鐘荒塢靜。修竹數家陰。暮色歸田犬。溪光下渚禽。幽棲從我老。卜築對遙岑。

石湖

數里人空翠。峯回碧澗幽。新霜變木葉。斜日亂溪流。帆影松陵暝。菱歌笠澤秋。忘機羨漁父。把釣狎沙鷗。

宿水石閣

斜光帶木杪。山徑已蒼然。門掩藤蘿月。人歸橘柚烟。明燈臨冰飯。欹枕對鷗眠。一夜秋蕭颯。蘆花落滿船。

湖上曉起

宿雨霽空江。初陽隱寒樹。蘆洲不見人。微聞水邊語。

梁溪雜詠

東風過雨草芊芊。斜日山橋聚釣船。一路冷烟柳欲絮。春衣初試賣陽天。

邨居

遠山一碧帶孤村。樹石蕭疎晝掩門。閒臥不知新雨過。晚涼藥院長苔痕。

朱研

字子存。號紫岑。休寧籍。吳縣人。監生。

塞上曲

營門日落晚蒼茫。瀚海天山道路長。愁絕李陵臺畔路。夜深東望月如霜。
長城寒色起邊愁。深夜彎弓上戍樓。漢將令嚴霜月白。更無長笛奏伊州。

朱昂

字德基。號適庭。長洲人。監生。有養雲亭詩鈔。

題翁霽堂秋林覓句圖

風泉振林木。墜葉紛如雨。鴻雁初來賓。蟋蟀聲在宇。幽人動遐思。清吟良獨苦。悠悠孰知音。空山有樵父。

擬韋左司寄友

邵齋春風至。谷鳥林端鳴。時清多暇豫。端居懷友生。名山昔同游。芳樽茲獨傾。一從秋雨別。離索緘中情。去者愜幽賞。居者羈世榮。雜花明前川。春草日以萌。寂寥掩扉臥。良會何由并。

黃山松歌爲靜菴上人賦

黟山峭拔生古松。玉屏鐵壁眠虬龍。老榦槎枒萬枝立。蒲團石上雲烟封。陰崖終古闕樵採。斧斤所棄高澗崑。影摩蒼天野鶴唳。風鳴絕壁洪濤舂。軒皇一去五千載。振衣誰躡青芙蓉。道人移來植淨域。竹爐煮瀑森陰濃。有時干霄撼風雨。下眎蒲柳皆凡庸。我來松根重感慨。月斜獨聽寒山鐘。久辭故山適異縣。楓江旅泊淹孤蹤。十年夢想落雲海。無能策杖披蒙龍。皮皴骨瘦絕類此。星霜過眼秋徂冬。何時還山尋舊約。僂人招我天都峯。

斗初企晉過訪宿小樓

隣寺疎鐘歇。江村落木多。柴門深雨閉。客櫂暮寒過。促席依松檜。移床近薜蘿。山中媒信近。握手問如何。

寄懷凌祖錫

碧柳依南浦。相思春雨餘。雲帆三百里。海雁數行書。天末憐同調。花時歎索居。經年勞夢寐。君子意何如。

聽張古樵彈琴

幽居委巷靜，日晚坐鳴琴。傾耳泉流澗，當窗風入林。樓高寒雁過，山遠暮雲深。再鼓瀟湘曲，飄然諧夙心。

元夕吳江道中

夕鳥下村烟，春江欲暝天。梅花開異縣，客夢入新年。極浦疎燈出，孤帆細雨懸。蓬濛芳樹色，歸路渺平川。

題王蘭泉三泖漁莊圖

吳淞百里水泠泠，草色開門釣舫停。秋雨忽添疎樹綠，夕陽還送遠山青。人歸輞口雲迴合，棹入僊源路杳冥。從此結茅桑苧下，生涯好續種魚經。

寄題吳企管秋江歸櫂圖

秋風命駕惜離羣，黃帽青氈此夕分。別路猿吟三楚樹，還家帆卸五湖雲。閒情早賦陶彭澤，清夜高歌鄭廣文。整頓香溪舊漁舍，臨流結網趁斜曛。

題黃永夫竹漁莊圖

負郭閑田半畝宮，門前櫂轉曲溪通。綠楊晒網橋三板，春水環邨竹幾叢。東漢隱淪推叔度，西江詩格重涪翁。何當結屋南隣近，共話桑麻杯酒中。

和太史浚谷族叔偕同人游汪伯子巖東草堂之作次韻

名園幽寂樹層層，長者停車訪舊朋。山果雨中初結實，藥欄春盡半牽藤。溪流小艇聞漁笛，閣倚重巖隱

佛燈絕好竹林吟。嘯處清游我亦記來曾。

題江村草堂圖

芙蓉秋浦碧迢迢。又值寒塘木葉飄。曾憶扁舟漁火夜。殘鐘落月過楓橋。
秋柳問門野寺孤。玉遮山色晚模糊。好將黃鶴丹青筆。寫出江樓聽雨圖。

易諧

字夔勳。號松滋。江都人。候補知府。有抱山堂詩鈔。

題王蘭泉三泖漁莊圖

烟光結幽村。竹木紛可喜。古屋三兩間。靜者此棲止。吟詩發妙性。窮經喻微理。時一弄扁舟。長竿釣秋水。
立夏前一日西疇小飲

環溪野望

爲惜春將去。幽尋過竹廬。綠深棲鳥靜。風定落花疎。野迳苔痕合。夕陽隤影虛。芳華容易歇。把酒一踟蹰。
僊源不可到。卽此足閑情。草色碧無際。溪流春有聲。好花三月暮。疎雨一朝晴。向夕漁譌起。微風隔浦生。

陸貽穀

字露傳。號湘蘋。青浦人。貢生。

題黃雪廊

長廊凝望處。檀暈映簾櫳。香恰當秋半。游疑在月中。霏霏臨曲檻。馥馥入遙空。夜靜徘徊久。清虛此地通。

沈懋功

字枚臣。青浦人。貢生。有妙香詩草。

蠟梅

數點檀心耐細看。蜂脾偷蜜怯餘寒。隔江梅柳春將至。預報東風蠟一丸。

爲西岑倪氏題畫

霜林染遍葉。酣紅平遠秋。山入畫中。徑曲不知何處轉。小橋西去一灣通。

邵玘

字珪庭。青浦人。貢生。有西樵詩鈔。

題西莊光祿課畊圖

東風芳草堤。淥水菰蒲境。農事春來繁。畊夫未咸秉。夫君大雅才。振衣在華省。偶因休沐暇。聊睇田園景。塹徑何盤紆。遐阡頗修整。勉以畊耨勞。眷茲簔笠影。犬吠遠村閒。雞鳴墟里靜。良覲一以逢。囂塵自此屏。

王本蕃

字芳儀。青浦人。諸生。

渡澱山湖

風度歸帆疾。晴空漾夕輝。漁舡聲唱和。村舍影稀微。汀草連天碧。沙鷗逐浪飛。湖中春漲滿。應羨鱖魚肥。

王玖

字二癡。常熟人。暈之子。

爲述庵先生畫三泖漁莊并題

小槳入空明。橫橋出秋嶼。人在釣魚汀。如聞隔烟語。

